

आसाम गोजौसिन सोलौंथाइयारि परिषदनि गोदान फराफारिबादियै सुजुनाय गोजौसिन  
गेजेरारि थाखोनि Advance Bodo नि फरा बिजाब ।

# थुनलाइ सुजुबिजाब

( गोजौसिन गेजेरारि थाखोनि सेथि आरो नैथि बोसोरनि थाखाय )  
[For H.S. Ist year & 2nd year]

सुजुग्राफोर :  
मधुराम बर'  
ड॰ भुपेन नारजारी  
उमेश बर'  
बिरुपाक्षगिरि बसुमातारी



आसाम गोजौसिन गेजेरारि सोलौंथाइ गथुम

किताप समलय

पान बाजार, गुवाहाटी-1

“THUNLAI SUJUBIJAB” : A text book of Advance Bodo prescribed by the Assam Higher Secondary Education Council for H.S. Ist Year and 2nd year class and Published by Kitap Samalaya, Pan Bazar, Guwahati-1 on behalf of Assam Higher Secondary Education Council.

फोसावगिरि :

आसाम गोजौसिन सोल्लोथायारि परिषदनि जानानै

किताप समलय

आनन्द राम बरुवा रोड, पानबाजार, गुवाहाटी-1

आगष्ट, 2006 इं

जुन, 2007 इं

जुन, 2008 इं

जुन, 2009 इं

जुन, 2010 इं

मे, 2013 इं

मे, 2014 इं

मे, 2016 इं

मे, 2018 इं

मे, 2019 इं

अक्टूबर, 2020 इं

आगष्ट, 2021 इं

साफायफिननाय : जुन, 2022 इं

All rights reserved : No part of this publication may be reproduced in any form whatsoever, nor can any guide book be published without the prior written permission of the publisher.

बेसेन : 60.00 रां

साफायसालि :

आङ्गिक प्रेस

आमबारी, गुवाहाटी-1

## बुंफोरनाय

आसाम गोजौसिन सोल्लोथायारि परिषदा सोल्लोथाइ बोसोर 2006-2007 मायथाइनिफ्राय गोजौ बर' (Advance Boro) खौ फराफारियाव आयदा महरै थिसननो आखाइयाव लादों।

गोजौसिन गेजेरारि थाखोआव गोजौ राव फोरोंनायनि थांखिया जादों राव, बेनि जारिमिन, थुनलाइखौ आबुडै मिथिनाय आरो फरायसाखौ गाहामै गोजौ सिरिनि राव बाहायनायाव आखाफाखा खालामनाय।

सोल्लोथाइनि गोदान बिखान्थि बादियै गोजौ बर' फोरोंनाया फरायसानि गोहो जौगानायनि सायाव गोसो होयो जाहाथे फरायसाया गुबुन गुबुन आबहावायाव फोथायनायनि गेजेरजों रावखौ गाहामै बाहायनो हायो।

बे 'थुनलाइ सुजुबिजाब' खौ गोदान सोल्लोथाइ बिथांखि बादियै जथायनाय जादों। आं साबायख'र होयो सुजु आफादिनि सोद्रोमाफोर प्रफेसर मधुराम बर', ड० भुपेन नारजारी, मुस्त्री उमेश बर' आरो मुस्त्री बिरुपाक्षगिरि बसुमातारीनो एसेल' समनि गेजेराव सुजुना होनायनि थाखाय। लोगोसे साबायख'र होयो परिषदनि मावथिफोरनो बिजाबखौ दिहुननायाव थोजासे मदद होनायनि थाखाय। बिजाबखौ सेबखांना होनायनि थाखाय किताप समलयनि बिगोमा आरो मावथि हान्जानोबो आंनि साबायख'र होयो।

परिषदा गाहाम सुबुरन मोनोब्ला उनाव फोसाबना साबसिन-हामसिन दिहुनगोन।

नेहाथारि

आसाम गोजौसिन सोल्लोथायारि परिषद

बामुणीमैदाम, गुवाहाटी -21

## नायखां बिलाइ

### सेथि बोसोर

#### ( रायथाइ आयदा )

1. बर 'नि राव	आनन्द राम म 'साहारी	1
2. बर 'फोरनि गोदोनि खेला	चाणक्य ब्रह्म	9
3. फरायसानि मावनो गोनां आरो सोलोंथाइ	कृष्णकान्त सन्दिकै	16

#### ( खन्थाइ आयदा )

1. हाबाब निदानखौ मान हर	मदाराम ब्रह्म	30
2. मोनाबिलि	ईशान मोसाहारी	32
3. हा सोरजिनाय	बिहुराम बर'	35
4. निहिर सिनाय बार मोननानै	जगदीश चन्द्र ब्रह्म	39
5. आंनो गांसे मुझि नांगौ	धरनीधर औवारी	41
6. मोनाबिलि आरो आं	अनजु	43

#### ( सुंद' सल )

1. आंगु नेरसोन	सिकेन ब्रह्म	46
2. दुमफावनि फिथा	जनिल कुमार ब्रह्म	54

### ( नैथि बोसोर )

#### ( रायथाइ आयदा )

1. जोंनो सोरां नांगौ	चरन नार्जारी	63
2. बर 'आव सावरायनाय थुनलाइ	ब्रजेन्द्र कुमार ब्रह्म	69
3. बाथौ दोहोरोम आरो सानथौ	रामदास बसुमतारी	83

( खन्थाइ आयदा )

1. आंनि दाबुं दाफा	रुपनाथ ब्रह्म	96
2. दै बाज्रुम	प्रम 'द चन्द्र ब्रह्म	99
3. दावस्रिगोबा नागिरदों आं	समर ब्रह्म चौधुरी	102
4. सिमांनि सैनाय	सीतानाथ ब्रह्म चौधुरी	106
5. आर 'ज	सुरथ नार्जरी	108
6. खारसुमै समबादि	अरबिन्द उजीर	110

( सुंद ' सल ' )

1. मोदै आरो गोलोमदै	नीलकमल ब्रह्म	113
2. रोनाव फागला	हरिभूषण ब्रह्म	118

\*\*\*

## सेथि बोसोर

---

- रायथाइ
- खन्थाइ
- सुंद ' सल '

# बर 'नि राव

- आनन्दराम म 'साहारी

बेसे समायना, बेसे रमायना बे द 'तमा जायगाया । जाय जायगानि फुं मनाबिलिनि खल 'खल' बारा खालाव खासाव बिखाखौ गजन-सुदेम खालाम', जाय जायगानि फुंबिलिनि जा: जा: जाखांनाय जारौ-मारौ सान् गल्लैया बयनिब' गसखौ मिनिम्रां हय', - बे द 'तमानि फथार गेजेराव गसंनानै फारफ्रमथिनि सम्खर सम्खर गामि, समायना रमायना बंफां-लाइफांखौ नायब्ला ग 'साइनि सर्जियाव द 'तमा जायगाखौ बासिन' हाया । दिनै बे आफार गेजेराव गसंनानै नायब्ला जेबो खथा गसयाव गल्लैनो हागौ, नाथाय आडनि एंखुर गरसेनि गियाना बिखौ मनहास 'या । - मैखि खाथेनाय मेगना नायनानै गजना । हाज 'खरनि निज्राजं रा रा बहैलांदं लडा दैसाया दतमा राज्यनि निदान सुंनानै । बहैदं बेसेबा दिननिफ्राय-नागिरदं मुलुक गिदिं गिदिं दैमाखौ । मावरीया खावरीया गथाय हावरिया बड़ 'फिसाफ्राब' बेसेबा गबाव बिमा गमाजानानै गदाव-सराव फारफ्रमथिनिफ्राय फैनानै दिनै ब्येव ज' जाफैदं ।

बे जायगानि माय-दैजं देरनाय लाउनाय गस 'गिदिर भद्रमहदयफरनि बिमाफुजिन' रंनायनि आखलाव जं दिनै मखां नु:जलायबाय । बि मावथि सदमर्मा भद्रमहदयफरनि बिमा फुजिनायनि हाबिलाखौ नुनानै आंनि रानत्रिं बिखानि दैमु: थरंथिंसे बिसरनि अनफ्रु-दैफाव बिखा फुखुरियाव गल्लैनानै जबद गजनबाय । दिनै नाय, बे जायगानि बड़ 'फिसाफ्रा न 'नि जालाय-जाखायखौ गारनानै बड़ 'बिमानि मखां फजंनो थाखाय गस 'खुसियै हेफाजाब हफैदं । बिनिखुरै बिमा फुजिनायाव गावनिखौ गारन' हानाय गिदिर हाबा: मा जान 'हागौ ? दिनै बिसरनि हेफाजाब एबा गहयावन' बड़ 'फिसाफरनि गेजेराव मनसे अनफ्रु-दैसा रौ-रौ बहैलांबाय । आबां ग 'साइया बिसरखौ जीउ गलाव खालामथं ।

दिनै बड़ 'बिमानि मखां फजंन' फैनाय बड़ 'फिसाफरनि आथिंनि हाद्रिजं गथार जनाय आफार गेजेराव गसंनानै फंनैस' खथा बुंनो गसयाव हाबिला जादं । दिनै बे आफाराव बड़ 'फिसाफरनि आथिंनि हाद्रिखौ स 'नाफिथर हननानै लान' आंहा गह गैया । नंथांफरनि फाफिलयाव हमनानै गसंखंनानै फंनैस' बल' खथा बुंन' सानदं । दिनै

फिथलायनि सायाव सनानि रं थान' हागौ, नाथाय बि फिथलाया सनासे गबां बेसेन जान' हाया ।

दिनै नंथांफरनि सिगाडव फंनैस' बिजिरनानै बुंन' हागनबादि गियान आंहा गैया एबा आं राव रंया । दुखु जाय' आंहा बिनि थाखाय, - बर' जानानै बर'नि राव रंया । नाथाय गावनि रावयान' दि गावनि जीउ बे खथाखौ मायरं एंखुरसे ब्लाब' आं गसजं सानन' हादं । बि सानन' हानायखौ बिखायाव लानानै दिनै जाखानाय बड़' सात्रफरखौ हज्रिनानै बुंनय जाय' आंय' - 'जंहा दा समाव बाथौ फुजिनाय बादि रावनि थुनलाइ (साहित्य) फुजिनायनि सम सफैबाय ।' नाथाय आं हज्रि खावमालाय मा जान', आड बिमानि आहार जानायनि एंखुर गरसेनि दाहारखौन' सुजिन' हायाखै - बिमा फरनाय रावनि आलि दंसेखौनो बारन' हायाखै । आंनि हज्रिनायखौ नुनानै नंथांफ्रा मिनिगन, सावछबगुन्दला हननानै सानगन । थेवबो आं लाजिनायखौन श्ना: गारनानै नार्जि-खिस्रि रावजं खाथो-खाले बुंनयखौ खमा सुनानै खना संब्ला हामगौ । आंनि खथाखौ जिगाब-गुन्द्रा फिस्रिनानै, सालिखनानै गरफा-गरनै माय मनब्लाबो बिखौनो मायनाव हननानै खननानै ला: । आर जावसे छालिछे खालामनानैब' अनाथर सान्द्रि-संग्राय हमनांबाय हननानै आंखौ दादुषि । मानना आंनि हायान' उरिबावया गजा, बि आडनि हावरीया खापालस', फेलें सानगदउनाय नंया ।

आनान ग'साइ सर्जिगिरिया, मसै मसा, दाउमा-दाउसा जेब' जोबिन' राव हदं । बड़ हारिहाब' ईशर हनाय राव दंय' । नाथाय दिनै बड़' हारिया राव थानानैबो राव गैया । बियो बिमा थानानैब' बिमा मावरीया । आं बुंय', जाय हारिहा राव गैया बि हारिहा ईश्वरब' गैया, बिमाब' गैया । बिमा थानानैब' बिमा फुजिन रंया, राव थानानैब' राव रायन' रंया । बिनि थाखाय जाबाय, जं दिनै बिदा-फंबाय जुदा जुदा । राव नंयाब्ला मनसे जाति जान' हाया जाय जातिहा राव गैया बि जातिया दिनैब' हाजौ खंखराव, खालायसि बारियाव । जाय साहेब जातिया सानसे हाज' खंखराव थानानै, गेछेव-गफन जानानै थादंमन बि अगेन जातियानो दिनै पृथिबीनि राजा जान' हादं । साननानै नाय, बिसरनि बिमा फुजिनाया बेसे गगम, बेसे गथार । बिसरनि बिमा फुजिन रंनायनि फावयाव बिसरनि रावया खेक्रे-मेक्रे मनब्लाब' दिनै बेसे गथाव बेसे मेलेवनाय । मुलुकनि मानषिफ्रान' दिनै बिसरनि राव गदैन बिदैखौ जु-जु सपनानै गजनदं । सासे ईश्वरान' हदं बिसरन'ब' राव, जंन'ब' राव, नाथाय दुखु जाय', जादं मुगैसुगै जंनि गाज्रि आखलाव, - जंनि बिमा फुजिन' रंयैनि थाबाव ।

दिनै मेगन खेवनानै मुलुकखौ नायब्ला नुय', जाय जातिहा राव दं, हांख'(Letter)

दं बि जातियान' मुलुक गेजेराव देरसिन, लाउसिन गरंसिन जान' हादं । गथां-गब्राम जाग्रा हाज' खंखरनि नागा गारयाब' दिनै गावनि लामाजं गाव थाबायन' हमबाय । दंमन जंहाबो हांखो, दंमन जंहाब' सांखा, दंमन जंहाब' राव । जंहा राव गैयाब्ला हांख' गैयाब्ला, मान' थाख' डिमापुर नगर बायनायनि इन्जुराव लिरनाय रखा रखा ?

मनसे जातिनि सइथ' राइज'नि गंज-गथारखौ समनि मारामा अरनानै जेब्ला हाद्रि हाथपला खालाम', ह'मब्ला लिरथुन लायजामनि (साहित्य) जंब्लाउ-माब्लाउ गजंया जंनानै बि हाद्रिखौ स'नानि सिमां खालामनानै थिखांयो । जाति-जिउनि हासार गनां हाखौ थर्प थर्प सौंसिनानै थुनलाइ बंफांनि रदाया बेसे गथौ हा-सिंयाव थांय' बिखौ बुंस' हाया । बि गरमसा बंफांयाव बेसे बायदि बायदि गुफुर, जा, गम' गथां दाउ बानानै सिउ सिउ, साव साव गाब', फैदाव दैग्दाउ खन', मनफु-दैफु फिथाय जाय', हायाव सिरिहय' थायै थायै उराव मारिनानै अखाड-सायाव बिरबाय', - समायना अखां सायाव गां फुयार फुयार हालो दैलो बिरनायखौ बेसे समायना नुय' बिखौ बुंनानै फजबन' हाया । बि समायनाखौ नायनानै हानिफ्रायदि बेसे मानसिनि मेगना रुबायो, गस' गजन' बिखौ बुंसन' हाया । बाव-गम'ना मुलगा बिबादि दाउ मैनानि राव गदैखौ खानानानै गम' हाब' । बिबादि बंफांनि सायखुलुमाव ज'नानै दावरसे जिरायब्ला बिखा गजन' । समखर समायना हाज' गुदिजं बिरलांनय दाउब' फालोनि गुफुर-फुद्दु गांया जैरे मेगनखौ नायगम' हय', बिबादिन' राव गरंनि जिनिद गैयै दाउबनि गां बादि गुफुर-फुद्दु गथार गदै बिखानि रावया मुलुकखौ अखाफर गावदां बादि जंब्लाउ-माब्लाउ जंनानै दानस्रां खालाम' ।

संसारनि जेसे दुखु, जेसे दाहाखौ बाउहन' हानाय माबा मुलि दंब्लाब' मनसेबल' - थुन-लाइजाम लंनानै मेलेवनाय बिदै । जं सान' अमाद जिबि बादि जानाय लंनय खौल' । बि जंनि जबद गरन्थि साननाय । जं जंनि सानफा थलनि गासिब' खामानिखौ बिजिरनानै नायब्ला गबां सम सानफु-रायजयाव थाय' । बि सानफु रायजयाव गजननानै थाय' जं लिरथुन लाइजामनि दैफु बिदै लंनानै । आर बि सानफु रायजयाव मिनि रंजा थान' हानाय गहयान' मानसिखौ गियानि खालाम' । बिबादि गदै -दैफाव लिरथुन-लाइजामखौ फुजिनायान' मानसिनि धरम । मसौ-मैसोहाब' मनसे राव दं. बिसरब' गावजं गाव रायजलाय', मिथिलाय' । नाथाय बिसरा थुनलाइनि गदैखौ लंनानै गजना । हर-सान उदै सुफुंनय आर गांस' सावरायनायान' बिसरनि खामानि । दाउमा-दाउसा, एमफौ, एनला, दैसा-जामफैहाबो जुदा जुदा राव दं, नाथाय बिखौ मेथाइनि रदा, देमगलाय, मसा अर्जानाय आर राडियाव खख्लैनानै रम्बां रम्बां सिरि जथायनानै रैसुमै

मासुमै खननायान' थुनलाइ फुजिग्रा मानसिनिस' हाबा। थुनसल'नि (बुरन्जी) बिलाय बिलाय मानसि जातिनि सामफ्रमनि खौरांया मानबायान' हमदं, नाथाय बिनि गस' सुफुंग्रा बेसादखौ खौरां-खन्थाय एबा सलनि गेजेर जंस' नायन' मन'। महर- बिदैनि दथाव जं सामफ्रमब' गदनानै थायो, थेवबो मेलेवनाय मन'। मेगननि सिगांयावन' हरखिसान जेब' बायदि बायदि बसुमुथियाव गसाई सरजिनाय समायना रमायनाखौ नुय' जं। थेवब' महर (सबि) लिरग्रानि रंगिना संगिना महरखौ, मालि दानब समायना मुर्तिखौ नायनानै जंनि सानफ्रु गसया गजन'। लिरथुन लाइजामनि बिदैयान' जंनि गसखौ गजन होय'- गसनि बिनायखौ सुफुंय', खालाव खासाव बिखाखौ सुदेम खालाम'। थुनलाइ बाहा लानाय बिखायाव पाप सुनियाब' हाबन' हाया। बेरेमदैया जैरे बिबारनिफ्राय बिदै थरफा थरफा लाब'नानै बाहाखौ सुफुंय', थुनलाइ बिदै लंग्रा मानसिफ्राब' जिउनि जेसे खौरांनिफ्राय, सइथ संसारनि बायदि मुवानिफ्राय खन्थाय बिदै सरजिनानै लिरथुन लाइजाम फुखुरियाव जवन' गैयै बिदै बुथुमन' हागौ। सइथ कथा बुंन' थांब्ला बि बिदैनि सुखुरियाव गलैबला थामफैयाब' थैनाय नंया। सानसे समाव जं बिक्रमादित्य राजाखौ बावन' हागौ, बिनि नाम गजंखौ समनि मारामा जानानै सिनचाकर गैया खालामन' हागौ, नाथाय कालिदासनि गजं गथार लिरखांनाय थुनलाइनिफ्राय मेगनखौ नाखान' बबेथिं? राणी एलिजाबेथनि हेब्रे मात्रे राज्य खुंनायनि खौरांखौ थुनसल'याब' बावन' हागौ, नाथाय सेक्सपीयार लिरखांनाय गथार लाइजामनि हांखोखौ सर गारन' हान'? अर्जुननि ब्ला: जिलिया माराम जानानै दिनै निनचाकर गैया जाबाय, नाथाय ब्यासमुनि लिरनाय महाभारतखौ फरायबा सरनि मदमा जांखुखांया जान'? शिवनारायण परमहंसनि धरमखौ दिनै मानियै मानसि जंनि गेजेराव गबां दं, नाथाय बिनि गायत्री मन्थरखौ सि दनग्रा सर बिलाय? बे खथाया सइथ दि मनसे जातिया लिरथुन लाइजामनि गहयाव हाजौमा हिमालयनि खुरे गजौसिन जानानै मुलुग गेजेराव खर' थिखांनानै दाद गसन' हागौ।

बिबादि थुनलाइ गथारखौ फुजिनायनि दिनै राजा राइज गमाजाना बर' हारिनि बाथौ फुजिनाय बादि सान-सामफ्रमनि हाबा बि खथाखौ दिनै बे आफाद गेजेराव गसनानै गदनि राइज-राजा, रांखावरि गरमसा-गरमसिखौ नंथांफरनि गसयाव खख्लैनानै हयाबाब' जागन।

दा समाव जथ हेंथा हेंथिखौ गारनानै मनसे हाबा मावनांगन दिनै बर' जातिया जबर निदान रथाव गाफैयाव। दिनै मालाय जातिनि नारसिननाय, गाख्रेपनायाव हालाय हाफाय बेगेंजं, बिगुरजं, रानज्रिं, खुज्रिं जाबाय। बेसेबा दिननिफ्राय बर'नि रावखौ

सालबिमाय बेन्द्या सालबंफांखौ मानफबनानै मिरौ जिरो खालामनाय बादि, खालामबाय। बिनि गुदिरखौ दानस'नानै फबन नांगौ जाबाय, एबा खिलि हरफिनन' हायै बादि रदाखौब' जाउखुनानै गारनांगौ जाबाय। बिनि मनसे बोलो राहा मुलकनांयै बड़'नि रावखौ फसावनाय, मालाय हारिन' बिलायनाय आर बड़'नि रावखौ हरखिसान मान्जिनानै गजं खालामनाय। बिनि थाखाय जं जायगा दापफ्रामयावब' जथुमनानै रायफरनांगौ जाबाय, बर'नि रावखौ लायसि बिलायाव लिरखांनांगौ जाबाय। बिमा गमानानै आसाम मुलुगाव थादं दिनै बर' फिसाफ्रा साफा दाबफा। मालाय हारिनि गेजेराव थानानै गारबाय गावनि रावखौ स्रां स्रां। सस्लाबा रंजबा थ-थ, था-था रायजलायनानै जाबाय हारसा खेस्रा।

मालायनि रावखौदि सलं नांया आं बि खथाखौ बुंयाखै। गावहा जिगाब गैयाब्ला मालाइनिफ्राय लाबोनानै गावनि न'नि इन्जुर गिजिखौ दुमथे नांगौ। इन्जुर जिनाय नुनानैब' गावनि नखौ दुमथेनानै लायाब्ला जिबौ जिबाद हाबगन एबा अखा-बाखायाव जबद दुखु मनगन। दिनै जं गावजं गाव नांज्लायनाय-नारानाथारखौ गारनानै गावनि रावखौ फजंनांगौ जाबाय। जाय बड़'या बड़'नि राव एबा बड़'बिमाखौ फुजिनायाव गसयाव हेंथा लानानै हाबाखौ मावय' बि जोलैनि हांगारा पापनिफ्राय निस्तार मननाय नंया, बिमानि आहार जानायनि दाहारखौ सुजिख'न' हानाय नंया। दिनै बिनिथाखाय बिमा फुजिनायनि जीउ बिलाइ नांगौ जाबाय, जेसे, आलाइ-बिलाइखौ सौसिनांगौ जाबाय। जातिखौ दैखांनाय बिमाखौ फुजिनायनिखुरै गिदिर हाबा: एबा जीउनि सुखु जेब' जान' हाया। बे कथखौ सइथ साननानै बड़' बिमानि आथियाव तुलसि बिलाइजं सान्ति सारन' बयब' फे।

दिनैनि दिना जाति जाखांनायनि दिन। बयब' जातिया फारि फारि समगा जौगा जाखां जबबाय। दिनै उन्दुनानै दं बड़' हारिबला। बड़'याखि मानसि नंया? बड़'याखि जाति नंया? आर बेसे दिन उन्दुनानै थाबावन'। दिनै बरनि न'-याव मालाय हारिनि बेगरा रजनानै उखुम मुदा सौसिलांबाय। रायज्जलायनाय ईश्वर फुजिनाय गासिब' मालायनि राव जाजबबाय। हाजारिखि बुंया, गावनि रावजं गसनि खथाखौ जेसे गबां बिजिदनानै बंन' हागौ मालायनिजं एसे गबां हाया। बिमा गैयै मावरीया बादि दुखुथिया मुलुगाव सर जान' हागौ? बिनिथाखाय जाबाय दिनै बरया मालायजं सि सि हनजाग्रा, मुगैजाग्रा, सुखुगैयै। बिदा-फंबाय नांज्लाय, बड़' बिमा सुनानै हनाय रावनि माला बिदांखौ बस'नानै गारबाय फर्साफर्सि। दिनै बि गमानाय मालाखौ नागिर नागिर खनथुमनानै बड़' रावनि मालाबिदां सुखां फिननांगौ जाबाय। मालायनि राव सलंनानै गरंगरा जानाय

मानसिफ्रा गावनि गसबाखिखौ सुफुंबायब्लाब 'बड़' हारिनि गसनि-बाखियाव दिने मायगाब गरसेब गैया। बि गरं गराफ्रा नाजाब्ला मालायनि बाखिनिफ्राय गरफा गरनै लाब 'नानै बड़' हारिनि बाखिब 'सुफुंनो हागौ। मालायनि लाइजाम बिलाइनि सायख्लुम लानानै जनि रावखौ लिरखांयाब्ला जंहा दिने राहा गैया। नाथाय जान 'लुबैनानै थारामुराखौन' उदैयाव सनानै लाब्ला हामनाय नंया। बिखौ गिब्लिहन 'हानांगोन, नंयाब्ला खिख 'न' हायै र 'ग जागन। मालायनि ददेरे मादेरे गथ 'खौ बामनानै सासे हिन्जावया खुदुमफा, अनफा खालामन' हागौ, नाथाय बि देदेरे गथ 'नि बिमा हननानै सानथावा।

बे जबद गाहाम खथादि, मालाय गरं हारिनि दैफाव दैग्दाउ खननाय सन्दे समायना मसानायखौ नुनानै जनि सासे सानै सदम्मा बड़ 'फिसाफ्राब' खौरां गानानै बड़ 'नि खमाखि थापथेनाय खमाखौ गजन हबाय। बि सदम्मा मावथिफ्रा बड़ 'रावनि रदागुदियाव दैलुयाब्ला मिरौ जिरौ बड़ 'नि रावया समखांनाय नंयामन। दिने बड़ 'मेथाइनि खौरां लिरखांनानैस' बड़ 'नि रावया लाइसि बिलायाव रखा रखा थाबाय बि आर गमरनाय नंलेया, बावन 'हालिया। दं जोंहाब' मेथाइ गारां, दं जोंहाब' खाम सुफिन, रंगौ जंब' मसान' बाबेन बुबेन। नाथाय गबां बरयान' सान' गावनिखौ अगेन।

दुखु-दाहाव गदनानै थानाय मानसिफ्राब 'रैसुमै गारांनि मेथाइ खनाब्ला दुखुखौ बावय' गस' आवलिय'। सुफिननि रैसुमे गारांयाव जिबौयाब' समनांय 'ब्ला, मानसिया मान' गमया जान'? नारद मुनिनि रजापनायाव गसाइगिरिनि बिन्दयाब' ल' ल' मावनाय खथा दं हम्बला बि मेथाया गाज्जि नंथ्रा। मेथायान' जातिनि जिउखौ जावरि खांहय'ब्ला, आवलि हय'ब्ला गावनि रावखौ रज' हय'ब्ला जातिखौ दैखांयोब्ला बि माब्रै गाज्जि जान'।

बि बादिन' जुगु मनसे जनि गथ'-गथायफ'रनि गेजेराव मेथाइनि बेरेमदैखौ राननानै हब्ला बड़ 'यादि गावनि गारनाय गमानायखौ थाप मनफिन जपगन, बिखौ बारा बिजिरनानै खन्था नांया। दा समावनि जनि गेजेराव खौरां गानायनि खननाय-मसानायखौ नायनानै बुंय', गाजला बड़ 'नि बिखायाव मेथाइनि दैथुन जाखांनायाव गदनि मसानाय, खननाया फैफिनबाय। बे जबर गाहाम खथादि, जनि बड़ 'नि मासाग्लानाय, हाबा जानाय, दौदिनि थिखांनाय, नाव जावनाय, खैजेमा फनाय, सानगलाव बनाय, माउजि-मिंभ्रां गेलेनाय, मायनाव दैखांनाय दाउज्ला सौज्जायनाय, बि जेसे बायदि बायदि मसानाय मसान'खनन' गरं मानसिनि आखायाव गगलैब्ला बर'नि फावयै गदान गदान खननाय-मसानाय समजिनानै बड़ 'हारिनि खुरिया खामफा अदनाय आथिं आखाइखौ गखं खालमगन, - सेरजानि नासिनाजं लाथा-

खानाय थैया जावरिखांगन। बिडि- बम्बलड; खाम-सुफिन जेब' बायदिखौ दामन' गरं जानायाब' जाति दैखांनायनि लामा। बयब' जातिहाब' खननाय मसानाय दं गावबा गावनि। जौनि खननाय-मसानायखौ मालाय हारिया नुनानै राव रंयैखाय, मुगैन' हागौ, मिनिन' हागौ। नाथाय जंहा बेयाव एसेब' जामनाय जिनाय नंया। बे लाजिनायनिब' खथा नंया। बिनि थाखायन' सिगांयावन' बुंदं, - मालाय हारिनि गेजेरावब' जौनि रावखौ फसावनांगौ हननानै। ईश्वर हनाय रावया रावनिब' गाज्जि नंया। रंब्ला, मिथिब्ला बयनिब' गथाव, बयनिब' गदै। सर बुंय' जौनि रावया राव नंया? सर बुंयो जनि रावया गदै नंया?

जाति जाखांनाया दैमु-निज्रा गनाय बादि दै नंया - दै बानानि छाव छाव लमसावनायस - हाब्रां गिसिखाहनाय दैमु बबेबा जायगायाव फैला थिखांनानै हय'। सिगांयावन' बुंदं, दिने बड़ 'नि निदानखौ बिजिदनानै बुंनो आंहा गह गैया। बयब' मिथिगौ गद बड़ 'या बेसे गिदिर जातिमन्। दिने बयबो जातिया गाव गावनि जातिखौ दैखांन' बेसे एउखां-सावखां जादं, - बिखौ नायनानैस' आं फंनैसो बुंनाय जाबाय, बिनि थाखाय दाय जाब्ला आंखौ निमाहा ह।

गमामा बे समाव ज 'ङ'गावनि रावखौ मुगैब्ला, गावनि लामाजं थाबायब्ला, - दाबन' जोङ्-मालाय गुजुनायाव गुजुफाब्ला मालाय मिनिनायाव मिनिफाब्ला, मालायनि खरसानायाव गावनि नाथाक्रियाव सुनै फुननानै लाब्ला, जं गावनि मदमाव खुरु जाफबब'ब्ला मिथिनाय नंया। बिनि थाखायन' जं गावनि मदमाव मा जादं मा जाया सिगां थं लानांगन। दाब' जनि गेजेराव गावनि रावखौ मुगैनाय जलैनि हांगार साफासानै दं। बिसर बादि बड़ 'बिमानि हथसिरा फिसा रावब' जान' हाया। जेसे दिन जं गावनि सायाव गस फथायनो हाया, एसे दिन जातिनि खापाला गेवनाय नंया। जं दिने खासाय मेराय खानानै - बिखा फदर्दानानै बुंनांगन जातिया सानसे गहगिरि आहम राजाजं दावहा नांदंमन, गावनि रावजं एसे गगम-गुवार राइज 'खौ खुंदंमन - बि गहया, बि रावया दिने खर थिखांफिनगन। बि गहयान', बि रावयान' मालाय हारिखौ सिं खालामनानै लागन-गावजं बजबनानै लागन - खुगा गदै बड़ 'बिमा फुजिनायाव बयब' गस' फथायगन। □

**लिरगिरिनि सिनायथि :**

**आनन्दराम म 'साहारी :** 1912 मायथाइयाव आनन्दराम म 'साहारीया टाकिमारि गामियाव जोनोम मोनो। बिथाड 'अलंबार' मुगानि गोजौ सिरिनि सासे रायथाइगिरि। प्रम 'द चन्द्र



ब्रह्म, ईशान मोसाहारी, कालि कुमार लाहारी आरो द्वारेन्द्र बसुमतारीमोना खन्थाइ रनसायनायाव गोसो होब्ला आनन्दराम म 'साहारिया रायथाइ सोरजिनायावल' गोसो होदोंमोन। बिथानि रायथाइफोरा जादों बड़ 'नि राव, आग्लानि बाश्चा, न्वनि माइदां, द 'तमा फोथार, लेखा ग 'रं हौवा आर' लेखा रडि हिन्जाव। बिथानि रायथाइफोरा बर 'नि निदानखौ लानानै लिरनाय। 1985 मायथाइयाव बिथाड रंसारि जायो।

### सोदोबथि :

निदान - खैफोद

हावरीया - जेबो लाय लथर गैजायि

मावरीया - बिमा बिफा थैजानाय

थर्पथर्प - थोरोब थोरोब

### सोंथि :

1. संसारनि दुखु दाहाखौ माबोरै नेवसिनो हायो ?
2. रावा मोनसे हारिखौ माबोरै दिखाडो ?
3. " 'आं बुंय' जाय हारिहा राव गैया बि हारिहा ईश्वरब' गैया, बिमाब गैया। " - लिरगिरिया मानो बिब्दि बुंदों ?
4. थुनलाइगिरिनि हाबाया मा ?
5. लिरगिरिया रायथाइनि गेजेरजों बै समनि बर' हारिनि थासारिखौ माबादियै बेरखां होदों ?
6. बर' हारिखौ माजों जौगाखांहोनो हागोन होनना लिरगिरिया सान्दों ?

### बेखेवना लिर:

- (क) संसारनि जेसे दुखु, जेसे दाहाखौ बावहन' हानाय माबा मुलि दंब्ला बि मनसेबल' - थुन-लाइजाम लंनानै मेलेवनाय बिदै।
- (ख) गावहा जिगाब गैयाब्ला मालाइनिक्राय लाबनानै गावनि न 'नि इन्जुर गिजिखौ दुमथे नांगौ।
- (ग) मालायनि ददेरे मादेरे गथखौ बामनानै सासे हिन्जावया खुदुमफा, अनफा खालामन' हागौ, नाथय बि ददेरे गथनि बिमा: हननानै सानथावया।

## बर 'फोरनि गोदोनि खेला

- चाणक्य ब्रह्म

जारिमिना हमसहरनो हायि समनिफ्रायनो बर 'फोरहा गावसोरनि जायगानि गावसोरनि आदबै दैबोनाय गोबां खेलाफोर दंमोन। बेफोरनि जारिमिन गैया होननानैनो बेफोर खेलानि जोनोम सम आरो बोरै जाबोखो मोनथिनो गोब्राब। सुबुड बयबो गोसोनि दुखु मेंनायखौ बावनानै गोदान दुंगानायजों गावनि हाबायाव नांफिननो थुलुंगा मोननो आरो लोकोसे खहाब गोनां रंजानाय मोननो खेलाफोरखौ गेलेयो। मानसिनि सिडव थानाय माखासे जोनोम आखु (सहजात प्रवृत्ति instinct) आरो आबेगफोरा गेलेनायजों सोमोन्दो थायो। रंजालुनाय (आनन्दब'ध) आबेग आरो दाथायनाय (संगठन प्रवृत्ति construction) गावखौ फसंथाइ। (आत्मप्रतिष्ठा self assertion) बेफोर जोनोम आखुफोरा गेलेनायजों मैखोम सोमोन्दो थायो। दा गुवारै गेलेबोनो लानायखौसो गोथौयै साननो गोनां। बेखौ सानजायो दि बड़ 'फोरा गावसोर समाज मोनसेयैनो राइजो जाबोनायाव बिसोरनि खेलाफोरनि आदबफोराबो रोखोमसेयै गोरोबबोदों आरो बेफोर आदबफोराबो बेनिखायनो गुबुन हारिफोरनिजों जुदा।

बर 'फोरा गावसोरनि आदबै गोबां खेलाखौनो गेलेनो लाबोदोंमोन बेनि फोरमानखौ थांनाय थामजि ब्रैजि बोसोरसो सिगांनि गेलेनो लाबोनाय खेलाफोरखौ नायब्लानो रोखा मोनो। बेफोर गोबां खेलाफोरनि माखासेया गुबुन हारिनि खेलाफोरनि आदबजों दलाम गोरोबनायब्लाबो बांसिनानो गावसोरनिखामोन बेखौ नुयो।

गोदोनिफ्रायनो बर 'फोरा गेलेबोनाय खेलाफोरनि मादाव आमै मै (न' सिडव, हाग्रायाव), आमोल दिमोल एबा मारिव (दैनि खेला), बिफानि मारिव, हाखरनि मारिव, दहब, दाउया एबा दाउदै, सल गेलेनाय एबा लाउनि सल गेलेनाय, गननि जं गेलेनाय, थिया थिया (एनजुर एबा हा मोदोमनि) एबा हांखो बोनाय, बादुवा (आदुमब्रा बिलाइ जुनाय), गर गेलेनाय, गिला गेलेनाय, मोखा खेला, खिखर मंगलबाथा (मोसा-मोसौ, सियाल), बाथा (गेदेर-उन्दै), औवा हानथु, आसिनि-बिसिनि, दांन खारनाय, खै गेलेनाय, हाबै दुदु, मोदोम बोखांनाय, हेगगुर (मालजुज), बोरला गावनाय, राजा, मेगन फांथेनाय, दारिया फाथा (रेडि), मैसो सौलायनाय

(सिनस्लि हाग्रानि), माउजि, एनजर, आदि दिगा, मोस्रोम गेलेनाय (गारि खेला) बेफोरखौनो मख'थाव ।

बेफोर खेलाफोरखौ माखासे बाहागोफोराव राननो हागौ । (क) बोलो नाडै खारनाय गैयि - खिखर गेलेनाय, आसिनि-बिसिनि, आदि दिगा, मंगलबाथा । (ख) खारनाय गोनां बोलो नाडै - थिया थिया, बादुवा राजा, खै-खै, दारियाफान्था, माउजि एनजर, औवा हान्थु, मोखा खेला । (ग) बोलो गोनां खारनाय गैयि - जं बुखुनाय, सल, मैसो सौलायनाय, मोस्रोम खेला, मोदोम बोखानाय । (घ) बोलो गोनां, आरो खारनाय गोनां - दहब, दाउदै, हाबै दु दु, हेगगुर, गिला (आसिनि बोलो) । खारनाय गोनां गोबां - खेलायावनो दम नांनाय । हां बन्द खालामनायनि मादाव खै, हाबै दुदु, आमोल दिमोलनि खेलायानो मख'जाथाव ।

बेफोर मख'नाय खेलाफोरनि मादाव खायसेया हिन्जावफोरनि आरो खायसेया हौवाफोरनि होनना बुंजायो । गर खानाय, आम्रम गेलेनाय बेफोर खेलाखौ बांसिन हिन्जावफोरनि गेजेराव नुनो मोनो । बबेबाखौ हिन्जाव आरो हौवाफोरनि गेजेराव गेलेनाय नुनो मोनो ।

बर'फोरनि गेलेनाय गोदोनि खेलाफोराव खाथिखाला एबा नांजाबनाय गुबुन समाजनि खेलाफोरनि आदबफोरा हाबफैयाखै बेखौ बुंनो हाया ।

बेबादिनो बर'फोरनि गेलेनाय गोदोनि खेलाफोरनि खायसे आदबफोरा गुबुन समाजनि खेलाफोरावबो हाबहैदो होनना सानजाथावो । गुबुन समाजनि बबेबा बबेबा खेलाफोरखौ बर'फोराबो गावसोर गोबाना लादो बेखौ साननायनि थावनि दं । बर'फोरा गोबरै गेलेनो लाबोनाय माखासे खेलाफोराबो बर'फोरजो सिथाबनाय एबा भारतनि गुबुन समाजनि सुबुंफोर गेलेनाय खेला आदबफोरजो गोरोबो । बाथा, दारियाफाथा, आम्रम बेफोर खेलाफोरखौ सोनाब आरो साहा भारताव गोबरै नुनो मोनबावो । खायफा खायफा खेलानि आदब नेमफोरखौ नायना बर'नि बेफोर गोदोनि खेलाफोरा सीना एबा मंगलिय फोलेरनिफ्राय फैनाय होनना फोथायनो हायो । (थानाय 12-5-88 इं अक्ट'खालि क'कराझाराव खिख'र खेला बादायलायनाय बेखेवनाय मुस्री महिनि महन ब्रह्मनि बुंथिनाय - बर'फोरनि गर खाननाय, गिला गेलेनाय आरो बिदोर गेलेनाय गासैबो खेलायानो सीन हादरनिफ्राय फैनाय ।)''

थाजाबनाय खाथियाव थानान मोनसे समाजनि गोहोमा गुबुन मोनसेजो गावजो गाव गोग्लैलायो । गोखो समाज, फाखनाव थानाय समाजनि गोहोमा गुरैसिन समाजनि सायाव बांसिन गोहोम खोख्लैनायखौ नुयो । जारिमिनाव दं बर'फोरा मोनसे समाव गोखोमोन बिसोर गोहो बोलो हारिमुजो दावगानाय हारिमोन । बेनिखायनो औरैनो

सानहरनो हायो बर'फ्रा गोदो थारैनो खेला हारिमुयावबो दावगानाय हारिमोन । बर'फोरनि खाथियाव एबा थाजाबनाय आह'म, खासिया, नागा, गंगार बायदि समाजनि खेला आरो खेलानि आदबफोरा बेनिजो बे एसे नडा एसे बारस्लायदो होनना सानजायो ।

आह'म मुगानिफ्राय बेयो एसे रोखासिन दि आह'म राजानि खेलानि फारसे अनफावरि हाबा दिन्थिबोनायाव आह'म हादराव माखासे खेलाफोरा गोखो जायो । दानि शिबसागराव थानाय रंघराव गेलेनाय मैसो सौद्लायायना (महजुज), सिला खेबद्लायायना (सेनजुज) आरो औरैनो सोलिबोनाय दाउदै सिफायनाय (कणीजुज) दाउज्ला सौलायहोनाय बेफोरखौ बर'फोरा रोडि नडामोन । आह'म मुगानि आसामाव गेलेनाय बेफोर खेलाफोरा बर'फोरनिमोन खोमा होनना गोबाडनो सानो । बेनि अनगाथै आसामाव बर'फोरजो लोगोसे थानाय गुबन समाजनि गेलेनायफोरनि खायसे आदबफोरजो द्लाम गोरोबनाय नुनो मोनो । बेनिफ्राय मोनथियो बर'थागिरि सुबुंनि खायसे गेलेनाय आदबफोरा थारैनो बैफोरनि समाजाव बारस्लाय हैदो ।

खमज्जलायनाय (मल्लजुज), बोरला गावनाय खेलाखौ गुवारै गेलेनायनि जेबो मख'नाय गैयाब्लाबो बेखौ बर'फोरा दि गेलेयामोन बेखौ बुंनो हाया । साप्रोम बर'वानो बोरला गावनो रोगौ आरो खमज्जलायनायाव गोरामोन । थालिर बिफाडव बोरला थिर हाबहोनाय, थिरजो फिथाइ फोनांनाय बायदि बेफोर दंमोन । मारसियेल आर्ट हिसाबै मख'थाव जेबो गैयाब्लाबो दाहाल थुंग्रि सिबनायनि बादि जायोमोन होनना गोबां आगोलनि बर'फोरा बुंनायमोन ।

खेलाफोरनि नेमफोरा गावसोरनि मोनसे समाजनि गेजेरावनो गोरोबजोबाल्लाबो गुबै आदबफोरा एखे । मबेबा मबेबा खेलाफोराव साननाय (counting) नि राव, खन्थाइफोरा गोबानियायो बारा थफाद नंलाया । बेनि अनगाबो मबेबा खेलाफोरजो थानाय सल'बाथाफोराबो खायसेया गोरोबलायो आरो खायसेया गोरोबलाया । बेफोरबादि बै साननाय (counting) राव, खन्थाइ सल'बाथाफोरा बे समाजनि सिडव हाबना थानाय समाज जिउनि गेदेर गोहोम बेरखानाय ।

गाहायाव माखासे गेलेनायनि साननाय राव, खन्थाइ मेथाइफोरखौ दिन्थिनाय जाबाय -

बाथा खेलायाव गर साननाय-

1. "एले थेले सावले जामखा बेल बाथा ।"

- महिनी नार्जारी

2. "कदम दले सुखुर सायरे दिया फुल ।"

-हिरम्भ नार्जारी

गर गेलेनाय (मेथाइ) - सोबनास सोबनास सोबनास फाथिजां। हालिव-हालिवदों बान्दायदों। ज- जदै खैजोमा बिदै। उबसा-उबसा थेब गोसा।

आसिनि बिसिनि - 1. आसिनि बिसिनि दुब दुब रसिनि, नावबारि सिलाबारि गगनदे गगनदे राजानि लाउथि थालांबाय हाल सुसुंनि खाल ग'।

2. आसौ बिसौ गोमबिरि बिसौ सालदां मादां आव जादां नावबारि सिलाबारि अजानि लाउथि थालांबाय सिरि साराय ग'।

आमोल दिमोल - आमोल दिमोल गरायमोल दाउसा गोथै माहाजोन गगेरेखाथा गलदुम।

दाउखा खेला - गा गा, नै साबनोसै साबनोसै।

आदि दिगा - आदि दिगा माइबलंगा सिफि सिफि हलंगा अल 'ल'।

खेरखामुथि - खेरखामुथि खेरखानि दुमुनि बायदि दुमनि साखथि बाहाय ग'।

दागदा गालि - "दाग दागालि दाउसा निसालि।"

सल 'बाथाफोरनि मादाव गिला गेलेनायनि सल 'बाथाया मख 'जाबाय। बे खेलाया बर' समाजनि गेजेराव मोनसे गिदिर सामाजिक खेला एबा हारिनि खेलामोन बेवहाय बयबो खौसे। उनदिन्थि हिसाबै बेनि दोंसे सल 'बाथा मख 'जायो - गोदो गोदाय गिलाप्पोन मुंनि सासे जोहोलाव दंमोन। बिजों गिला गेलेनायाव रावबो हायामोन। सानसेखालि गिला गेलेनायाव बिनि खाननाय गिलाया सातथाला हाजो बारनानै आसागि बैसागिनि सिथलायाव हि दाबाय थानाय समाव आसागिनि इसान सालिनि हि खुन्दुंखौ थबस्र थबस्रा खालामहैजोबो। आसागिया सोरनि गिलाया आंनि खुन्दुंखौ बस 'फैजोबखो होनना गिलाखौ गावनि दौबायाव थोरोब सोना दोनो। ओजों गिलाप्पोना जेरै - गिला खारबोदो बेथिं थाडै थाडै सातथाला हाजो बारलांना आसागिनि इसानसालियाव मोनहैयो। गिलाप्पोना गावनि गिलाखौ मोनदों नामा होनना सोंसेयावबो आसागिया गिलाखौ लानानैसो दैसा सेराव खारलाडे। गिलाप्पोनाबो होसो लांनायाव आसागिया दैसा सेराव मेथाइ खनै खनै रंजा रंजा बाज्ल 'बाज्ल' मोसाबायो आरो बिजों माखासे सिख्लाफोर थांफाना मोसाहैयो।" बेवादियैनो बेफोर जायगानि खेलाफोरा बर 'फोरनि गावसोरनि समाजाव गोगोम गोहोम खोख्लैदोंमोन।

गेलेनायाव आखा फाखा गावनि रोंसारनायाव देदगानानै लानायमोन। समाजनि मानसिफोरानो बेबादि जायखि जाया खेलायाव रोंसिन मानसिखौ बाखायनायमोन।

खेला नायै खेला गेलेनायनि थावनिखौबो बानायनानै लानायमोन।

हिन्जावफोरनि बांसिन खेलाफोरा उसुंखना एबा न' सिथ्लाफोरानो जानायमोन। गिला गेलेनायनि थाखाय सिथ्ला लामानि स्लिम जायगा। खिखरनि थाखाय बिफां सिंनि लांदां जायगा। बाथा दहबनि थाखाय लांदां फोथार। मोसौ लाउखारफोरा गावसोरनि नांगौमथे गेलेनाय थावनिखौ खालामनानै लानायमोन। बेबादिनो खेलानि थावनि आरो समफोरा समाजनि गावसोरनि मावना जानाय आरो मिथिंगाजों गोरोबनायजों सोलिबोदोंमोन। बुंनो थाडेव्ला बेफोर गोदोनि खेलाफोरनि गुबै थांखिया रंजानायनि गेजेरजों गावनि जिउखौ रेदे गोनां आरो गाहाम देहा लाखिनायनि थाखायमोन।

गोदोनि गेलेनायाव बादायलायनायनि गोसोफोरा एफाग्राब गोख्रों नडामोन। बादायलायव्लाबो बान्था एबा जेबो रां एबा माबा मुनाफानि बाथ्रा गैयामोन। देरहानायनि देरगानायानो बिसोरनि देरगा गोनां जिउमोन।

मोनफा मोननै खेलाफोरनि बादै समाजा बेफोर खेलाफोरनिफ्राय दोरोदबोनायाव दा बैफोर गोदोनि बर 'नि खेलाफोरखौ नुनो मोनलिया। बेनि गुदि जाहोना जाबाय सोनाबारि इंराजफोरनि साग्लोबनाय हारिमु। गुबुन हारिफोरनियाव साग्लोबनायजों लोगोसे बर 'फोरनियावबो बिसोरनि साग्लोबनाया फैयो। मोनसे गेदेर रावा बेनो जोंनि गोदोनि खेलाफोरा सोखो माखो नड एबा फोसाबनाय नड। सोनाबारिनि बे खेलाफोरनि आदब नेमफोरा गाहाम अनसाय जानाय बादियै हाबफैनायाव आरो भारतनि गुबुन दावगानाय हारिफोरानो बैफोरखौ नाजावनायाव जोंनि समाजाबो गावनिखौ गारना बैफोरखौ नाजावो। दा नाजावनाय बल, क्रिकेट, बेटमिन्टन, दाबा, साइनिस सेखर बायदिफोरा बेनिनो जाहोन।

गोदोनि बर 'फोरनि गेलेबोनाय खेलाफोरनि फारसे मोजाडै नोजोर होव्ला साननो हागोन बर 'फोरा गोदोनि खेलाफोराव दोहोनिमोन।□

### लिरगिरिनि सिनायथि :

**चाणक्य ब्रह्म :** चाणक्य ब्रह्मआ 1948 मायथाइयाव क'कराझार जिलानि छट' आदाबारि गामियाव जोनोम जायो। बिफानि मुड धनसिं ब्रह्म आरो बिमानि मुड सुकुमि ब्रह्म। बाथाबारि गुदि फरायसालियाव फरायजेनानै उनाव क'कराझार गभरमेन्ट हायार सेकेण्डारि स्कुलनिफ्राय मेट्रिक आरो हायार सेकेण्डारिखौबो फास खालामो। बेनि उनाव बिथाडा क'कराझार कलेजनिफ्राय बि.ए. आरो गुवाहाटी मुलुगसोंसालिनिफ्राय एम.ए. खौबो फास खालामो। बिथाडा हारिमुयारि बिथिंनि गोबां रायथाइफोर लिरना गुबुन गुबुन लाइसिफोरनि गेजेरजों फोसावबाय आरो बर'

भाषा शिक्षा मुंनि बिजाबबो लिरबाय । बर' रावनि सावथुन दिहुननायावबो बिथानि गोबां बिहोमा दं । बिथाड क'कराझार DIET नि गोरायुं जानानै आजिरा लायो । 2012 मायथाइनि 31 अक्ट'बर खालि चीन हादोरनि बेइजिंआव रुंसारि जायो ।

### सोदोबथि :

आदबै - खायदायै, खान्थियै

दैबोनाय - लाबोनाय, सालायबोनाय

दुगानायजों - गोगानायजों

खहाब गोनां - खुसि मोननाय, थावनाय मोननाय

जोनोम आखु - जोनोमावनो मोननाय आखु

आबेग - गोसोयाव नांनाय

मैखोम - देरसिन लाउसिन

जनजीवन - मानसि जिउ

मारिव - दैनि खेला

दहब - सिनि थफ्ला जुनानै खुबैहरना गेलेनाय

दम - हां

फाख'नाव- गिदिंखनना थानाय

गोहोम - साग्लोबसारनाय

थागिरि - थाग्रा

मारसियेल आर्ट - दावहानि बादि गेलेनाय जेरै - केरेट, कुंफु

थफात - फाराग

सामाजिक - समाजारि

उनदिन्थि - दिन्थि महरै

रोंसारनाय - गियान

देदगा - देरहासार जा, गोगगानाय

रेदे गोनां - उन्दै नाथाय गोरा, फिसायैनो गोरा

सोखो माखो - रंगिना संगिना, गोजों, जोंब्लाउनाय

अनसायजानाय - नाजाव जानाय

बादि - बादायलायनाय

### सोंथि :

1. बर'फोरनि आंगो खेलाफोर आरो बैफोरनि जोनोम समनि सोमोन्दै मोनथिनाया मानो गोब्राब ?
2. सुबुड खेलाफोरखौ मानो गेलेयो ?
3. गेलेनायजों मानसिनि जोनोम आखुहा माबादि सोमोन्दो दं ?
4. गेलेनायफोरा समाज लायै लायै मानो जुदा जायो ?
5. बर'फोरनि गाव आदबजों गेलेनाय खेलाफोरनि मा फोरमान दं ?
6. बर'फोरनि गाव आदबजों गेलेनाय बर' खेलाफोरनि मुंफोरखौ लिर ।
7. बर'फोरनि आंगो खेलाफोरखौ मा मा बाहागोयाव राननो हायो ?
8. हौवा आरो हिन्जावफोरनि गेलेनाय बर' खेलाफोरखौ फाराग खालामना दिन्थि । हिन्जावफोरनि गुबै खेलाफोरा मा मा ?
9. खेलाफोरा माबोरै गुबुन गुबुन समाजनि गेजेराव सोलाय सल' जानानै गोरोबलायो ?
10. बर'फोरनि मा मा खेलाया भारतनि खेलाफोरजों गोरोबो ?
11. बर'फोरनि मा मा गेलेनाया सिना मंगलियाफोरनिफ्राय फैनाय होननानै बुंजायो । महिनी महन ब्रह्मआ बेनि सोमोन्दै मा बुंदों ?
12. बर'फोरनि खेलानि गोहोमा गुबुन खाथि खाला समाजनि सायाव माबादियै गोलैहैदों होनना बुंनो हायो लिर ।
13. बर'फोरनि गेलेनाया आह'मफोरनि समाजाव गोलैहैदों होनना मा मा फोरमान होनो हायो ?
14. बर' खेलानि साननाय राव आरो खन्थाइ मेथाइफोरनि बिदिन्थि हो ।
15. बर'फोरनि गेजेराव गिला गेलेनाय खान्थिया गोदोनिफ्रायनो दंमोन होनना लिरगिरिया मा सल'बाथानि दिन्थि होदों ? सुंद'थै लिर ।
16. गोदोनि बर'फोरनि खेला नायै खेलाफोर गेलेनाय आयदाफोरखौ माबादियै बानायना एबा सायख'ना लादोंमोन माखासे दिन्थि हो ।
17. बर'फोरनि गोदोनि माखासे खेलाफोरखौ दा मानो नुनो मोनलिया होनना बुंदो ? बेनि गुबै जाहोनफोरा मा मा ?

### लिरसुंथाइ लिर :

आमै मै, आमोल दिमोल एबा मारिव, सल गेलेनाय, बादुवा गेलेनाय, गर गेलेनाय, गिला साननाय, आसिनि बिसिनि, हावै गुदु, आदि दिगा, खिखर गेलेनाय, आस्रम गेलेनाय ।

## फरायसानि मावनो गोनां आरो सोलोंथाइ

- कृष्णाकान्त सन्दिक्के  
रावसोलायदों : सुजु आफाद

थानाय बोसोर 10-12 नि गेजेराव भारतबर्षआव बायदि सोमावसारनाय आरो सोलाय-सोल 'नि दोहौ, मानसिनि गोसोआव गोदान साननाय आरो गोदान लुबैनाय हास्थायनाय बेरखांदों। बे समनि गेजेराव नोंथोमोननि नेम-खान्थिफोराव जेबो गोबां सोलाय सल' जादों बेनि सोमोन्दै जेबो गोनो गोथो जानांगौ गैया। नाथाय जायफोर गोदानारि हादराव गुबुनारि सोनाबारि सोदोमस्रि बरायनाय लाबोदों बेफोरनि गेजेराव भारतबर्षआव साननाय हनायनि सोलाय-सोल' जानाया थारै जोबोर लासै लासैसो जादों। बेफोर हादरफोरनि माखासेयाव आरो जेरै - रुच हादर आरो जापानाव साननाय-हनायनि सोलाय - सल'आ गुबुनफोरनिखुइ गोख्रैसिनै जादों। बेनि जाहोनफोरा गोबां। नाथाय मोनसे गाहाइ जाहोना जादोंदि जायफोर हादराव गोदान साननाय हनायाव हेंथा नुजाथि फैयोब्ला बेनि समान एबा बांसिन साननाय-हनायनि फिन हेंथा बेरखां होयो बेफोर हादराव सोलाय-सल'आ गोख्रै जादों आरो गोबां मोजां फिथाइ मोनदों।

दिनै फरायसा समाजनि सिगाडव गले गले बे खोथाखौ बुंनयनि जाहोना बेनोदि साननाय-हनायनि जि हेंथा आरो फिन हेंथानि खोथा बुंनय जादों बेनि गिबि खौरां जिलिरखौ गासैबो जायगायाव फरायसा समाजानो मोनग्रोयो आरो फरायसा समाजाव बेयो जिबादि गोहोम खोख्रैयो बेनि सायाव हारियारि थामोनथाइनि फारिजौगानायनि महर आरो आखुआ गोबारै सोनारो। जिगुजौ जौथाइनि गिबि बाहागोनि रुच थुनलाइ सावराययोब्ला फरायसा आरो सोलोंथाइ मोननाय सेंग्राफोरनि गोसोआव सोनाब इउर'पनि सोदोमस्रिया गिबियै जिबादि साननाय हनायनि दोहौ बेरखांदोंमोन बेनि मोन्दांथिखौ मोननो हायो। बै समाव सोनाबारि सोदोमस्रिया रुच हादराव मोनफैनाय बारा गोबाव जायाखैमोन। नाथाय एसेल' समनि गेजेरावनो सोलोंथाइ मोननाय सेंग्राफोरनि गेजेराव बे गोदान सोदोमस्रि आरो साननाय-हनाया जोबोर गोसो गुदुडै सावराय जादोंमोन। जार्मान दार्शनिक हेगेलनि हारि आरो हादरनि सोमोन्दै होनाय 'मत'फोरखौ सोलोंथाइ मोननाय सेंग्राफोरा जिबादि गोसो

गुदुडै सावरायदोंमोन बेखौ मुंदांखा लिरगिरि टुर्गेनिभा फोरमायलांदों। सोनाबारि सोदोमस्रि आरो रुच हादरनि गावसोरनि 'स्लाभ' सोदोमस्रिनि गुणफोरा मा बेफोरनि सोमोन्दै सावरायनाय दान्थे-बिन्दाथेया जागायजेनदोंमोन। बेनि जाहोनाव मानसिफोरा हान्जा मोननै जादोंमोन। हान्जासेया स्लाभ सोदोमस्रिखौ गनायग्रा आरो गुबुन हान्जानि मुड्ड 'जापादनिक' एबा सोनाबारि हान्जा। मोननैबो हान्जाया नाथाय हारिमायारि साननाय हनायजों थुलुंगाखांनयमोन। सोनाब इउर 'पनि सोदोमस्रिखौ मा खान्थिजों बजबोब्ला हारिमायारि मान आरो हारिमायारि जांखिथाइ मोननैबो मोजाडै थागोन बेखौ बिजिरनायानो बिसोरनि थांखिमोन। बे सोमावसारनायनिफ्राय सोनाबारि सोदोमस्रिनि मोगा मोगियाव रुच फरायसा आरो सोलोंथाइ मोननाय सेंग्राफोरनि गेजेराव जा साननाय-हनायनि दोहौ बेरखांदोंमोन बेखौ गोरलैयैनो मिथिनो हायो। साननैसोनि गेजेरावनो रुच हादराव जा बादि सोलाय-सल' आरो सोमावसार'नाय जादों बेनि गुदियावनो दं बे गोसोनि साननाय हनायनि हेंथा-हेंसि। बेयाव बेनि सोमोन्दै गुवारै बुंनो हानाय नड। भारतबर्षआव नाथाय जेब्ला सोनाबारि सोदोमस्रिया हाबफैयो अब्ला बेखौ फ्राय साफ्रोमबोआनो इसोरनि बोर होननायसो गनायनायसै। बेनि बबे आसोल (थार), बबे नकल (नंखाय) बेखौ रावबो बिजिराखैसै। बे थासारिया दाबो एफा-एनैयै सोलिगासिनो दं, नडब्ला हारिमायारि जिउवाव गिदिर-गिदिर सोलाय सल' नुनो मोनगौमोन। गंसे जिलिर, अन्थाइ सायाव गोलैयोब्ला बेयो बै अन्थाइयाव मोनसे दागो थाहोनायै गोलैफिनगोन, नाथाय हाबुआव गोलैब्ला थाबनो हाबना थागोन। सांग्रां गोख्रों-गोसो आरो लोरबां-सांग्रां नडि गोसोनि फारागथिया बेयावनो। सोनबारि साननाय हनाय आरो सानखांनयनि समान सासेबो भारतारिनि साननाय हनायाव फिन हेंथा बेरखाडियाव सोनाबारि सोदोमस्रिया जौनि सायाव गोबां गोहोम खोख्रैदों, नाथाय समाजारि आरो हारिमायारि जिउ जाफुंसारहोनो थाखाय जों बेखौ बजबनानै सिं खालामना लानो हायाखै। जौनि फरायसा समाजनि बिबाना बेनिखायनो जोबोर गिलिर। सानजायारि आरो सोनाबारिनि सौग्राव सौसियाव हारिमायारि आदर्श गायसनोब्ला फरायसा समाजनि गेजेरजोंनो बेनि गिबि बेरखांनया जानांगोन। बेनिखायनो फरायसा जिउवाव उदां साननाय, सायख'नाय गोहो आरो हारिमायारि गाव सानखांथिनि (आत्म ब'ध) गोहोम आरो गाहामथिखौ बयबो गनायो।

गावबा-गावनि मुलाम्फानि सायाव मोनसे हारिमायारि मर्जदा आरो गावारि सन्मान थायो, बिमुंनिखुइ सायाव मोनसे आखुथाइनि देरगानाय आरो गियाननि देरगानाय दं, जानाय-जोमनायनि अनगायैबो माखासे अराय सैथो आरो देहायारि नडि बेसेनथि (Spiritual values) दं। बेफोर आदर्शनि उनसोलोंनायाबो फरायसा

जिउनि थांखि होनना साननाय जायो । फरायसा जिउवावनोदि बेनि साधना खालामनो बयनिखुइबो बांसिन खाबु मोनो बेयाव जेबो गोनो गोथो गैया । समनि फाखनाय आदर्शनि बांसिन बाहागोआनो बोहैलांगारोब्लाबो जा मोनसे मोननै सेरेब आद्रा थागोन बेनो जौनि हारिमायारि जिउ आरो समाजारि जिउखौ गोथार खालामगोनबादि मोनो । बे आदर्शनि थाखायनो गोबाडनो सोलौंथाइ आयदायाव गियाननिखुइ आखल आरो गावारि थामोनथाइ (personality) गोसारनायनि सायावसो बांसिन गोसो होयो । गोजाम मुगानि गोहोम खोख्लैगिरि लेटिन लिरगिरि कुइण्टिलियाना सोलौंथाइयाव गियाननि थुलुंगानिखुइ आखल सोदांनायखौ बांसिन बेसेन गोनां सानदोंमोन । गोदान मुगायाव जार्मानि दार्शनिक निटसेया जेब्ला जार्मानि बिराट सोलौंथाइ-आयदा आरो गियान-साधनाया जेबो खामानिनि नड होनना गोखोडै सोंखारियो अब्ला बियो बे आखल आरो गावारि थामोनथायानो गासैनिबो गुदि होनना फोसावदोंमोन । निटसेनि गासैबो खोथाखौ गनायनानै लानाया गोब्राबब्लाबो आध्यात्मिक गोहो आरो खास्थियारि थुलुंगानि थाखाय बिनि थुलुंगायारि रायथाइफोरा जार्मानि थुनलाइयाव जौगा मासि मोनदों ।

थारै बे गावारि थामोनथाया जौगासाराब्ला जेबो जौगा आदर्शनि फारसे थांखि लानो हाया । जानाय-गाननाय आरो संसार खुंनय-बेफोरनि अनगायै जाय गुबुन माबा साननाय-हनायनि थुलुंगा हमदांनो हाया एबा बेनि गोनांथि दं होनना साना बिहा मोनसे उदां गावारि थामोनथा दं होनना बुंनो हाया । गावारि थामोनथाया गोसाराब्ला आदर्शनिबो गोनांथि गैया । जाय गावनि थासारियाव गोजोन बिनो आदर्शनि जेबो गोनांथि गैया । आदर्शआ मोनसे जेंना गोनां बेसाद । आदर्शआ गोदान गोदान साननाय हनाय आरो सानखांथिनि दाहार बोहै होनानै जेंना-जेंसि गोसो गोजोनि आरो अदेबानि बिग्रायनायबो सोरजियो नाथाय बेयावनो जिउनि जांखिनाय आरो हारिमायारि जिउनि सोमावसारनाया जागायजेनो ।

भारतनि फरायसा समाजनि फारसे नायोब्ला दिनै एरैबादि साननो हायोदि बिसोरनि गेजेराव मोनसे गोदान गावारि मान आरो हारिमायारि मर्यदानि सोमोन्दै सानखांनया जागायदों, माबाफोर नंखायै लाजिनांनयखौ सहाया-होननानै बिसोर गोसो गोरा खालामबाय । आखलनि बोलो आरो स्वार्थ गैयि साननाय थायोब्ला फरायसानि देरहानाया जेब्लाबो समाव जागोन बेयाव जेबो गोनो गोथो थाया ।

आखलनि बोलोजों देहायारि बोलोनि सोमोन्दो दं । बेनि सोमोन्दै जौनि मुलुगसोलौंसालिफोरा गोसो खेलेंसा । जार्मानिनि गंफ्रोमबो मुलुगसोलौंसालियावनो

बायदि कुस्ति, जापानि खमलायनाय सोलौंथाइ, बक्सिं बाग्रायलायनाय बायदिनि खाबु दं । बेनि थाखाय थिखानाय फोरोंगिरि आरो डाक्टर लाखिनाय जायो । थुंग्रि सिबनाया फरासि सोलौंसाफोरनि मोनसे आखुथाइ ।

हाथेर-हाला बाहायनो हानाया इउर 'पीय फरायसानि थाखाय मोनसे फिसा खोथा । जौनि हादराव नाथाय गोनोखोयारि खान्थिजों हान्जा-जथुमना खुंनो हायोब्लाबो देहायारि सोलौंथाइया आबुं जायो होनना गोबां गेदेर-गोलाउ सुबुड सानो । नाथाय जाय देहायारि सोलौंथाइया जौंखौ गावनि आरो हारिमानि रैखाथि होनायाव मदद खालामा, बिदि सोलौंथाइनिफ्राय जोंहा जेबो मुलाम्फा जाया । लावथि सिबनाय, खमलायनाय, थुंग्रि-सिबनाय, हाथियार बाहायनायफोरा, फुट बल एबा टेसिननिखुइबो गोनांसिन । बेफोर सोलौंथाइखौ भारतारि फरायसाया सोलोडेब्ला सोरहा मा खहा जागोन बुजिस' हाया । इउर 'पीयान फरायसानि रुजुनायाव भारतारि फरायसाया दद्र आरो लोरबां । इउर 'पीयान फरायसाया बोलो गोनां, सावस्रि गोनां आरो दावहारु । जारमान फरायसाफोरनि गेजेराव 'बिरबायग्रा दाउ' मुंनि मोनसे सोमावसार सोलिनायनि बाथ्रा गोबाडनो खोनादों । हान्जा-हान्जा फरायसा ज' जानानै जारमानिनि गुबुन गुबुन जायगायाव थाबायना दावबायो । बे सोमावसारनायनि मोनसे हारिमायारि गाहामथि दं । जायफोर फरायसाया दा हाग्रा-बंग्रा थाबायदिना बेरायदों इयुननि दावहायाव दि बिसोर गाहाम थाबायग्रा फायखि जागोन बेहाय साननांगौ गैया । देहायारि जौगाखांहोनायजों लोगोसे हारिमायारि मान आरो आखुथाइनि गोहो सरजाबफाना दं । बे आयदाखौ मुलुग सोलौंसालिया गोजौ सोलौंथाइनि मोनसे गाहाइ बाहागो होनना लानानै नांगौबादि राहा लानांगौ । देहायारि साधनाजों हारिमायारि थामोनथानि खाथि सोमोन्दो गोनां होननानैनो गोजाम ग्रिसनि अलिम्पिक गेलेनायफोरा ग्रिक हारिमायारि जिउनि मोनसे गाहाइ थादेरसा जादोंमोन । अलिम्पिक गेलेनायाव देरहासारनाय जोहोलावफोरनि गोथौ देरहा-मेथाइ सुजुनानै ग्रिक मेथाइ खन्थाइगिरि पिन्दारा मुलुग थुनलाइयाव अराय गोजोर जादों । ग्रिक फावथाइगिरि इउरिपिडिसा देहायारि गोहो आरो आखुथाइयारि गोहोनि सोमोनांथाव गोरोबलायनायखौ गोथार जोहोलाव हिपलिटचनि आखुआव गोजोर लिरबिदांजों बोलोदों । गेदेमा खन्थाइगिरि भारबिनि खन्थाइमा फरायोब्ला मिथिगोन अर्जुना खालि धियानजौल' महादेबखौ गोजोन होनो हायाखै गिबियाव आखुथाइनि बोलोजों मुहिग्रा अपसरखाँ आरो उनाव किरात महरनि महादेबखौ देहायारि बोलोजों देरहानानैसो मोदाइखौ गोजोन होदोंमोन । बेनिखायनो खन्थाइगिरिया मोनसे जायगायाव बुंदों दि ध्याननिखुइ अर्जुननि

‘सत्व’ अदेबानि खान्थियारि मान आरो देयाहारि गोहोनि जथाइखौ नुनानैसो महादेबा रंजादोंमोन। बे हारिमायारि जाखांफुनाय सानाव हारिनि फारसे बिदि आदर्शनि बेसेनखौ गोरलैयै बुजिनो हायो।

आथिखाल सोलोंथाइ खान्थिनि सोमोन्दै फंनैसो बाथ्रा बुडेब्ला गात्रि जानाय नड। इउर ‘पीयान आरो भारतारि सोलोंथाइनि बयनिखुइबो गिदिर फारागथिया जादों फरायसालिनि सोलोंथाइयाव। सोनाब इउर ‘पनि फरायसालियाव बि.ए. निखुइ जौसिन रोखोमनि सोलोंथाइ होनाय जायो। गोजौ सोलोंथाइनि थाखाय मुलुग सोलोंसालिसिम सौहैयाब्लाबो जायो। इंलेण्डनि फरायसालिफोराव सेक्सपीयारनि सोमोन्दै गाहामै फोरोंनाय जायो। जारिभिनाव मुलुग सोलोंसालिनि जौसिन दिग्रि आन्जादनि थाखाय फरायनाय गोबां बिजाब फरायसालिनि फरायसाया फरायनांगौ। ग्रिक आरो लेटिननि फरायसाया जौनि बि.ए. नि संस्कृतनिखुइबो बांसिन। गोनोखोखौ खान्थि बादियै फरायनो नांगौ। जारमानाव गोजाम, गोदान आरो गोनोखोयारि बे मोनथाम सोलोंथाइनि जिखिजाया मोनसेखौ गाहाइ महरै लानानै गुबुन गुबुन गोसोनि फरायसानि थाखाय गुबुन गुबुन रोखोमनि फरायसालि गायसंनाय जादों। बेवहाय फरायसालियारि सोलोंथाइनि होंगो-दोंगो बांसिनबाव। नाथाय गावनि रावावनो गासिबो फरायनांगौ होनना इउर ‘पीयान फरायसाया जौनिखुइ बांसिन खाबु मोनो। नाथाय इउर ‘पाव फरायसालिनि सोलोंथाइनि गुबै मोन्थोरानो गुबुन। जौनि कलेजफोरनि मोननैसो थाखो लांना फरायसालियाव जाबसिन हैब्लानो जौ बिब्दि सोलोंथाइ मोनगोन होनना मिजिंथिनो हाया। इउर ‘पनि मुलुग सोलोंसालिनि सोलोंथाइ नडब्लाबो जाहाथे फरायसालिनि सोलोंथाइजौनो सुबुड गोरों जानो हायो बेनि सायाव नोजोरहोनाय फरायसालिनि सोलोंथाइनि राहा लानाय जादों। फारसेथिं मुलुग सोलोंसालिनि दिग्रिनि थाखाय जौनो बेनिखुइदि बांसिन फोरोंनाय जायो बिदि नड। नाथाय फरायसालियावनो राखानायखाय बैनि फरायसाया मुलुग सोलोंसालिनि सोलोंथाइखौ जौनिखुइ मोजांसिनै बुथुमनो हायो। गोबांनि थाखाय मुलुग सोलोंसालिनि सोलोंथाइया फरायसालिनि सोलोंथाइनि मोनसे साबसिन रोखोमनि सर’ खालामफिननाय आरो सोदांफिननायबादिनो जायो। सोरबाबा आरोबाव गोजौ थाखोनि गियान साधना आरो बिजिरसंनाय खान्थि सोलोंनो खाबु मोनो।

बेफोर जाहोननि थाखायनो सरासनम्रा गोदोनि भारतारि फरायसायाबो इउर ‘पनि मुलुग सोलोंसालिनि जौसिन बिमुं लाना फैनो गोब्राब मोना। इउर ‘पनि दिग्रि आनजादफोरा जौनि बेनिखुइ गोब्राब नड, नाथाय आनजादा गोरा एबा गोरलैजौ सोलोंथाइनि जाफुंसारनाया सोमोन्दो गैया। इउर ‘पाव फारसेथिं गोजौ सोलोंथाइया

फरायसालिनि गेहेन आरो गोखों बिथानि सायाव गायसंनाय आरो फारसेथिं मोनसे खम अन्जिमानि सायख ‘जानाय सुबुं हान्जाया गियान बुथुमनाय आरो बिजिरसंनो जुरियो, दिग्रि लाखांनायनि उनाव, बे मोनसे जिउनां साधना जानानै थायो। बिदियाव गेजेरावनो जुरिनानै बिनि सोलोंथाइनि मोनसे बाहागो सोलोंना फैनाया जेबो गोब्राब नड। जौनि हारिमा दानायनि थाखाय आगजु नागिरोब्ला सरासनम्रा सोलोंथाइनि बेलायाव इउर ‘पीय सोलोंथाइनि बे बिथानि फारसे बांसिन गोसो होनाया गाहाम। गोजौ थाखोनि गियान बिजिरसंनाया गासै हादरनि मोजोमसे सुबुंनि हाबा। नांथाबनाय, मेलेम आरो गोसोनि गोदानथि थायोब्ला बेनि लामाया गाव गावनो गेवलाडे होनना सानजायो। नाथाय सरासनम्रा सोलोंथाइनि बिथाखौ गावनो दानानै लाया लासै गुबुना दाहोनायनिफ्राय उलथा फिथाइसो जायो।

इउर ‘पनि फरायसालिनि सोलोंथाइया गोजौ सिरिनिब्लाबो जायफोर मुलुग सोलोंसालियाव थानो हाया बिसोरनि थाखाय मुलुग सोलोंसालिया मोनसे गोदान रोखोमनि सोलोंथाइनि राहा खालामदों। बेखौनो मुलुग सोलोंसालिनि बाइजोयारि सोलोंथाइ (External Studies) बुंनाय जायो। इंलेण्डनि बांसिन मुलुग सोलोंसालियानो खाथिनि जायगाफोराव सोलोंथाइयारि क्लास (Tutorial Studies) खुडे। जायफोरा फरायसालि नागारना खामानियाव हाबदों एबा माबा फालांगि मावबाय आरो जायनो दिग्रि लानांगौनि गोनांथि गैया बिसोरनि थाखाय बे थाखोखौ बेखेवनाय जादों। गोरलै गेबें रावजों थुनलाइ, बिगियान, सानथौ बादि गुबुन गुबुन आयदानि सायाव गोजौ सोलोंथाइ होनाय जायो। मुलुग सोलोंसालियाव फोरोंनाय आयदाफोरखौ जिरायनाय समाव सरासनम्रा सुबुड बुजिनो हानायबादि नाडि बाहागोखौ गारना फोरोंनाय जायो। आथिखालाव बेफोर थाखोजौ गोरोबनाय फरा बिजाब ओंखारनो हमदों। फैगो जि-जिनै बोसोरनि गेजेराव बे रोखोमनि सोलोंथाइनि हाबाफारिया आरोबाव बांवावगोन होनना खोनानो मोनदों। पेरिस मुलुग सोलोंसालियाव फरायसानो होनाय बबेबा बिबुंथियाव सरासनम्रा सुबुंखौ औरैनो हाबनो होनाय जायो। फरासि थुनलाइनि सोमोन्दै मोजां बिबुंथि थायोब्ला फरायसाजौ लोगोसे गुबुन सुबुडबो थाखोआव फैयो। बाडाइ रां खरसा खालामनानै इउर ‘पनि बांसिन मुलुग सोलोंसालियावनो फरायसा जायालासिनो गोबां बिबुंथि खोनासंनो हायो। बैयाव गोबाडनो गोजौ सोलोंथाइनि गोनांथिखौ मिथिनो मोनो। नाथाय बिमुं लुबैया। बेफोर बाथ्रानि गुदियाव मोनसे हारिमायारि आदर्शनि थुलुंगा नुनो मोनो। संसार जानाय मानसिफोरनो आरो सोलोंथाइखौ मानोबाव बे बाथ्राखौ जौनि हादरनि

गोबाडनो बुजिनो गोब्राब मोनगोन । नाथाय आं सिगाडवनो बुंदोंमोन दि आदर्शआ मोनसे जेंना गोनां बेसाद । मेगनजों नुयि आरो आखाइनि मुथाजों हमथुमनो हायि गोबां बेसादनि थाखाय बेयो गोसो दुंहोयो ।

समाजारि सोलोंथाइ खान्थिनि बाश्रा एंगारोब्लाबो फरायसा समाव बयबो एखुथा सोलोंथाइजों मोनसे गुबै रोदा संलानाया गाहाम । आथिखालाव भारतारि फरायसानि थाखाय सोनाबनि साधना आरो भारतनि साधना मोननैनबो मोनसे मिथिनाय गियान मोननाया गोनां जाबाय । समाजारि सोलोंथाइ खान्थिनिफ्राय बे आयदायाव जुनिया मदद मोननाय नड । गाव-गावनो जा हायो गियान बुथुमनो नांगोन । गोजाम आरो गोदान भारतनि सोदोमस्रि, दोहोराम, थुनलाइ आरो राडरि जिउनि मोनसे सिनायथि मोनाब्ला भारतारि गोसोनि गोख्रोंथि एबा लोरबांधिया बबेयाव जेबो हमदांनो हानाय नड । ओरैनोब्ला गावनि हादरनि गोदोनि आरो दानि सोमोन्दै सरासनस्रा बाश्राफोरखौ साफ्रोमबो गोरोंगोरा सुबुड मिथिनाया गाहाम । नालन्दा, तक्षशीला एबा अजन्ताया बबाव बुडोब्ला गोबां गोरों भारतारिया गोनेगोथोआव गोगलैगोन । सोनाब सोदोमस्रि आरो साधनानि सोमोन्दैबो जेबो मावफुं गियान आथिखालनि सोलोंथाइ राहानिफ्राय मोननो थाड । राणी एलिजाबेथनि जिउखौरानिखुइ मुसलिन एबा गेरिबल्डिनि जिउखौराड थारै बांसिन गोनां । नैथि थाखोनि इराज लिरगिरिनि खन्थाइ एबा न'खरनि लाइजाम-आरिनिखुइ टलष्टय एबा डष्टयेभस्किनि गांसे राव सोलायनाय सल'मानिफ्राय इउर'पीयान गोसोनि खारथाइखौ बांसिन गाहामै बुजिनो हायो । बिदि बिदिन्थिनि अन्जिमा गैया । सोनाबनि सोदोमस्रिनि राडरि, समाजारि आरो बिगियानारि फोरमायथिनि सरासनस्रा गियाना भारतारिनि थाखाय जोबोरैनो गोनां । इयुननि सोदोमस्रियादि भारतारि सोदोमस्रि आरो सोनाबनि सोदोमस्रिनि गोरोबलायनाय थादेरसाजों दाजागोन बेनि बागै जेबो साननांगौ गैया । बे मोननै सोदोमस्रिनि आखुथाइखौ फरायसाया गाव गावनि सानस्रि आरो फरायसनायनि गेजरजों बुजिनो नाजानाया गाहाम ।

गासैबो रोखोमनि गियान बुथुमना लानायाबो फरायसानि मोनसे गाहाइ मावनां बिबान । बयजोंबो मोजां मोनजानायनि थाखाय भारता गोदो-गोदायनिफ्रायनो मुंदांखा जाबोदों । आथिखालावबो राजखान्थियारि गोदान मुगा जुरिनाय लोगो लोगोनो गियान-बिगियाननि आयदायावबो भारतारि गोसोनि मोनसे गोदान मावथाइ गोहो नुजादों । बेनि नेरसोन आसामाव नडब्लाबो भारतनि गुबुन गुबुन राइजोयाव गोबां बिबाडैनुजादों । बे गोदान गियान-गोहोजों सेंग्रा माखासेया सोमोन्दो लानाया गोनां ।

राजखान्थियारि आयदायाव दावगाब्लाबो गियान-बिगियाननि आयदायाव उन जाना थायोब्ला भारतनि गुबुन गुबुन राइजोजों लोगोसे आसामा समान मासि मोननाया गोब्राब जागोन ।

आबहावानि थासारिनिफ्राय फरायसा समाजा सोमोन्दो गारना थानो हाया । हादराव जायफोर राजखान्थियारि आरो समाजारि सोमावसारनाय जादों बेनिफ्राय कलेजनि फरायसाखौ जानगारहोना दोननो हाया । राजखान्थियारि सोमावसारनाय जाफुंनायनि गुथालाव फरायसाया आबुडै बाहागो लानानै नाथाय फरायनो हाया, नाथाय आथिखालाव भारतनि गोबां जायगायाव फरायसाखौ सोमावसारनायनि एसे सोमोन्दोआव फैनाय नुयोब्लानो बिफानारिया बागदावखाडे आरो मान सिफायनाय रादायजों फरायसाखौ गंग्लाय होनो नागिरो । बेनि जाहोनाव मोननैबो हान्जानि गेजेराव सौदावलायनाय जाखागोन । आबुथिनि मुडव माहारिनि मान आरो गावनि सन्मानखौ नागारनाया गाहाम नड । बे मोननै बेसादनि गुबुन जायोब्ला जेबो गोजौ आदर्शजों थुलुंगाखाडब्ला फरायसा-जिउवा गोगो आरो गुवार जानो हाया । फरायसा जिउनिफ्रायनो गोसोआव बैनांग्रानि सानस्रि फिसिना लानो हमोब्ला भारतारि माहारिनि इयुना मा जागोन बेखौ सानस'नोबो हाया । राजखान्थियारि बाश्राखौ नागारोब्ला समाजारि बिथिडव फरायसानि मावनो गोनांनि बागै रावहाबो गोरोबलायि जानो हाया । जोंनि समाजनि आथिखाल दाथाइया गोदान हादरनि साबजाथाव नड । गोदोनि भारताव हादरनि खाथाय-बान्दोनिखुइ समाजनि खाथाय-बान्दोआ गोख्रोंसिनमोन । बैनि थाखायनो हादरारि जांख्रिथाइनि समावनो भारतारि समाजा जांख्रिथाइनिफ्राय जानगाराव थाबाय । नाथाय, गुबुन फारसे मुंख'थिनाय खामानि राननायनि जाहोनाव भारतनि सुबुंफोरा गावबा-गाव हारि एबा सुबुं-फोलेरनि मावनो गोनांखौसो मिथिनायसै । माहारियारि मावनो गोनां आरो हादरारि मावनो गोनाड मा बेनि जेबो नायबिजिराखैसै । बेनि बिस गोनां फिथाइखौ भारतनि राजखान्थियारि जारिमिनाव नुनो मोनो । गेजेर मुगायाव बेरखांनाय इउर'पनि समाजारि जारिमिनखौ सावरायोब्ला नुनो मोनो-समाजनि गुबुन गुबुन बेफारफालांगियारि सुबुंफोरा गावबा-गावनि आफाद (Guild) दानानै साफ्रोमबो गाव गोहो-बोलोजों गावनि आंगोथिखौ रैखा खालामदोंमोन, हादरनि आंगोथिनिखुइ गाव आफादनि आंगोथिखौ देरसिन होनना साननायमोन । गेजेर मुगानि मुलुग सोलोंसालिफोरनि जारिमिनखौ सावरायोब्लाबो नुगोन गिबियावनो इटालीयाव फरायसाफोरा गाव आंगोथिनि थाखाय मोनसे गिदिर हान्जा दाना गावसोरनि साननाय बादि फोरोंगिरि थिसनना लादोंमोन । खायाफा जायगायाव आंगोथिखौ रैखा खालामफिननो थाखायनो फरायसा आफादजों



नोगोरारिफोरा गिलु-बालु बुज्जायनाय नुनो मोनो। थारैनो गाव आफादनि आंगोथिखौ गावनो रैखा खालामाब्ला बै समाव गुबुन राहा गैयामोन आरो आंगोथिनि सायावदि मोनफा माहारियारि एबा हादरारि आंगोथि दड', बेनि फारसे साननायाबो गेवसाराखैमोन। नाथाय गावबा-गाव आफादनि सानखांथिखौ बारनानैसो गोदान खौसेथियारि हादर (Monistic State) गोसारनो हादों। बेनि थाखायनो दिनैनि भारतावबो खौसे हादरनि बाहागो जाना मोनसे गिदिर हारि दानांगौब्ला हारि आरो हारिथि (सम्प्रदाय)नि राननायखौ जानगार होनांगोन। समाजारि बिथिडव गाज्रि साननायनिफ्राय गोजान जाना थानो होनोब्ला फरायसा समाजा गोबां खालामनो हायो। □

### लिरगिरिनि सिनायथि :

**कृष्णाकान्त सन्दिक्कै :** सानजायारि सोल्लोथाइनि सासे मुंदांखा पण्डित महरै मान आरो सन्मान मोननो हानाय कृष्णाकान्त सन्दिक्कैनि जोनोमा 1889 इं मायथाइनि 10 जुलाइयाव ज'रहाट मुंनि दखरसे जायगायाव जायो। दानि जोहोलाव राधानाथ सन्दिक्कै आरो नारायणी सन्दिक्कैनि फिसाज्जा कृष्णाकान्त सन्दिक्कैया 1913 इं मायथाइयाव मेट्रिक आनजादखौ उथ्रिनानै 1915 इं मायथाइयाव गुवाहाटी कटन कलेजनिफ्राय आइ ए आनजादाव बारग'नायनि उनाव 1917 इं मायथाइयाव कलिकतानि संस्कृत कलेजनिफ्राय संस्कृताव अनार्च लानानै बि.ए. आनजादखौ मोजाडैनो बारग'यो। 1919 इं मायथाइयाव कलिकता मुलुग सोल्लोसालिनिफ्राय संस्कृत (बैदिक बाहागो) एम.ए. आनजादाव सेथि थाखो मोननानै बिलातसिम थाडो। अक्सफर्ड मुलुग सोल्लोसालिनिफ्राय 1923 इं मायथाइयाव "मदार्ण हिष्ट्री"याव एम ए दिग्री लाना पेरिछाव बोसोरनै सम गुबुन गुबुन राव सोल्लोनायनि उनाव 1927 इं मायथाइयाव जोनोमा हादरसिम गिदिंबोफिननायनि उन बोसोराव हेमलताखौ हाबा खालामो। 1929 इं मायथाइनि "असम सात्र सन्मिलन"नि जिब्रैथि ग'लाघाट जथुम्मनि आफादगिरि मासि मोननाय बिथां सन्दिक्कैया 1937 इं मायथाइयाव असम साहित्य सभानि आफादगिरि जायो। 1930 इं मायथाइयाव जगन्नाथ बरुवा कलेजनि गोरारुं मासि लानाय बिथां सन्दिक्कैया 1948 इं मायथाइयाव गुवाहाटी मुलुग सोल्लोसालिनि गायसनगिबि उपाचार्य (Vice-chancellor) महरै मासि नाजावनानै मुलुग सोल्लोसालिनि जौगासारनायनि बागै मख'जाथाव बिहोमा होयो। 1951 इं

मायथाइयाव "अखिल भारतीय प्राच्य बिद्या सन्मिलन"नि लौकिक संस्कृत बाहागोनि आफादगिरि जानाय मानगोनां सन्दिक्कैया 1955 इं मायथाइयाव भारत सरकारनिफ्राय "पद्मश्री" आरो 1978 इं मायथाइयाव असम साहित्य सभानि "सदस्य महीयान" मुं बान्था मोननानै 1982 इं मायथाइनि 7 जुन अक्ट'खालि बे संसारनिफ्राय अरायनि थाखाय आनज्राय लाडो। 1919 इं मायथाइयावनो "प्रबन्धावली" सुजुनाय कृष्णाकान्त सन्दिक्कैया असमीया रावाव मोननैसो गोजौसारिनि रायथाइ लिरनायनि अनगायै इंराजियाव लिरो-जैरै - "Naishadha Charitra of Harsa" (1934), "Yasastilaka and Indian Culture" (1949), "Setubandha" (1976)। बे बिजाबफोरानो गुबुन गुबुन हादरनि पण्डितफोरजों गनायथि मोननायनि लोगोसे अनसाय जानो हादों।

### सुंद' फोरमायथि :

**(क) हेगेल :** जार्माननि मुंदांखा सानथौगिरि (1770 इं - 1831 इं)। बिथांनि जोनोमा जायो प्हाटगार्टाव। टिउरिनगेन फरायसालिनि बिथाडा सासे दोहोरुम बिगियाननि फरायसामोन आरो 1793 इं मायथाइयाव पि, एडच, डि. दिग्री मोननो होदोंमोन। बिथाडा हाइडेनबर्ग आरो बार्लिन मुलुग सोल्लोसालिनि फोरोंगिरि जानानै "Phaenomenology of the Spirit", "Logic", "Philosophy of Right" बायदि बेसेन गोनां बिजाब रनसायदोंमोन। बिथांनि सानथौवारि बुरखांथाइया जिगु जौथाइनि जार्मान सानथाइयाव गोबरैनो गोहोम खोलैदोंमोन।

**(ख) टुर्गेनिभ :** मुंदांखा रुछ लिरगिरि बिथांनि आबुं मुड आइभान चार्भेन्टिछ टुर्गेनिभ। ग'ग'ल आरो टलष्टयनि लोगो टुर्गेनिभा आबादारिफोरा इनाय-अनागारि खालामजानायनि सल'खौ फोरमायना गोबां सल'मा रनसायदोंमोन। "Nihalist" बाथ्रानि दिहुनगिरिया टुर्गेनिभानो। बिथांनि गांनैसो मुंदांखा सल'माफोरा जाबाय - "A Nest of Gentle folk", "Father and sons", "Smoke", "Virgin Soil" बायदि बायदि। मुंदांखा जार्मान सानथौगिरि हेगेलनि हारि आरो हादरनि सोमोन्दो गोनां फोरमायथाइफोरखौ (मतबादफोरखौ) गोदान जोलैया माबादि गोसो थुलुंगानायजों सावरायदोंमोन, बेखौ टुर्गेनिभा गावनि लिरबिदाडव जायागा होनाया मख'जाथाव।

**(ग) कुइन्टिलियान :** गोजाम मुगानि गोहोम खोलैनो हानाय सासे मख'जाथाव लेटिन लिरगिरि। बिथाडा सोल्लोथाइयाव गियाननि थुलुंगानिखुइ आखुथाइनि फारसे गोनांथि होना सिबिनायखौ बेसेन गोनांसिन होनना साननायमोन।

**(घ) नितचे :** मुंदांखा जार्मान सानथौगिरि (1844 इं - 1900 इं) इंराजियाव राव

सोलायनाय बिथांनि मुंदांखा बिजाबफोरा जाबाय “Thus Spake Zarathustra”, “Beyond Good and Evil” बायदि बायदि ।

( **ड** ) **पिण्डार**: ( ख्रि: गि: 518-438 ) ग्रीचनि माहारियारि गेलेनाय अलिन्यकनि देरहानाय बीर जोहोलावफोरनि मेहेर गोनां देरहासार मेथाइ सुजुनानै बान्था मोननो हानाय पिण्डारनि “Epinicia” एबा Victory odes मुंनि बिजाबखौल’ आथिखालाव मोननो हायो । दिनैनि सानाव पिण्डारनि लिरनाया अनसायजायाखैब्लाबो, बिथांनि मेथाइनि आयदाया दिनैनि समाव सोलियाब्लाबो इंलेण्डनि ड्राइडेन, नेग्र बायदि खन्थाइगिरिफोरा बिथांनि ( पिण्डारनि ) खन्थाइ लिरनाय खान्थिखौ बरायनाया गोसोखांथि गोनां ।

( **च** ) **इउरिपिडिस**: ( ख्रि: गि: 480-407 ) गोजाम मुगायाव ग्रीचनि बयनिखुइबो जौसिन थाखोनि दुखुजों जोबहैनाय थुनफावथिना ( ट्रेजेदि ड्रामा ) रनसायगिरि । बिथाड गासै गां गुजि थुनफावथिना रनसायना दासिम मुंदांखा जानानै दड’ । बैफोरनि मादाव- “मिडिया” (Media), “आलचेष्टिछ” (Alcestis), “इलेक्ट्रा” (Electra), “हिपलिट्याच” (Hippolytus) बायदिफोरा मुंदांखा ।

( **छ** ) **भारबि**: कालिदासनि उन मुगानि मुंदांखा खन्थाइगिरि भारबिखौ नैथि पुलकेशीनि आइहोल अभिलेखाव ( मख थि बिजाबाव ) कालिदासनि बादि मान गोनां खन्थाइगिरि महरै फोरमायदों । “अवन्ती सुन्दरी कथा” नि बादिब्ला- भारबिनि गुबुन मुडा-दाम’दर । कौशिक ग’त्रीय नारायण स्वामीया बिथांनि बिफा । जिदाइनथि खोन्दो ( सर्ग ) गोनां “किराटार्जुनीय”-आ भारबिनि गांसे बेसेन गोनां खन्थाइ बिजाब । बेनि गुदिया महाभारतनि “बन पर्व” । दुगाथाव ओंथि बाहायनायाव भारबिजों रावबो रुजुजाया । सानथाइ आरो रावनि गोमोथाव फोरमायथिनाया भारबिनि खन्थाइखौ जाबादि साबसिन खन्थाइयारि महर होदों, बेखौ गुबुननियाव नुनो मोना ।

( **ज** ) **अर्जुन**: थामथि पाण्डव । इन्द्रनि बीर्यजों कुन्तीनि गोर्बोआव अर्जुना जोनोम जादोंब्लाबो मानसिफोरजों मिथिजानाय एबा समाजारि बिफाया जादों - पाण्डु । बोर्ला-थिर गावनायाव जोबोर आखा-फाखा अर्जुना द्र’णाचार्यनि साबसिन सोलौंसामोन । कुरुक्षेत्र दावहायाव बिथांजों लोगोसे र’थाव श्रीकृष्णआ लोगो महरै दंफायोमोन । बनबासनि समाव बिथाड इन्द्रनील हाजोसिम थानानै महादेवखौ सिबिना बिथांनिफ्राय पशुपात अस्त्र मोननो हादोंमोन । जुधिष्ठिरनि अश्वमेध जज्ञ नि गराइजों थानाय गेदेमा जोहोलाव अर्जुना फिसाज्ला बब्रुबाहननि आखाइयाव जेननो गोनां जायो ।

( **झ** ) **राणी एलिजाबेथ ( 1533 इं-1603 इं )**: इंलेण्डनि राणी । बिथाड 25 बोसोर

बैसोआव थामहिनबा 1558 इं मायथाइयाव राजउलाफादनि मासि नाजावनानै गासै 45 बोसोर राइजो खुंदोंमोन । बिथांनि खुंथायाव प्रोटेष्टान्ट दोहोरामानो इंलेण्डनि गाहाइ दोहोराम महरै गनायथि मोनो । स्पेनारि आइजो दावहागिरि “आर्माडा” नि जेननाय, स्कटलेण्डनि राणी फ्लुवार्टनि जिउ फोजोबनाय, सेक्सपीयेर बादि मुंदांखा खन्थाइ-फावथाइगिरिफोरनि जौगासारनाया गेदेमा राणीनि खुंथाइ समनि मुख’जाथाव जाब्रबथाइ । इंराजी 1599 मायथाइयाव इष्ट इण्डिया क’म्पनीया गेदेमा राणीनिफ्राय बिथोन लाना गिबि गिबियावनो भारतबर्षसिम फालांगि खालामनो थाखाय फैयो ।

( **ञ** ) **मुचलिनी**: मुचलिनी आबुं मुडा चिनर बेनिटो मुचलिनी (1833 इं-1945 इं) । इटालीनि डिक्टेटर आरो फेचिष्ट हान्जानि दैदेनगिरि । भेरियानि प्रिदान्पिअ’ गामियाव जोनोम मोननाय मुचलिनीनि बिफा आलेचान्द्रीया खामारमोन ( क’मार ) । फरायसालिनि सोलौंथाइखौ फोजोबनायनि उनाव बिथाड फायेनजार कलेजाव मुंथिसनो आरो बोसोरनैसो फरायनानै गामिसिम गिदिंबोफिनना फोरोंगिरि खामानि सायख’ना लाना न’निफ्राय ओंखारलाडे । फोरोंगिरि खामानि मावनाय समाव बिथाड बिबानगिरिजों नांज्लायो आरो साख्रि गारनांगौ जायो । चुइजारलेण्डाव बोसोरनैसो गैजारोडिफोरजों जुजिनानै 1908 इं मायथाइयाव बिथाड “II Papolo” मुंनि गांसे रादाब बिलाइजों सोमोनदो लाखियो । बै समाव बिथाड अष्ट्रियायाव दंमोन । बैयाव बिथांखौ खानानै हादरनिफ्राय होखार हरनायनि साजा होयो । 1910 इं मायथाइयाव

बिथाड “Lalotta di classi” मुंनि गांसो खौरां लाइसि दिहुनना अनसायनाय मोननो हायो । 1917 इं मायथाइयाव बिथाड फेचिष्ट हान्जा दाना 1922 इं मायथाइयाव बेनि गाहाइ मन्थ्रि जाहैयो । बिथांनि एगथुनायावनो इटालीया अबिचिनियाखौ आखाइ मुथियाव लाबोनो हानायनि अनगायै 1940 इं मायथाइयाव जार्मानिजों लोगो जानानै ब्रिटेइन आरो फ्रान्सनि हेंथायै दावहा फोसावो । उनाव बिथाड जथाइ गोहोनि सेराव जेननांगौ जायो । लोगो लोगो बिथाड खुंथाइनिफ्राय बोख्लाय जायो आरो जोबथेसालियाव थानाडे । उनाव जार्मानिनि हेफाजाबाव बिथाड उदां जाना इटालीनि खुंथाइ मासिखौ नाजावना लायोब्लाबो नै बोसोरनि उनाव सुथुरनि आखाइयाव जिउ नागारनांगौ जायो ।

( **ट** ) **गेरिबल्डि ( 1807 इं - 1882 इं )**: इटालीनि मुंदांखा रैखाथि हान्जानि सासे सुबुं ( सोद्रोमा ) आरो हादर अनफावरि । सरकारनि हेंथायै दावहा नानायनि अजदाव बिथांखौ जिउ फोजोबनायनि साजा होनायनि थाखाय बिथाड खोला आमेरिकासिम

खारखोमा लाडे। 1948 ईं मायथाइयाव जोनोम हादरसिम गिदिंबोफिना 1859 ईं मायथाइयाव इटालीनि दावहायाव बाहागो लाफैयो। अष्ट्रियानफोरनि हेंथायै जुजिनानै बिथाड देरहायो आरो मोनसे गिदिर रैखाथि हान्जानि गाहाइ दैदेनगिरि जाना इटालीनि उदांसिखौ लाबोफिनो। बिथानि हादर सिबियारि हान्जानि मुड “Red Shirt” मोन।

( ठ ) **टलष्टयः** काउन्ट लिअ टलष्टया (1828 ईं - 1910 ईं) रुछियानि मुंदांखा थुनलाइगिरिमोन। काछान मुलुग सोल्लोसालियाव बोसोरनैसो फरायनायनि उनाव बिथाड क्रिमियार दावहासिम थाडे आरो दावहानि गिनाय सोमजि होनाया बिथांखौ गुबुननि साननो रोडिखालामो। गोबां दोहोन-दौलदनि बिगोमा टलष्टया सुबुं मोजां मोननाय आरो ईसोर फोथायनायखौ गुबै दोहोन महरै लाना थुनलाइ सिबिनायाव नांथाबो। बिथानि मुंदांखा बिजाबफोरनि मादाव - “War and Peace”, Anna Karenina”, “The End of the Age”, “The Power of Darkness” बायदिफोरखौ मख 'जायो।

( ड ) **डष्टयेभस्कि ( 1821 ईं - 1881 ईं )**: मुंदांखा रुछ सल 'मागिरि। मस्क 'आव जोनोम मोननाय डष्टयेभस्किया गिबियावनो छेन्ट पिटाछ बागनि इन्जिनियारि फरायसालियाव फरायसा महरै मुं थिसनो। राजखान्थियारि खामानिफोरनि थाखाय बिथांखौ 1849 ईं मायथाइयाव साइबेरियासिम होखार हरनाय जायो। “Poor People”, “Crime and Punishment”, “The Idiot”, “The Possess”, “Brothers” Karamazov” बायदिफोरा बिथानि मुंदांखा सल 'मा बिजाब।

( ढ ) **अजन्ताः** महाराष्ट्रनि औरंगाबाद जिलानि जलगाँव प्हेसननि साखाथियाव थानाय दखरसे फिसा गामि। बौद्ध मुगानि दन्दर लुनाय शिल्पनि थाखाय बै जायगाया मुलुगदांखा। खि- गि: 2-7 जौथाइनि गेजेराव दन्दरफोरखौ जावखानाय आरो महर होनाय जायो होनना पण्डितफोरा फोरमायथियो। बेयाव मोन 25 बिहार आरो मोन 9 चैत्य लुनाय एबा महर होनाया मख 'जाथाव। बुद्धदेवनि जिउनि बायदि-मैया सल ' सोमजिनायनि बागै बर्णाइनाय गासैबो आयदानि लोगोसे बायदि रोखोमनि मुंदांखा आरो समाजारि आयदाखौबो बेयाव दिन्थिनाय जादो। 1817 ईं मायथाइयाव सासे इराज हादर दावबायारिया बेखौ सरैखा खालामफिनो। खेबनैसिम गोदान महर होना दिहुननाय अजन्तानि महर-सावगारिफोरनि खायफाखौ गिबियावनो फोरमायो ग्रिफोथछ। निछाम चरकारनि जोथोनाव बेनि गोबां महर-सावगारिया सोराडव नुजानो खाबु मोनो।

( ण ) **तक्षशिलाः** आथिखालाव पाकिस्ताननि बेन्दोडव थानाय मोनसे गोजाम नोगोर।

बेयो भारतनि फिसाज्ला तक्षराजनि राजथावनिमोन। बेयाव थानाय मुलुग सोल्लोसालियाव - बेद, सानथौ शास्त्र, बिगियान आरो बायदि रोखोमनि शिल्पकलानि (शिल्प-आरिमुनि) सोल्लोथाइ होनाय जादोमोन। खिष्टीय 400 याव चीन हादरनि दावबायारि फाहियाना बै जायगाखौ नायगिदिंफैदोमोन। प्रत्तात्त्विक गोजाम जावखांगिरिफोरा बे जायगायाव जावखानानै बायदि रोखोमनि गोजाम मुवा बेसाद दिहुननो हादो।

( त ) **नालन्दाः** गोजाम मुगानि बौद्ध बिहार आरो सोल्लोथाइ थावनि। बे जायगाखौ आथिखालाव बडुगाँव महरै मिथिजायो। चीन हादरनि दावबायारि हिउयेनसाडा बेसिम फैना गोरायुं शीलभद्रनि सेराव बौद्ध शास्त्र सोल्लोफैदोमोन। जौनि हादरनि अनगायैबो गुबुन गुबुन हादरनि गोबां फरायसाफोरा नालन्दा मुलुग सोल्लोसालियाव सोल्लोथो थाखाय फैदोमोन। प्रत्तात्त्विकफोरा बेयाव जावखानानै गोदोनि गोमालानाय गोबां जारिमिनारि मुवा-बेसादखौ दिहुनफिननो हानाया मख 'जाथाव। खिष्टीय ब्रैथि जौथाइनिफ्राय जिने जौथाइसिम नालन्दाया जेरावबो जेरैबो जौथिफबदोमोन। तुकीनि गाग्लोबनायाव जारिमिनारि नालन्दाया थेर-बेथेर जायो।

### सोंथि :

1. साननाय हनायनि हेंथा फिनहेंथानि बेरखां होनो हायोब्ला हादर गंसेनि सोलाय सल 'आ माबादियै जायो ?
2. सांग्रां गोखौ गोसो आरो लोरबां सांग्रां नडिनोसोनि फारागथिखौ दिन्थिनो लिरगिरिया मा राहा लादो।
3. आखलनि बोलोजो मा बोलोआ सोमोन्दो दं।
4. इउर 'पनि फरायसाफोरा हाथेर-हालाखौ मानो बाहायोमोन ?
5. इउर 'पनि मुलुग सोल्लोसालिफोराव फरायसा जायालासैनो माबोरै सोल्लोथाइ लानो हायो।
6. गावनि हादरनि गोदोनि आरो दानि सोमोन्दै सरासनस्रा बाथाफोरखौ साफ्रोमबो मिथिनाया मानि थाखाय गाहाम लिर।

# हाबाब निदानखौ मान हर

- मदाराम ब्रह्म

हाबाब निदानखौ मान हर

अबं ग 'साइ मान हर।

जेब्ला आं रंजाफुय

नं आंखौ छबायगार।

दछे रंजाफुबा,

दछे मिनिफुबा,

दछेन माबा हेंखुत जाय

अबलान मान निदान हर।

बिदिब्ला नंखौ थिउरिया बुंन नामा ?

नड नड जं नंखौ बिदि बुड।

नं अनाबला, नं थिउरियाबला

बे मुलुकया जागौमन छेरा-बेरा

हाबाब नं बिफाखौ जं बिदि बुड।

निदानखौ हर नं

जंन मजां जान

गेज्राब मजांब

गसयाव सान जं

बेनि थाखाय गेज्रा मजां मन जं।

हाबाब नं बिफाया जंन निदान हर।

नं बिफाया निदान हराब्ला

रावब मजां जानाय नड

हाबाब आफा नंनि खुंनायखौ मिथिछ 'वा।

नंनि फिछाफरन खथा आफा

जंन नं एसे बुंनाय आफा,

मानि थाखाय गाब्लाब जं आगर मना। □

[ बे खन्थाइनि मुंखौ दाब दाब जायगायाव “निदानखौ मानो हरो” होनना बुंदों ]

**खन्थाइगिरिनि सिनायथि:**

**मदाराम ब्रह्म :** 1903 मायथाइयाव क 'कराझारनि घुनघुनीखाता गामियाव मदाराम ब्रह्मआ जोनोम मोनो। बिथानि बिफानि मुड रोस्ना ब्रह्म आरो बिमानि-मुड बैसागि ब्रह्ममोन। 1923 मायथाइयाव धुबुरी हाइस्कुलनिफ्राय मेट्रिक आनजाद फास खालामनानै कटन कलेजाव फरायहैयो। 1932 मायथाइयाव हरिशिड हाइस्कुलनि गाहाइ फोरोंगिरि जायो। 1945 मायथाइयाव लकेल बर्डनि सोद्रोमा आरो 1948 मायथाइयाव Block Development Board नि Officer जायो। 1961 मायथाइयाव बियो सरकारि साखिनिफ्राय आजिरा लायो। 1985 मायथाइयाव आसाम सरकारि Literary pension मोनो। 1988 मायथाइयाव भारत सरकारा बिथानो पद्मश्री बिमुं होयो।

बिथाड 'बिबार मुगानि गोजौ सिरिनि सासे लिरगिरिमोन। 1923 मायथाइयाव रुपनाथ ब्रह्मजों लोगो नांन 'खन्थाइ-मेथाइ' बिजाबखौ दिहुनो। 1926 मायथाइयाव 'बर'नि गुदि सिबसा आरो आर 'ज' मुंनि गांसे धोरोमारि बिजाब दिहुनो। बिथाड गांनैसो फावथिना बिजाबबो लिरदों। बेफोर जादों - 'रायमालि', 'सदां बैसागी', 'डिमापुर नोगोर बायनाय'। बिथाड 'रुपेश्री रायथाइ खन्थाइ' मुंनि गांसे बिजाब सुजुना दिहुनदों। बिथानि खन्थाइनि आयदाफोरा धोरोम, अबंलाउरि आरो बर' हारि फोजाखानाय। 1990 मायथाइनि 6 सेप्टेम्बरखालि बिथाड रुं सारि जायो।

**सोदोबथि:**

निदान - खैफोद

हेंखुत - बेरेखा

थिउरिया - रागा गोनं

छेरा-बेरा - सेरखाय-बेरखाय

**सौथि :**

1. निदानखौ सुबुंनो सोर हरो ?
2. निदाना जौनि जिउवाव माबादियै फैयो ?
3. अबंलाउरिजों जौहा माबादि सोमोन्दो दड' ब्रह्मनि खन्थाइनि गेजेरजों फोरमायना लिर।

**बेखेवना लिर:**

(क) दछे रंजाफुबा

दछे मिनिफुबा

दछेन माबा हेंखुत जाय

अबलान मान निदान हर।

(ख) नं बिफाया निदान हराब्ला

रावब मजां जानाय नड।

हाबाब आफा नंनि खुंनायखौ मिथिछ 'वा।

# मनाबिलि

## - ईशान मोसाहारी

आय' सिखला मनाबिलि  
 रावब' मिथिया जंल' मिथिलाइगौ  
 जंदि सानैजं जादं जुलि,  
 सानाप जिंनि नखाराडव  
 फैय नड सदब मनथाव  
 बिरहनानै रैसुमै बाराव  
 रेसम जमैनि दखना फैछालि  
 जाब्रत मखाडव जिलिर नांफपनाइ  
 हनै बै गथांया  
 बेथ' नंनि ह'छारनाइ खानाइनि  
 गेलेनाय जेब नड।  
 आयना बादि सम सम दै बिखाव  
 मा नायदं बै गजं मुयाव ?  
 सर गाहखयै सिन्दुरनि फथाखौ  
 नंन' आजलि बिजलि ?  
 नंजं आंजं दै जिडव  
 बिदिन' अराय नुजलायगरा,  
 सिखिरि मानसिनि मेगन सेरावल'  
 जों सानैजं एरा एरा।  
 हाबाप स'ना नंखौ आड'  
 जिउ हनानैबो गछ' थय'  
 खनाबाय आड' नंनि खुगाउ  
 गछ' थनायनि मुंछे मुलि। □

## खन्थाइगिरिनि सिनायथि:

ईशान मोसाहारी : ईशान मोसाहारीया क'कराझार जिलानि थुरिबारि गामियाव 1915 मायथाइयाव जोनोम मोनदोंमोन। बिफानि मुड गयाराम मोसाहारी आरो बिमानि मुड गुन्दारी मोसाहारीमोन। कमलसिं गुदि फरायसालियाव फरायजेननानै उनाव धुबुरी गोजौ फरायसालियाव फरायहैयो। बे फरायसालिनिफ्रायनो मेट्रिक आनजादखौ उथ्रिनानै एलाहाबादनि एगिकालसार कलेजाव फरायहैयो। फरायबाय थानाय समावनो पाटाकाटानि सासे हिन्जावजों हाबाबो जायो। नाथाय एलाहाबादाव फरायबाय थानाय समावनो टाइफयेट बेरामाव गोलैनानै 1940 मायथाइयाव अबथिरानो जिउ खोमानांगौ जायो।

फरायबाय थानाय समावनो जिउ गोमाजानांदोंमोनब्लाबो खम समनि गेजेरावनो बर' थुनलाइ मुलुगाव गोबां बिहोमा होलांदों। बिथाड गुबैयै रमाण्टिक खन्थाइगिरि। प्रम'द ब्रह्मनि हाथरखि हाला आरो अलंबाराव बिथांनि गोबां जौगा थाखोनि रमाण्टिक खन्थाइफोरा सेबखांजादों। रुपनाथ ब्रह्म, मदाराम ब्रह्ममोननि खन्थाइफोरावबो दोंनै दोंथामसो रमाण्टिक खन्थाइ एबा रमाण्टिक साननाय हनाय खन्थाइफोर मोनोब्लाबो रमाण्टिक खन्थाइफोरनि आखुथाइफोरा मोजाडैनुजाथिफैयो मोसाहारीनि खन्थाइफोरनि गेजेरजों। बेनिखायनो बिथांखौ बर'फोरनि देरसिन रमाण्टिक खन्थाइगिरि बुंनाय जायो। बिथां सोरजिनाय 'स'नानि माला' आरो 'फामे' मुनि गांनै खन्थाइ बिजाब दं।

मख'जाथाव बाश्रादि ईशान मोसाहारीयानो बर' थुनलाइ मुलुगाव 'आबारी' सुंद' सल'नि गेजेरजों सुंद' सल'नि जोनोम होजेनो।

## सोदोबथि :

मनाबिलि - खोमसिज्लेर सम  
 जुलि - हाबा, गोरोबलायनाय  
 रैसुमै - गोजोन सुदेम  
 फैछालि - आंसोल  
 जाब्रत - जारां, जारौ  
 हसारनाय - हगारसारनाय  
 आजलि - बिजलि - जाम्बि-जामथि  
 एरा-एरा- गोजान गोजान, एरायखे-एरायखे

## सोंथि :

1. खन्थाइगिरिया मोनाबिलिखौ मा होनना बुंदों ?
2. खन्थाइगिरिया सोरजों जुलि जानायनि खोथा बुंदों ।
3. खन्थाइगिरिनि अनजालिनि महरा माबादि ?
4. खन्थाइगिरिया गावनि अन्जालिखौ माबोरै फैयो होनना बुंदों ?
5. खन्थाइगिरिया गावनि अनजालिनि महरखौ माबादियै फोरमायदों लिर ।
6. खन्थाइगिरिया गावनि अनजालिखौ लानानै एरा एरा मानो थानो नागिरदों बिजिरना लिर ।

## बेखेवना लिर:

- (क) फैय नड सदब मोनथाव.....दखना फैछालि ।  
 (क) जाब्रत मखाडाव..... जेब नड ।  
 (ग) नंजं आंजं.....एरा एरा ।

## हा सोरजिनाय

- बिहुराम बर'

## ॥ बिथाय ॥

हे हा-नख्रामानि बिगोमा बयनिबो सोरजिगिरि  
 खुलुमो नोंखौ गले गले जों  
 खोमसि मुलुगाव जोडे थाबायदों दांग्रोम दांसि  
 जोंनि लामाखौ अननानै फोजों ॥ 274 ॥

## ॥ खन्थाइ ॥

दाखांनानै आफा बाथौवा गोमोथावना सानख'र  
 सान हाराय हारायसानि ।  
 सोमोनांथावना महरै मा मावबावखो उनाव  
 खोनासं थेना नोंनो खोन्थानि ॥ 275 ॥  
 मायथाइ कौटि बारना गुदुग्लबबाय थानाय  
 हाराय हारायसा बिखड ।  
 सुयै सुयै सुग्लायबाय लालि जेनो लेद्रा खाबाय  
 गासैबो जाबाय जोंनो रोड । ॥ 276 ॥  
 गाइखेर फुदुडेबोला गुदु गुदुयै जेरै खायो  
 सावहाइ गाइखेर माखा ।  
 कौटि मायथाइ गुदुना हाराय हारायसाफोरा  
 बिखंफोराव खाबाय दाखा ॥ 277 ॥  
 गाइखेर माखा सिडाव जेरै गोदोसोना थाहैयो  
 दैलाव दुंहाव गाइखेर ।  
 बेब्दिनो हा-दाखा सिडाव गोदोबाय दैलावफोरा  
 मोनहैबाय उदै गेजेर ॥ 278 ॥  
 मायथाइ कौटि उनाव हा-बिखंफोरा राखंबाय  
 सिथासिथि बेदेलाव बेरसि ।  
 बुब्लि बुब्लि बिखं गावना सिंनिफ्राय बेरनबाय  
 दुंहाव अर जोंब्लाउ जोंसि ॥ 279 ॥  
 अरजों बेरनफानाय बायदि बायदि हांगार  
 दामोल जाबाय गोजो गोजो ।  
 सुग्लायजोबना बेफोरो जाखांबाय हादाम गोजौ  
 बुडे जायखौ अरमें हाजो ॥ 280 ॥

अर सालाय लाथा खाना जाखांबाय अर फिथाइ  
 बेनिखायनो बुडे अन्थाइ ।  
 हाराय हारायसा बिखं गासैबो रागाम रागाम  
 अन्थाइजॉनो बुंबाय स्राय ॥ 281 ॥  
 बिखं सिंनि गुदु मानुइ सुहोलां रानहोलां सेमो  
 सिडाव सोमजियो दन्दर ।  
 दन्दर गोनां बिखंफोरा थब्लं थबसि गब्रलांना  
 जाहोबाय माखासे हाख 'र ॥ 282 ॥  
 उन्दै उनला हारायसा आरो जोंथाइ गोथैफोरा  
 सौगदाव सौसि गोग्लैबाय ।  
 हाराय हारायसा बिखं खोन्दो खोन्दो बायपलेनाँ  
 अन्थाइफोरा स्लिम जाबाय ॥ 283 ॥  
 गोथै जोंथाय सिरिनाय आरो बिखं गब्रनायजों  
 बां बां ग्रिम मावबाय ।  
 जायखौ होनना बुडे बांग्रि समावयै समावयैनो  
 सिंखौ सा खालामजोबबाय ॥ 284 ॥  
 जौ जौ अरगें हाजोफोरा गुम गुम बेरफुलांना  
 सोमावसारहोबाय बांग्रि ।  
 अरगें हाजो खुगा बुंना बारन्नाय लाहाखिफोरा  
 फोजौबावबाय हाजोखुंग्रि ॥ 285 ॥  
 बांग्रि मावनाय समाव गुगाना हाजोनि अन्थाइ  
 बिखड गब्रसिनलांबाय ।  
 मावनायावनो बांग्रि हाजोहाला जौसिनबाय  
 गरंफोराबो थौसिनबाय ॥ 286 ॥  
 बिब्दिनो सोमजिखांबाय जौनि बे हादुलुरसाव  
 हा-अन्थाइ रागाम रागाम ।  
 नुस 'मोनि गोथौ हाख 'र गिलु बालु अरगें हाजो  
 अर फेरनग्रा गुम गाम ॥ 287 ॥  
 बेसे गोलाउ बुंबावनो बुडेब्लाबो जोबनो गैयि  
 बाश्रा बाथौवा हा दानायनि ।  
 बेनिखायनो फुसुंनानै खनो गोथार बाथौनि मुं  
 सुस्रांलांथों जिनिर फाबनि ॥ 288 ॥ □

### खन्थाइगिरिनि सिनायथि :

**बिहुराम बर'** : बिहुराम बर'आ इ 1941 मायथाइयाव दरं जिला आथिखालनि अदालगुरी जिलानि बेसिमरि (आथिखालनि चिकनमाटि) गामियाव जोनोम जादोंमोन । बिथांनि बिफानि मुड चन्द्र कान्त बर' आरो बिमानि मुड मराय बर'मोन । बिथां बर'आ गोजौ फरायसालिनि जोबथा आनजादखौ सानखान्थियाव लेटार लानानै दलगौव गोजौ फरासालिनिफ्राय सेथि थाखोआव उथ्रियो 1962 मायथाइयाव । इ 1964 मायथाइयाव आइ.एस.चि.खौ कटन कलेजनिफ्राय उथ्रियो आरो 1967 मायथाइयाव मंगलदै कलेजनिफ्राय राजखान्थि आयदायाव अनार्च लानानै बिथाड बि.ए. आनजादखौ उथ्रियो । 1980 मायथाइयाव मंगलदै बि.टि. कलेजनिफ्राय बि.टि. आनजादखौबो बिथाड उथ्रियो ।

**समाजारि बिहोमा** : बिहुराम बर'आ समाजारि हाबा-हुखाफोराव जेब्लाबो गोसो गुदुमोन । 1968 मायथाइयाव दरं जिलायाव बिथांनि नाजानायावनो गिबिथै बर' बिजोंखौ थिसननाय जायो । बै समनिफ्रायनो बिथाड जिलानि दाब दाब जायगायाव दावबायनानै गोबां गुदि फरायसालिफोराव बर' बिजोंखौ थिसनदोंमोन । बिथाड मिरु बर' थुनलाइ आफादाव गोलाउ सम गाहाइ नेहाथारिनि बिबानाव थानानै बर' हारिनि थुनलाइयारि, समाजारि, बायदि बायदि बिथिडाव हाबा मावदोंमोन । बिथाड दोहोरोमारि बिथिडाव बाथौ दोहोरोमखौ फोसाबनानै गुवारै फोसावनायनि सायावबो गोसो होदोंमोन ।

**थुनलाइयारि बिहोमा** : बिहुरामा बिजाब महरै "गिबि बिथाय" (1984) आरो "आसारबा" मुंनि गांनै बिजाब लिरनानै गालांदों । मिथिनो मोननाय बादिब्ला बिथाड "गदाइ बिथाइ" बो लिरदोंमोन । 1985 मायथाइयाव लिरनाय "An Introduction to the Bodos" मुंनि आखाइजों लिरनाय बिजाबा दासिमबो सेबखांजायाखै । बेनि अनगाथैबो बिथाड बर' मावथिफोरखौ लानानै "बानासुर" मुंनि सेबखांसालि फसंनानै "बनजार" मुंनि गांसे सानस्नियारि रादाब बिलाइबो फोसावदोंमोन । बेफोरनि अनगाथैबो बायदि बायदि लाइसिफोराव बिथांनि बर', असमीया आरो इंराजि रावनि लिरबिदांफोरा गोसारदलानानै दं ।

समाजारि, थुनलाइयारि, दोहोरोमारि आरो बायदि बायदि बिथिडाव रुजुथावै बिहोमा होनाय गेदेमा थुनलाइगिरि बिहुराम बर'आ इ 1990 मायथाइनि 27 सेप्टेम्बराव रुं सारि जायो ।

### सोदोबथि :

हा-नखांमा - हा आरो अखांमा लोगो नांनानै गासैबो

फोजों - गोजों खालाम  
 गोमोथावना - गोमोथाव, सोमोनांथाव  
 सानखर - सानखौरां, सौर जगत  
 गुदुग्लुब - गोदौग्लाब  
 लालि - रोखोमसे लाथा मुवा  
 लेद्रा - लाद्रा  
 दाखा-माखा-खानाय  
 राखांबाय-गोरा जाबाय  
 हाराय-हारायसा-जौब्लावरिफोर  
 रागाम - गोरा गिदिर खथ्रा खथ्रि महरनि  
 मानुइ - मुवा, बेसाद  
 दन्दर - खंखर  
 गुगाना - गिसिखानाय  
 गरं - खंखर  
 फेरन-गोबायन  
 जिनिर - मैला

सोंथि :

1. हा सोरजिनाय खन्थाइया मा बाहागोनि खन्थाइ ?
2. हा सोरजिनाय खन्थाइ थानाय खन्थाइ बिजाबनि नुडा मा ?
3. हा सोरजिनाय खोथाखौ सोर, सोरनो खिन्थादों ?
4. गुदुग्लुबबाय थानाय हाराय-हारायसा बिखंफोरा गुसु जानानै माबादि महर मोनदोंमोन लिर ।
5. अरगें हाजोआ माबोरै जायो होनना फोरमायदों लिर ?
6. बांग्रिडा बोरै जायो ? बांग्रिं मावब्ला मा मा जायो लिर ?
7. बाथौनि हा दानायनि सोमोन्दै बिजिरना लिर ।

**बेखेवना लिर:**

- (क) मायथाइ कौटि बारना..... जौनो रोड्ड ॥ 276  
 (ख) अरजों बेरनफानाय..... अरगें हाजो ॥ 280  
 (ग) उन्दै उनला हारायसा..... स्लिम जाबाय ॥ 283  
 (घ) बेसे गोलाउ बुंबायनो..... जिनिर फाबनि । 288

## निहिर सिनाय बार मोननानै

- जगदीश चन्द्र ब्रह्म

निहिर सिनाय बार मोननानै  
 जावलिया जायोबोला नों  
 बावबोला नों सिमां मोगथां  
 गासिबो आंनि -  
 गोसोआव फैफिनहोगोन  
 गंगोनायाव खननाय मेथाइया  
 बाथा बें बुं दामनानै  
 गाबनाय देंखोआ -  
 निहिर सिनाय बार मोननानै ।  
 सानसुनि सिरियाव  
 दाउखखिलं गाबबोला.....  
 सेरेन्जानि गोदनाजों  
 गाबगोन आंबो लोगो लोगो  
 नोंखौ साननानै -  
 रानखावनाय बिखा आंनि  
 जिउ मोनगोन  
 निहिर सिनाय बार मोननानै ।  
 मोनाबिलि अख्राडव बाथौ गुदियाव  
 हांखायनाय आलारियाव  
 सिबियोबोला -  
 खाम सिफुं दामनायजों  
 जथा रिखांब्ला  
 दाद जायो आंनि बिखाया  
 बोलो मोनो आंनि गोसोआ ।  
 नों आंखौ गोसोखांगोन  
 समा जेब्ला स 'फैगोन  
 निहिर सिनाय बार मोननानै । □



**खन्थाइगिरिनि सिनायथि:**

जगदीश चन्द्र ब्रह्म : क'कराझार जिलानि घुनघुनिखाटा गामियाव 1936 मायथाइयाव जोनोम जादोंमोन । सोलोंथाइ बिफानाव एम.ए. पास खालामनानै बे आयदानिनो फोरोंगिरि जानानै उनाव क'कराझार कलेजनि गोरायुं जायो । बेनिफ्राय दा बिथाड जिरोन लाबाय । बिथाड गाहाइयै खन्थाइगिरि आरो सुंद'सल' लिरगिरि । बिथाड गाहाइयै र'माण्टिक सानथौनि खन्थाइगिरि । बिथानि "दैमानि फिसा दिमासा" खन्थाइ बिजाबा 1980 मायथाइयाव ओंखारो । बिथानि सुंद'सल'फोराबो खहाब गोनां आरो समाजनि सावगारि एरखांनायाव जाफुंसार जानो हादों ।

**सोदोबथि :**

निहिर सिनाय बार- निहिर नांनाय गुसु बार  
जावलिया - फाग्ला, बोरनाय गोनां  
सिमां मोगथां - जेनिबो साननाय हनाय  
सम सफैगोन - गोसोआव उनदाहा फैनाय

**सोंथि :**

1. निहिर सिनाय बार मोननानै सोरनि गोसोआ मानो जावलिया जायो होनना सोरो बुंदों ?
2. जावलिया जानाय गोसोआव माबादियै गोमानाय सिमां मोगथाडव फैफिनगोन होनना बुंदों ।
3. मा मा राहायै आरो मा मा समाव आरो मा मा थासारियाव बावनाय सिमां मोगथांखौ गोसोखांफिनगोन होनना बुंदों ?
4. खन्थाइनि बाथ्राफोरखौ सोर सोरखौ थांखिना बुंनाय होनना नों सानो ?
5. खन्थाइनि गुबै सानथौखौ नोंनि रावजों लिर ।

**बेखेवना लिर:**

- (क) गोसोआव फैफिनहोगोन.....बार मोननानै ।  
(ख) सानसुनि सिरियाव.....जिउ मोनगोन ।  
(ग) मोनाबिलि अखाडव.....आंनि गोसोआ ।  
(घ) नों आंखौ.....बार मोननानै ।

**आंनो गांसे मुस्रि नांगौ**

- धरनीधर औवारी

सान  
हर  
जेब्लाबो उन्दुनायाव  
गावखौ सोंथेनो  
आंनो गांसे मुस्रि नांगौ ।  
जेबो जारला गैला  
बि समाव  
आंखौ रावबो नुवाब्लाबो  
आंदि बयखौबो नुजोबो ।  
जेखौनो आं नायनो नागिरो ।  
गोसोआव मुस्रि सौंनानै  
मालायखौ सानखोमानो हागौ  
जिलउ जिलउ,  
स्रोद स्रोद साइखोमाना ।  
उन्दुवाब्लाबो उन्दुदों होननाय बादि  
गन्थं हंखद हंखद  
खोनासंनो हागोन आं  
संसारनि दावरावखौ,  
जेखौ आं सालिख' सायख'  
बुंथिनो हागोन  
नांनाय समाव ।  
बिनि थाखायनो  
आंनो नांनाय जादों  
हाथाइ गोदाननि  
गांसे मुस्रि,  
ओं गांसेल'थार ।

**खन्थाइगिरिनि सिनायथि:**

**धरनीधर औवारी :** धरनीधर औवारीनि जोनोमा 1948 मायथाइयाव बरपेटा जिलानि लुवासुर गामियाव जादोंमोन । बिथाड सासे फोरोंगिरि । गाहाइयै खन्थाइगिरि हिसाबै मोनथिजानाय । बिथांनि “मोदै” खन्थाइ जथाइया 1979 मायथाइयाव ओंखारो । सुंद’सल’ लिरगिरि हिसाबै बिथाड गावनि सुजथाइ “गान्दु सिंनि लाइजाम गांसे” खौ 1979 मायथाइयाव साफायना दिहुनो । बिथांनि “मैहुर” सल’माया 1980 मायथाइयाव ओंखारजेनो । धरनीधर औवारीया सासे राफोद आखाइनि रायथाइगिरिबो ।

**सोदोबथि :**

जारला - दुखु दाहा  
ज्लिउ ज्लिउ - जों जों  
साइखोमा - थाखोमा, सिडव थाखोमा  
सालिख’ - बासि बासि  
हाथाइ गोदान - गोदान मुलुग

**सोंथि :**

1. लिरगिरिनो मुस्रिखौ मानो नांगौ ?
2. मुस्रिजों लिरगिरिया गावखौ मानो सोंथेनो लुबैयो ?
3. उन्दुलाडब्लानो हंखद लायनानै खन्थाइगिरिया मा खालामनो नागिरो ?
4. मुस्रि सिडव खन्थाइगिरिया गावखौ माबादि खैफोद-जारला गैयि सानो ?
5. मुस्रि सिडव थाखोमानानै खन्थाइगिरिया मा मा थांखि लानानै मावखोमानो नाजादों ?
6. सिंनि मुस्रिया मानि प्रतीक (Symbol) ? गोसोनि मुस्रिया मा ?
7. खन्थाइनि गुबै सानथौखौ नोंनि रावजों लिर ।

**बेखेवना लिर:**

- (क) जेबो जारला गैला..... नागिरो ।  
(ख) गोसोआव मुस्रि.....नांनाय समाव ।  
(ग) बिनि थाखायनो.....गांसे मुस्रि ।

**मोनाबिलि आरो आं**

- अनजु

थाबायलांदों आं बिलो सेरनि गांसो साजों  
मोनाबिलिनि दखना थाबसियाव हमनानै,  
नुदों बायदि मिथिंगानि नुथाइ -  
लामा सेरनि सामथाइ बिफाड आंखौ रायदावो,  
फालोसे मोसौआ हाद्रि खुफुंलाडो,  
लावखाराबो भाटियालि देंखोजों मुसुरलाडो,  
हान्जासे दाउवा गाबसावनानै सा सोनाबफारसे बिरलाडो-  
बिलोनि बिखायाव ना-एम्बु थुफियो,  
माखासे गथ’फोरा आमाइ-बिमाइ गेलेदों,  
सोरबाबा हाद्रि बाला सारलायलायदों,  
खायफाबा खाथिनि फोथाराव बल जोदों,  
बन्दरनि मानसिफोरा बार जाफैनाया गिदिंफिनदों,  
सानजा अखोरांखौ खोमसिनि फैसालियाव जोख्लोबबोगौ,  
ष्टेसननि र’ड लाइटखौ रिथि-राथा जोंनाय नुहरहांबाय ।  
आं उनफारसे नायहरफिनो.....  
मोनाबिलिनि सानसिखोलाया गैलिया,  
नाथाय बिनि जारां बिलिरनायाव  
सोनाब रुगुडा दाबो जारौरौ,  
मैना खबारिनि गय जानाय गुस्थि जारौबादि,  
बिनि महरखौ आं गोसोखाडो  
रिमोनदो आबिर गाबाव,  
जारां जोमै बिखायाव,  
सिमांनि बिलात लाथाबादि  
हायनारि जारौ सानसिखोलाया ।

मोनाबिलि,  
 आं नायग्रा नों नायजाग्रा,  
 आं दसेनिल' नों अरायथि,  
 आं सायर' जाबोला  
 नों आंखौबो मिनियो ?  
 आंनि देहा - गोसोआ ग्रेब ग्रेब गेरेबलाडो  
 मेंनायाव हां सरथेहां जायो,  
 नाथाय नों,  
 अराय सिखोला मिनबाला । □

### खन्थाइगिरिनि सिनायथि:

**अनजु :** 1963 इं मायथाइनि 15 जुलाइ खालाराव क 'कराझारनि खोला टेडपारा गामियाव अनजुनि जोनोम जायो। अनजुनि आबुं मुड अन्जलि नार्जारी। बिनि बिफानि मुड मुस्री दयाराम नार्जारी आरो बिमानि मुड शन्तिलाल नार्जारी। टेडपारा गुदि फरायसालियाव फरायजेननानै क 'कराझार हिन्जावसा गोजौ फरायसालिनिफ्राय मेट्रिक आनजादखौ उथ्रियो। कटन कलेजनिफ्राय P.U. (Sc.) उथ्रिनानै सिलंनि लेडी कीन कलेजनिफ्राय B.Sc. आरो NEHU निफ्राय M.Sc. खौ उथ्रिनानै आथिखालाव क 'कराझार कलेजनि मुवा-बिगियान बिफाननि गाहाइ बिबुंगिरि जानानै दं।

1982 मायथाइयाव अनजुनि गिबि खन्थाइ बिजाब 'नोंनि जिउ : आंनि बिबुंथि 'या ओंखारो। अनजुनि खन्थाइफोरा गुबुन गुबुन लाइसिफोराव गोसारना दं। अनजुनि गुबुन खन्थाइ बिजाबफोरा जादों - 'फासिनि दौलेडव अखाफोर' (1995), 'गोरबोनि रादाब' (2002), 'गोरबोनि खन्थाइ' (2005)। फासिनि दौलेडव अखाफोर खन्थाइ बिजाबनि थाखाय 2002 मायथाइयाव बड' साहित्य सभानि रांसार बान्था मोनो। आनजुबा खन्थाइनि 'इकेबाना मुंनि खन्थाइ' बिजाब गांसेबो सुजुना दिहुनदों। गुबुन गुबुन लाइसियाव अनजुनि सुंद' सल 'फोराबो नुजागासिनो दड'।

### सोदोबथि :

बन्दर - नोगोर (खन्थाइनि ओंथि बादियै)

फैसालि - रोबै, बिजौ

मैना खबारी - जाथोसे दाउ मैना  
 बिलात लाथा - भुम फिथर, बुहुम  
 हायनारि - हायना गोनां  
 भाटियालि - नाव दावख्लायना थांनाय समाव खननाय रोखोमसे मेथाइ

### सोंथि :

1. खन्थाइगिरिया मोनाबिलिखौ मार्जों रुजुदों ?
2. खन्थाइगिरिनि रेबगनाव नुजानाय मोनाबिलिनि समायना महरखौ फोरमायना लिर।
3. मोनाबिलिजों खन्थाइगिरिनि गेजेराव मा फारागथि दड' ?

### बेखेवना लिर:

- (क) बिलोनि बिखायाव ना-एम्बु थुफियो,  
 माखासे गथ 'फ्रा आमाइ-बिमाइ गेलेदों,
- (ख) नाथाय बिनि जारां बिलिरनायाव  
 सोनाब रुगुडा दाबो जारौ रौ।

# आंगु नेरसोन

- सिकेन ब्रह्म

“आबौलै! नै आबौ!! देब्रा सेरजाया हुदोलाय!!!”

अखा दोमैलु दिनाव, गोजाड गोलोमा समाव गामिनि सेंग्राफोरा ज' फैनानै बोराइखौ सोर बेंगिदिंफैयो। सोरबाबा बुडे - आबौआ मा एसे मोजां सेरजा दामनो रोंगौब्रा” - आरो खायसेबा बुडे - “बावलियालै, दा-बावैनो आबौआ सेरजाजोंनो आबै सासे बरायनानै लाबोनो हासिगोनब्रा.....” हा: हा: हा: - बयबो मिनिग्लाबो बोराइनि न'आ गोमसारो।

आसिन दाननि सानजौफु सम, अखा दोमैनायनि दिन। अखां सायाव दाबो जोमैया दाखिनानै दड', गोजांरोम-गोलोरोम सिउ सिउ बार बारदों।

खामसालियाव हारसिडै ज'नानै बोराइया खाथि जिरदों। सेंग्राफोरा बयबो बोराइनि खाथियाव ज'देरफैयो।

मिनिस्तु जानानै बुडे बोराइया - “दोद सालाफोर। माथो बुंफैलायखोब्रा नोंसोरलाय.....।”

“दैब्रा आबौ सेरजा खनसे हुदो”- सेंग्राफोरनि गेजेराव सासे बुडे।

“आंहा सम गैयालै फिसौफोर” - खाथिखौ हुश्रोद हुश्रोद खालामनानै बुडे बोराइया - “समफोर सामुका हाथाइयाव संग्राइ गंसे सान्द्रि गंनै हेबनानै लांथारनांगौलै आंहा।”

“दैब्रा आबौ, थेवबो।”

दावागुरिनि आवाराम सेरजा फागला। मोदोमा नायोब्ला खामि हारा नुजाजोबनाय, मोखाड नायोब्ला सायहा गोमालांनाय, दारि जामाव-माव, मेगना देग्रं ग्रं, नाथाय मेगननि नोजोरानो दाबो भाद्र दाननि दान-सोरां अखाफोरजों बिजियाव खुन्दुं सोनो हागौ। बैसोआ दहायलांबाय, गोजौ गं-ग्रं बोराइ। मिनिस्तु मिनियोब्ला बिनि मिनिनाय गेजरजों माबा मोनसे दाहा सिथाबनानै थानाय बादि नुयो।

एरख 'जानाय बादि गामिनि खोलाजों गंसेल' देरा गायज्राब, आवाराम बोराइनि न'। सोरगिदिं फोथार, गेजेरजों जिबौनि महरै दैसा-फिसा मोनसे बोहैलांदों, दैसा

दैनि जिडव फांसे सुमलि बिफां बेसेबा गोबावनिफ्राय दासिम गसंनानै दड' - बिबो बोराइलांबाय। देरा गायज्राबनि मोखाडव मोनसे हाफाव, हाग्रा रज 'फबबाय। हाफाव जिडव थुलुन्सि बिफां सेराव साना हाबबाथाइ दाबो जेवारि गंसे जोंबाय थायो।

अखा दोमैलु सानजों, सिउ सिउ बार बारनायजों, सेंग्राफोर जंखानायजों उसु खुथु जायो आवाराम बोराइनि गोसोआ, बबेबा मोनस 'हरै राइजोआव बिसोरजों लोगोआव गेलेफानो लुबैयो बिनि हाबिला गोसोआबो। खाथि जिरनायखौ ज्राब नागारनानै दाबसेजों दोनथ 'हरो।

सिउ सिउ बार बारदों, अखांनि जोमैया गोसोमनिफ्राय गोसोम जाबोसिनदों, दानो अखा लाबोथारगोन। दुलाराय फोथारसालियाव मोसौ फालोफोरा गांसो जानायखौ नागारनानै ज' ज' जाथुमलायदों, एसे गोजानाव माइ थिलियाव सिउ सिउ बार बारनानै दोहौ बुखांलांदों.....।

रि रि रि, रौ रौ रौ.....।

न' सिंनिफ्राय उखुम ख 'नायाव सैगदाउनानै दोननाय सेरजाखौ हाननानै लाबोनानै देंखो बोयो आवाराम। बेसेबा गोबाव दामाब्लानो सैगदाउनानै दोननाय, बेमा सोंथेनानै थानाय सेरजायाव दिनैसो आखाइ होदों बियो। आखाइनि आसिया थोर थोर मावो, गोसोआ दुल्लुब दुल्लुब मोनो। सेरजानि देंखोआबो जाखारा जाखारा जायो।

फ्रि फ्रि अखा थाइफ्रियो बाइहायाव, राडि आरो रदानि देंखोआ बुंखाड आवाराम बोराइनि सेरजायाव! जब जब अखा हायो, आवाराम बोराइनि सेरजा हुनाय आरो आखाइ सौनायाबो खरनिफ्राय खर जायो, सेंग्राफोरा गल' नायहाबो।

गोसोखौ होसारनानै सेरजाखौ दामो आवाराम। मोनथिस 'नो हाया दिनै मानोबा गोसो होसारनानै दामनो लुबैदों बियो सेरजानि देंखोजों।

सेरजाखौ हुयो, हुयो आरो हुयो। हुनायनि लोगो लोगो गोसोआ गाबखांबोयो, खाफाला गोलोमस्रावो, गुस्थिया फेरलेब फेरलेब मावखांबोयो, उनाव मोदैया लासैनो ग 'बोयो मेगन थाइनैनिफ्राय, थेवबो हुनायखौ नागारा बियो। बारासिनसो खालामो, लोगो लोगो सेरजानि देंखोआ दाहानि अर जानानै दूलाब दूलाब खामदूलाबबोनाय मोनो बियो गावनि बिखा सिडव। दामनायनि फावजों दुखु दाहानि गेजेरजों सेरजाखौ हुयो आरो हुयो, उनाव बारा बारा हुनायनि थाफावनो थबस्र जलाडे सेरजानि दुरुडा - हुस गोमानानै गुगुब गोलैयो बोराइया।

बेनिफ्राय.....बेनिफ्राय.....बयबो सि.....।

आबौ, आबौ, .....आबौलै। मा जाखोब्रा आबौवालाय!!

- सेंग्राफोरा बयबो नायनानै गोमोहाबो, बोराइखौ हमखबो, दै लायनानै खर'आव दासोमो, सेंग्राफोरा बिखा ख्लाब ख्लाब मोनो। बेसेबा गोवावनि उनाव बोराइया हुस मोनखाडे।

अखाया हागालांबाय, अखांनि जोमैया लासैनो गोमोरलांबाय, फोथार थिलियाव दाउसेन-दाउलाफोरा आदार खनजाफिनबाय, मोसौ फालोफोरा गांसो जाफिनलायबाय, सानाबो बेलासिबाय। थोथोर बोबोर सिखांनानै जयो आवारामा। नाथाय मेगननिफ्राय दाबो मोदैं अंखारनाया जोबाखै। मेगन थाइनैखौ हुफ्ले हुफ्ले माबा बुंनो सानो, नाथाय गोसोआ हास्लाबहैया! उनाव गोसोखौ गोरा खालामनानै, सेंग्राफोरखौ खाथियाव बजबनानै गावनि जिउनि गेजेरजों बोहैलांनय मोनसे दुखुनि बाश्राखौ बिजिर बिजिर खिन्थायो बोराइया।

फरायग्रा! खोनासंनो लुबैयोनामा नौबो बे बाश्राखौ? फै होमब्ला नै बे गाहाइ लामाजों आरोबाव दसे आगान सुरबावदिनि।

दसे गोलाउ हांमा सुरहाबनानै आवाराम बोराइया बुंनो हमो, फिसौफोर। दिनैनिफ्राय तिन कुरि (कुरिथाम) बोसोर आगोलनि बाश्रा, आं अब्ला नौसोरबादि सेंग्रा जालियामोन, मोदोमाव बोलो, आखाइयाव गोहो, मेगनाव नोजोर गोनांमोन। गोसोआ मिजिंनि रंजों गाब गानाय, सिगाडव समायना रमायना मुलुग संसाराव थांनानै थानो लुबैनाय हाजार सिमां..... बायसेश्रा.....।

बोथोरा थाडे फारि फारि.....दैज्जलानि उनाव मेसें बोथोर, गोलोम बोथोरनि उनाव गोजां बोथोर, हाव-हाव दुं दुंलाबनाय सावन बोथोरनि उनाव फैफिनो दुफां बोथोर.....लोगो लोगो आंनि जिउवाबो रंजाफायो, गिसिखालाडे समनि फाख'नाव-आं बुंस'नो हाया मा समाव बबे बोथोराव नागारनानै थाड आइ आफाया आंखौ, बे खोमसि मुलुगाव हारसिडै दोनलांनानै। बेनिफ्राय.....जैरैबो जेरावबो सोलो मोनैनि उनाव, उदै-उखैनायनि थाफाव हाबनानै थानाडसै आं मनबारु गावबुरानि संसार फान्जारियाव.....।

आं दिनै मनबारु गावबुरानि दाहोना, आवाराम दाहोना। गोसोखांबोला गोसोआव हेंथा मोनो माबोरैबा। मनबारु गावबुरानि संसाराव थानानै आं देरबोबाय। गोसोआ थेवबो फोथायजोबनो हाया आं दि दाहोना, दाहोनाफोरनि गेजेराव सासे गाहाइ दाहोना।

गोसोआव दुखु फैयो, खुगाजों मिनिनो अंखारो, थेवबो बिखायाव गोहो फैयो

आदि सासे सेंग्रा, बेसे मोजां आंनि थाखाय बे मुलुग संसारा.....।

मोजां मोननाय बे मुलुग संसारखौ आंनि सेंग्रा बैसोनि रैसुमै दिनजों सिथाबफाहोनानै लाखिनो थाखाय लोगोआव लानायसै आं गंसे सेरजा बिनिफ्राय.....।

सेरजाखौ आं रेंबाय, सेरजा दामोब्ला बिनि देंखोंजों गोसोनि दाहाखौ रानफालांनय मोनबाय आं, गोदान निज्जानि दै बोहैबोयो आंनि जिउ दैमुयाव।

आंनि सेरजा दामनाया नोजोर गोलैयो लासैनो - सेंग्राफोरनि मेगनाव, सिख्लाफोरनि मेगनाव, मानसिफोरनि मेगनाव.....बयनिबो गेजेराव-।

मनबारु गावबुराया गोसो गिलिद नडांमोन, फोथायसुलाबो नडांमोन - बेनिखायनो दाहोनाब्लाबो बिनि संसाराव बेरायनाया आंनि थाखाय बारा हेंथा गैयामोन।

सेंग्रा जिउनि बोथोरा दावगाबोयो, रंजाफानो, मोसाफानो लुबैयो सेंग्रा-सिख्लाफोरजों सें लोगोआव, उदां बोथोर मुलगनि थानसालियाव।

बैसागु बोथोरा स'फैयो, दुफां बोथोरा बासा बोयो, मानसिफोरनि गोसो दैथुनाव जावरिखाडे रंजानाय दै-बाना।

आंनि सेरजानि देंखोआबो रि रि रिखाडे, रयाथि सिख्लानि आथिडव गांघिं गाबखाडे, आखाइनि जाबखेडा जांखिखाडे, मोदोमा लासैनो देमगलायबोयो, बागलायबोयो, मोसाग्राडे.....रंजानाय बोथोर, मिनिनाय बोथोरा बागलायलाडे, गोमोरलाडे, नाथाय गेरेमसा बिफां सिडव गुनजिद अरनायबादि मासे गुनजिदा अरबाय थायो आंनि बिखा सिडव।

आं मोजां मोनो सोरजिगिरिनि सोरजिनाय मुलुगखौ, बेनि सायाव थानाय जिदादफोरखौ, मोजां मोनो फुडव नुजानाय सानजा राइजोनि गावदां साननि मोखांखौ, अखां सायाव जोमै सेर सेर गेलेनाय गावदां अखाफोरखौ, बै गोजाननि हाजो खर'नि गोथां महरखौ, - मोजां मोनो मुलुगनि फोथाराव गेलेनाय दाउसिन-दाउला, एम्फौ एनला, मानसिफोरखौ - मानसिफोरनि गेजेराव आरोबाव सासे मानसिखौ.....सासे हिन्जावखौ।

बि जादों र'याथि - बि जादों हिन्जाव महरै र'याथि सिख्ला। र'याथिखौ आं मोजां मोनो, हाजार सिख्लाफोरनि महर सेरजों बागलायलांनानै आंनि गोसोनि दै दाहारा थाबथाहैयो र'याथिनि महर दैमायाव, बेनिफ्राय..... र'याथिया आंखौ मोजां मोनो ना मोना आं बेखौ मोनथिरोड, नाथाय माब्लाबा दुफां बोथोरनि गावदां अखाफोर बिलिफां हराव, मनबारु गावबुरानि सिथला गेजेराव गोसो जाबोला

हारसिडै बिसना सायाव जनानै सेरजा दामबोला इन्जुर ख'नाजों सेर फाखायनानै नायखोमाबायनायखौ आं खननैसो नुनो मोनदों, लामा दथायाव, दै गाथोनाव हारसिडै लोगो मोनब्ला लाजिस्तु लाजिस्तु जानानै नायगंनानै थानाय मोखाड जागाफबनायखौ आं नुदों, हाबा-हुखायाव सिख्ला लोगोफोरजों लोगोसे थाफाब्ला, आंखौ नुहरब्ला जंखायजानायखौ आंनि मेगन नोजोरा गोलैहैदों, र'याथिया नंखायखौनो खोनाफा माफा 'फाग्लिफोरा' होननानै दाबसेजों एरखेनानै थानायखौ आंनि गोसोआ हमनो हादों। बिब्दिनो रोदा सुजेनदों जों सानैनि गोसो थोज्लायायनायनि सिगां बिफाड, देरदेखोन देरबोदों बिबारबो बारबोदों समनि फाखनाव, उनाव बे बिबारनि मोनामनाया बार बारनायजों मोनामफुदों जेरैबो जेरावबो। गोसोथानायनि रायज्लायायनाय जौनि राव-फावफोरा बारसिन जाबोदों, गोसोखौ गोजोन आरो गोगोम मोनदों।

सॅग्राफोरा मोनथिनानै मेगन सादों, सिख्लाफोरा खाफालखौ खायखोमादों, मानसिफोरा दावराव खालामदों।

धनबोर माहाजोना नाथाय सि थायो फिसाजो र'याथिनि आखलखौ खोनानानैबो जेबो बुड ? माबोरै बुंनो ? फिसा थंजाथारैनि, जखायसे सासे फिसा थैजाननायनि उनाव बाथौ बोराइनि मुडै फारेव ज'रासे, दाउला गोजा मासे बाउनानैसो लाखिनो हानाय नायल'-जाल' सासेल' फिसाजो र'याथि, दासिमबो फिसाजोनि गोसोआव दुखु होबोफेराखै, बेरेखा जाहोफेराखै। आलो आलो अननायनि गेजेरजों देरबोनाय र'याथिया सिख्ला बैसोनि लामायाव आगान सुरनानै गावनि गाज्रि मोजांखौ साननो हाबाय।

बिमा खावालियाबो अननो गोरों, नाथाय फिसाइ धनबोरनि बिबादि गोसो गोथौयै अननायखौ बियो थारै मोनथिसहरनो हाया, फिसाजोनि आखल-दावलखौ गावनि खर' बारद्रायनाय मोनो, माहाजोननि हिन्जाव होननानै गन्थ हाजानाय मोनो। बेनिखायनो गोसोजों गोसो सानखोमायो, 'र' सालिखौ मोनफ्लांगोन आं।'

गोलोम बोथोरनि मोनसे बेलासि सम - मनबारु गावबुरानि न' सेराव, खान्थाल बिफांनि सिडव गामिनि गाहाइफोरा ज' ज'थुमदों, बिसोरनि गेजेराव मोखां सायर' र' जानानै थानाय सानै सॅग्रा-सिख्ला, सासेया जादों आं आरो सासेया जादों र'याथि। जों सानैनि गेजेराव बेरखांनाय आखलखौ बिजिरनानै नायनो थाखाय दिनै आफाद जदों।

सानसुमै गाहाइफोरा बाथ्राखौ बिजिरो, सावरायो, जों खोनासडि, दायखौ गंलायनानै लायो।

खायसेबा आंखौ आरो खायसेबा र'याथिखौ बेनि थाखाय दाय होयो। उनाव

सानैनिबो दाया समान होननानै आंहा सानगासे आरो र'याथिया थाइबा खम होनानै उद्रायनायनि बान्था मोननाय जानायसै।

बेनिफ्रायनो मनबारु गावबुराया आंनि आखलखौ साबजायिलाय गावनिफ्राय मोननांगौ सानगासे रांखौ दायनि थाखाय दानना लाखिनानै, अखा नायैनिफ्राय गावनि ओंखाम संग्रानि दरखौ आंनि थाखाय थे फांथेनानै दोनहोनायसै। बेनि उनाव अनसुला धनबोर माहाजोना फिसाजोनि गोसो लुबैनायखौ सुफुंनो थाखाय, बिसि खावालनि हेंथा बाथ्राखौ खोनासडबालानो आंखौ बिजामादै खालामनानै लानायसै।

र'याथिखौ आंजों जुलि जानायाव बिफाया होवासै सानथ्रहायि अननायनि राव। .....नाथाय बिमाया होवासै साव।..... गामियाव सि गोलैफिनबाय, मिनि रंजायै बोसोर बारग'लांबाय।

बबेखानि जौनि राइजो जानायाव आरोबाव गोदान मोनसे साननांगौ बाथ्रा स'फैबावबाय।

आं सानो, - गोदोनि खोथा, दानि-देनांनि खोथा, राइजो जालांनायनि खोथा, र'याथिया सानो बिमा जानो मोनैनि खोथा....बायदिसिना।

हाबा जाखांनायनि उनाव फैनाय मोनसे सैथ्र मासनि अमाबैसा अखाफोर दान-खोमसि हरा जौनि थाखाय जोबोद दुखु गोनां। अमाबैसानि साननै सिगां मोदोम साखांजानानैबो र'याथिया दाबो मोजाडव फैनो हायाखै। सिब्राम गाथुवानि साल-दाउखुमैजों बुस्रिबायनाय, सबाय उजानि गाइखेर आवाजों सुथि दाननाया फैमाल जाबाय, थिमफ्रि बुरैया दाउसा थै लोनानै आंखौ इसिं ख'नायाव लेंहरखोमानानै सिमान लाहोनायाबो नंखाय जाबाय, - बयबो खाफाल हमबाय.....। गमामायैनो अखा नायसि नायसि दाउला गेसेरब्ला फिसानि मोखां नुवाबालानो रयाथिनि मेगन थाइनैया ख्लोब जोख्लोबासै आरो जेब्लाबो गेवफिनाखिसै - बिमानि साव सारनाया थारैनो नांफैनायसै।

मोदै रथ' रथ' दिखार नांगा नांगा हाजासे गाबदोंमोन आं। दरसि खोमसि नुदों ओ जेरैबो मुलुग संसारखौ। आंनि गोसोआव मुलुगा सानसे-बेलासे रंजाग्रा फोथारसालिमोन - बे मुलुगा दिनै गोथैनि थानसालि। हाय खाफाल।'

आवाराम बोराइया हांमा सुरहाबो, सॅग्राफोरा सिखारहां जायो बयबो, बेनिफ्राय बुंबावो बोराइया -

“फिसौफोर। दाबो जोबाखै आंनि दुखुनि बाथ्राया, एसे खोनासंबाव र'। र'याथिया थैनायनि उनाव गोसोखौ थिर लाखिनो हायिनि थाखाय अंखारलांनायसै

आं दाबसेयाव, गिदिंबायहैनायसै आं मोनसे जायगा - जे जायगायाव मानसिनि दावरावा आंनि खोमायाव सहैसवा, जि जायगायाव थायोब्ला गोसोनि दुखुखौ बावनो हागोन, जिउवा गोजोनगलायगोन.... ।

“नाथाय जेरावबो मोनाखैसे आं । मोनिनि थाफाव एककुरै बोसोरनि उनाव फैफिननायसै आं बे गामियाव, देरा गंसे लुनानै थानायसै आं नै बे हाफौ जिडव ।”

सॅग्राफोरनि गेजेरनिफ्राय ऑखारबोनानै आवाराम बोराइया हाफौनि सायाव ज 'हैयो, सॅग्राफोराबो सिखारफायो । बोराइया बुझे,

“फिसौफोर । दिनै मनबारु गावबुराया गैलिया, धनबोर माहाजोन एबा खावालियाबो थैनानै थांबाय, मोनथिगौ नोंसोर, बे हाफौवा मा बि ? - बे जादों र'याथिनि न', गोथार गोसोयै दाबो उन्दुलांगासिनो दड' बियो बे न' सिडव, आंबो थागोन बिनि साखाथियाव, बावनो हाया आं बे हाफौखौ, बे हाफौवासो आंनि गोसोखौ गोजोन होयो, बिनो जादों आंनि दुंलुब गोसोनि - “आंगु नेरसोन.... ।”

आवाराम बोराइनि रावा हां थिफुं थिफुं, मेगना मोदै गहां गहां । “बोराइनि दुखुखौ खोनासंजोबनानै सॅग्राफोरा सि सि थांजोबनायसै” ।

अखा हानाया मब्लाबानो नागारलांबाय, - सोनाबनि अखाड जांरां जाबोबाय, बेलारोम साना हाबबाय, मोसौ मैसाफोरा गाव-गावनि न' - फारसे लामा लाबाय, दाउसिन दाउलाफोरा गाव गावनि बासाथिं बिरलांफिनबाय । आवाराम बोराइया हाफौ सायाव बिलिर बिलिर गुगुब गंनानै खनसे खुदुमो हाफौखौ, बेनिफ्राय सोरगिदिं मुलुगखौ नायथिंहरो - जेरैबो उदां, जेरैबो लांदां ।..... बबेनिफ्रायबा मासे खुरुवाया बिरबोनानै सुमलि बिफाडव बानानै गाबखाडे खक-क'-खर'-र'-र' । □

### लिरगिरिनि सिनायथि:

**सिकेन ब्रह्म:** सिकेन ब्रह्मआ अलंबार मुगानि उनसिरिनि लिरगिरि । बिथानि जोनोम, फरायनाय बायदिनि सोमोन्दै दासिमबो जेरावबो लिरनाय ऑखाराखै । नाथाय बिथानि सुंद' सल' आंगु नेरसोना बेसेबा गोबावनिफ्रायनो फरायग्राफोरजों मोजाडैनो अनसायबोजादों । सुजु आफादा सावरायनानै बेखिनिखौ लिरगिरिनि सिनायथि महरै होनाय जाबाय ।

### सोदोबथि :

आंगु - आंगो, थार

नेरसोन - सिन

दोमैलु - अखा हाहां बोथोर

हुदो - दामदो

साइहा - सेहेरा, मुझी

देग्रं ग्रं - गोथौ

गाइज्राव - बोराइ, बायहां-हां

हाफौ - गोजौ हा

हुस गोमानाय - सुथि गोमानाय

### सौथि :

1. बोराइया खामसालियाव जनानै मा खामानि मावदोंमोन ?
2. बोराइया सॅग्राफोरनि सिगाडव मा हेबनांगौ होनना बुंदोंमोन ?
3. बोराइनि न'आ माबादिमोन ? न'-सेराव मा मा दं लिर ।
4. सेरजा दामजेननाय समाव बोराइया माबादि जादोंमोन आरो उनाव मा जादोंमोन लिर ।
5. मनबारु गावबुरानि गोसोआ माबादिमोन ?
6. र'याथिखौ सिख्ला लोगोफोरा माबोरै जंखायोमोन ?
7. आवारामनि सल 'खौ लिर ।
8. 'बिमानि साव सारनाया थारैनो नांमारनायसै' - बे खोथाजों सोमोन्दो थानाय जाथाइखौ बिजिरना लिर ।

## दुमफावनि फिथा

- जनिल कुमार ब्रह्म

सामथाइबारि हाथाइयाव गोबावजों लोगो मोनदों गावदाड बिलोगो सरलाखौ । बिलोगो सानैबो बिखुडाव साफा साफा गथ' बादों । लोगोआव दंफायो गाव-गावनि जिउनां मोदाइ । गावदांनि फिसाइया काश्मिराव एयारफर्सनि साखि मावो । बिलोगो सरलानि फिसाइयाबो गुवाहाटीयाव एफ.सि.आइ. दिपाटमेनाव साखि मावो । खाफाला मोजां, बिलोगो सानैबो मोजां हौवाजोंनो हाबा जाहैदों । बिसोर गुदि फरायसालियाव फरायनायनिफ्रायनो कलेजाव फरायनायसिम नागारलायि लोगो मोनलायबोनाय फ्रेण्डमोन गावदां आरो सरलामोनहा । गोबावजों दिनैसो मोखां नुलायनायलाय जोबोद गोजोननाय मोनदों बिसोर । गाव गावनि जिउनां मोदाइखौ सिनायथि होलायखांनानायनि उनाव सामथाइबारि हाथाइनि गाइखेर बहरा होना नै गोथाव साहा फुदुंग्रा मुं दांखा बाहादुर मेफालनि साहा ग'लायाव साहा लोंनो हाबो गावदांमोनहा । ग'लायाव जहैग्रोमोना गावदाड बिलोगो सरलाखौ बुदों - लोगो जोंना बाबु रिंखुनि बिफाया जों थानाय जायगायाव बयजोंबो सिनायजायो, मानि जायो आरो गिजासो गारो । साखियाबो देरगासिनो दं । दान बान्थायाबो अखाफोर दानसेयावनो थाम हाजारनिबो बारा । ना बेदरखौबो जाश्रनो हाथारलिया हाय लोगो । बाबुआ मालायखि दानिफ्रायनो खमलायनो सानफा गांफा गस्ला - फेन नांथारगौ ।”

सरलायाबो बुडे - जोंनियाबो लोगो जोंनियाबो, बाबु मिथुनि बिफाया बबे बबेनिफ्रायदि रां मोनबोयोथाइ । मोनाबिलिब्लाथाइ थप्लासेमानि रां गारत्राबना होफैयो । माइरं-दैरं, साहा-सिनि, ना-बेदरखौथ' बाद हो । बेसे जानो बेसे लोंनो । नै लोगो आंनि गोदोनानि बे नेकलेसा थाम रोजा रां खरसा जादों । नै बे आसाना गंफायाव ब्रैजौ रां लादों । खोमानि खेरुवाथ' दाबुंसै । आंनि गथ' मिथुनि जानायावनो सानफायाव जौसे रां नांगौ । गथ'आबो दानिफ्रायनो जि दुस्थ हाय लोगो ।”

गाव गावनि फिसाइखौ त्राब बावगारना रां-रुफा, जानाय-लोंनाय, गाननाय-जोमनायनि सायावसो सिनायथि होलायनायनि बादि नांलायो गावदांमोनहा । मानबायस्तिंनो रोडि हौवासा गथ'फोरनि सायावबो देदगानो बावाखै बिसोर ।

सोरबांसिन बाश्रा खिन्थानो आरो गुबुंसिन हखावनो हायो बिनिसो बादि नांनो हमो सरलामोनहा । सासेया सासेनि बाश्राखौ खोनसडाजासे गावहानि गाव हं-हं बुंलाडे । खुगाजौल' गाव गावनि समासारखौ बाख्यायना लानाय बाश्रायाव गोजोननो हायिलाय आर्थिनि आखाइनि आरो मेगननि इंगितजोंबो दिन्थिनो नाजाबावो बिसोर । दसेहालागै साहानि ग'लायाव दावराव जायो । जायगानिनो साहा लोंबाय थानाय सासे सेंग्रा सनाम बसुमतारीया बिसोरनि रायज्जायनाय बाश्राफोरखौ खोनाना सिरि सिरि लाजिखोमाना साहाखौनो लोंजोबालाबा ब्द ओंखारलाडे । फिसाइ सानैया रायलायनो लामा मोना जाना गावजों गाव मिज्लै-मिज्लौ नायलायबाय थायो । उनथाराव साहा लोंनायानो जायाखिसै बिसोरहा रायज्जायबायैनो । एसेयावनो दुमफावाबो गथ' सासे बाना हाबफैदों बाहादुरनि साहा ग'लायाव । दुमफावाबो मेट्रिक फास हिन्जाव । गावदां, सरलामोनजोंनो क्लास फ्रेण्डमोन सानसे समाव । खाफालनि लिरनाय गामिनि सासे प्राइभेट गुदि फरायसालियाव फोरोंगिरिजों हाबा जानादों दुमफावा । गामियाव राइजो जानांनय दुमफावनि महर मोखाड सिख्ला समनि समायना महर-मोखांनिफ्राय द्लामैनो सोलायबाय । साहा दखानाव सरलामोनखौ दा नुसनहैनानै दसे बबि जाना थाहोबो दुमफावा । गावदां सरला मोनहाबो दुमफावनि महरखौ नुना दसे गोमोनादों । थेवबो गावदाड दुमफावानो जाथारनांगौ सानना बिखा फोरदानना बुदों - “आयौ, दुमफाव नड होनलाय नों” ? दुमफावा “औ” होनना गोदोहां गारांजों बुडे । सरलायाबो फंसे बुडलाबानो थानो हायाखिसै - “दुमफाव, हाबाब फाग्लि, मा इसिबां गाज्रि जालांखो नोंनि महरालाय ? गोदोथ' नों जोंनिफ्रायबो रासिन बिउटिमोन ।” गावदाड सरलाजों लोगोसे बुंफाबावो- “औ और, दुमफाव इसिबां गाज्रि सेहेरा जालायलांनय सोर हौवाजों हाबा जाखो नों ? इस राम । मा खाफाल हाय लोगो, खाफाल ।”

दुमफावा मोखां सोम जाना फिनो - “मा खालामनो बाल, दुमफावनि खाफालाव जायजों दं बिजोंनो जानानै थांबाय । गामिनि सासे प्राइभेट गुदि फरायसालिनि फोरोंगिरिजों दिनै बोसोरथामनि आगोल आंनि हाबाया जाना थादों । हा-हु जेबो लाइ-लथर गैया आंनि फिसाइहा । जोबोर निखावरिथार । नोंसोरल” मोजाडै थांना थादो । जोंखौ हिसाब लायाब्लाबो जासिगोन ।” सरलाया खाब्रां रावयै बुडे - “जोंनि जिउखौ बुंनांगौनि जेबो बाश्रा गैलियाहाय दुमफाव । जों मोजांखासै अरायबो । फा नों नोंनि फिसाइखौ



जॉनि बाबु बिफामोनबादि टाउनाव थानो मोननाय मोजां साखिफोर नागिरनो थिननो हाया होमबा ?”

“औ, औ” – गावदाडबो हय खारिहरफायो ।

दुमफावा बारा गोबाव थानो हायाखैसै सरला मोनजों । गाव फिसिनाय दाउ माथामसोखौ फानफैना बे फैसार्जोंनो बायनाय रेवाथामसो खुन्दुंखौ आखाइयाव लाना “थानोसै आंहा” होनना ब्द ओंखारलाडे दुमफावा ग’लानिफ्राय । दुमफाव ओंखारलानायनि उनावबो दसे सावरायबावदों सरला मोनहा – फोरोंगिरि फिसाइब्लाथाइ बे बादिनोसै । थाना थानायनिखुइ थैनायानो साबसिन ।”

“सयथि नंथारगौहाय लोगो ।” – गावदाड “हय” खारिबावो । सानसे समाव नागारलायनो हायि गावदां सरलामोननिफ्राय बिब्दि बाश्रा खेनागोन होनना सिमाडवबो सानाखैमोन दुमफावा । लामा-लामा दुखुनि मोदै हुगारबोयो बियो । सम सम गावनि खाफालखौ खैरोम-दैरोम रागाबो जोंबोदों दुमफावा । दुखु-दाहाजों नाखेबजानाय जिउ सोलेरखौ सहायनो हायिलाय न’आव सफैग्रोमोना बिसिनायाव सलादें उन्दुसोना थाफैयो बियो ।

मोनाबिलिनि बमास नानाय समाव दुमफावनि फिसाइ समेन मास्टारा न’आव स’फैना बिसिखौ ओंखाम खुरनो थिनफैयो । थाराइबारियाव बड़’ थुनलाइनि गिदिर मेल जथुमदोंमोन । बे मेलानो थानोंमोन समेनाबो । हाबा मावनो रोडब्लाबो गावनि हारिनि मेल मिटिफोराव थानो खेनासंनो आरो गाव मावनो हानाय हाबाफोराव मदद होनो मोजांमोनो समेना । सानसेमानि ओंखाम मोनजायि जोबोद उखैदों बियो । खननै खनथामसो ओंखाम खुरनो थिनहरबाय समेना बिसि दुमफावखौ । नाथाय दुमफावनिफ्राय जेबो फिननाय मोनाखिसै । उनाव दुमफावनि खाथियाव थाना सोंदों समेना-

“मा जादों ? मानो इसिबां उन्दुसोना थाखो ? आं सानसेमानि ओंखाम मोनजायाखै, ओंखाम उखैबाय । ओंखाम खुरहैदो थां माबार ।” उन्दुयैनो खाबथां रावयै बंहरो दुमफावा

“नों खामायना लाबोनाय माइरड बहाथो ? माखौ ओंखाम संनो ? गावहानो उदैयाव ओंखाम गैया, साखि गैया बाखि गैया बिब्दि मेल मिथिं गाबाय थाना मा संसार खुंनो हाबोनो नोंलाय ? नाय, मालाय आंनि लोगो गावदां सरलामोननि फिसाइफोरा मा रोखोम रां-रुफानि बिगोमा जाबोदों । “लासिं सिं लाजिथारबाय आं नोंजों राइजो जानो ।” समेना सिं जाना बुडो – “बयनिबो खाफालाथ’ नडलाय दुमफाव । गावदां सरलामोनबादि खाफाल गोनांमोनब्ला नों आंजों हाबा जानानायबो नडमोन, बिब्दि दुखुनि लैथोआव गब’नानायबो नडमोन । आंबोथ’ निखावरि जानो लुबैनै जायाखैलाय ।

दिनै माइरं गैया होनना दहायनो मानोथो खिन्थायाखैमोन नोंलाय ? नोंनोथ’ फुडव आंखौ बुंदोंमोन ? हाथाइयाव दाउ फानहैनो होनना ।” दुमफावा रागाजों बंहरबावदों –

“दाउ माथामजों थाइबेसे रां मोननो ? बे रांजों खुन्दुंसो बायनो ना माइरंसो बायनो ? आंहाखि दखना गाननाड ? नों आंखौ जोबोद थगायबाय बाबु बिफा । गोदोबो हाबा जानायनि सिगां नों आंनो एल.पि. स्कुलनि फोरोंगिरिनि साखि नागिरना होगोन होनना थगायबाय, दाबो नों आंखौ ओंखाम बोथिसेखौनो सुखुयै जाहोनो रोडखिसै । नंनयनि नडिनि समाजनि हाबायाव ओंखारबाय थाना नोंहा मा मुलाम्फा जानो ? समाजाखि नोंखौ फोथांगोन ?” समेना जेरैबो बुंनो लामा मोना जायो । दसे उनाव गुरै रावयै बुजायनो बंहरबावो समेना –

नड, दुमफाव, बाश्राखौ नों मानो एसेबो बुजिनो सानदिया होमबा ? साखि होनो होनना आं नोंखौ थगायाखै । नोंथ’ मिथिगौ, दानि दिनाव साखि मोननांगौवा गोब्राबसै । बेनि सायाव आंनि साखियायो दाबो अरायथा जायाखै । साखिखौ लानो होमब्लाथ’ मोनालाय । थेवबो आं नागिरालासै जनानैथ’ थायाखैलाय । आरोबावसो नों आंखौ समाजनि हाबायाव थाबायनायनि थाखाय सानफ्रामबो रायबाय थायो । नाथाय आं समाजनो मा होनो रोंदों । दुमफाव ? नोंनो नुबाय दुमफाव, दानि मुगायाव बयबो सुबुंफोरानो गाव-गावनि हारिखौ दिखानायनि सिमां नुबाय । बयनिबो हारियानो गोजौआव गाखोनो हाबाय । जॉनि बर’ हारियाल’ गाहायाव गोगलैसोना थालांबाय । निखावरि होनना जों बयबो जना थाबोला, हारिया बोरैथो थाना थाबावनो ? नों लेखा गोरों हिन्जाव दुमफाव । नों, आं आरो जों बयबो एफा एफा हारिखौ बोखानो नाजायाबा मालाया सोरथो बोखांबावनो दुमफाव ? बर’ हारिनि राव-हारिमु फोथांनो लाखिनायनि रोनाव शिवराम, आमलाराम मोनहा दिनै थैगारलांबाय, जिउ बाउलांबाय, बर’ बिमाखौ सिबिनो थुलुंगा होलांबाय । नाथाय जों हारिनि थाखाय मा होनो हाखो ? बुं दुमफाव, बुं नों” ।

दुमफावखौ हाजासे बुजायना खामसालियावनो खामफ्लायखौ खर’सा लाना ओलैसो उन्दुलाडे समेना उखैनय देहाखौ बावगारना । समेननि बुंथिनाय फंफ्रोमबो बाश्राया दुमफावनि बिखा बिख्लोखौ सिंखावलाडे । बिनि मोदोमा हाव-हाव दुंखावलाडे । मेगन थाइनैया सिदोम जायो । समेननि सायाव ज्रोम अनखानाय फैयो । दसे उनाव हायाव उन्दुनाय समेनखौ फोजाखांनो बुडो दुमफावा –

“दहाय बेलासियाव एवना दोननाय खुरैसे जुखाम दंमोन । बेखौनो जासाबना थादो दिनै हरसेखौ । आंखौ निमाहा होदो ।” गुरुब खुलुमो दुमफावा फिसाइ समेनखौ । दुखुनि मोदैखौ हुगारना लायो । गोसोजों गोसो संसारनि हाबायाव फिसाइजों मदद

होफानो समाय लायो दुमफावा । मालाय हारिनि हिन्जावफोरा गय, साहानि ग'ला खालामना थांना थानो हागौब्ला बर' हिन्जावफोरालाय मानो फालांगि हाबा मावना थांना थानो हाया जानो ? आंबोथ' मानसि । दुफावा सानो । जेरै साननाय एरै मावनोबो ओंखारो दुमफावा । अखानायै गावनि फिसिनाय मानैसो दाउ बिमाखौ फानहैबावो बियो । बे रांजोनो माइरं आरो गोदान थिंखिल्ल गंसे लोबोयो हाथाइनिफ्राय । सामथाइबारि हाथाइया दुमफावनि न'निफ्राय बारा गोजान नड । दुब्लि दरसे बारबानो मोनहैयो । फुं -बेलासे बयबो मैगं-थाइगं फानहैसो लायो बर'फोरा बे हाथाइयाव । नेसनेल हाइवे लामाया गेजेरजोनो थंब्लेद सिंखावलांदों बे हाथाइखौ । दुमफावा लामा सेराव जायगा दाबसे लाना फिथा हमना फाननो आगान सुरजेने बे दिननिफ्रायनो । थाइसे, थाइने, थाइथाम दामोलैनो फाननो हादों दुमफावा सिगां दिनखालिनो । सेरनैसो माइरं बायनो आनथा मुलाम्फा थादों दुमफावा । बेबादिनो सानफ्रामबो लाजिनायखौ ब्राब नागारना बाया मोजोमा फिथानि फालांगियाव गोदोहाबना थायो दुमफावा । लासैनो हाथाइनि मानसिफोरा दुमफावनि फिथा बायै-बायै साहा लौलांग्रा हुदा जालाडे । खायसेया बुडे-

“हारसानि दाम गोसानि निमखि, पुरिखौ बायना जास्लाय-स्लाय बर'नि फिथायानो गाहामसिन ।” मा बर'ल' लामानि हारसाफोराबो मटर लाखि-लाखि दुमफावनि फिथाखौसो बायना जालांग्रा जायो । हमस्लाबनोसो हायाखैसै दुमफावा फिथाखौ । साननैसोनि उनाव गामिसेनि मावरिया हिन्जावसा गथ' हंलेखौ रुवाथि महरै लाना सिथावनिबो ग'ला खालामबावदों दुमफावा । उनाव फिथा-सिथावनि मुलाम्फाजों न' गंसे लुना साहानि ग'लाबो खालामबावो बियो । हाथाइनि राइजो राजाफोरा बयबो दुमफावनि साहा ग'लायाव सानफ्रामबो फुं-बेलासि थिब-थिब बुंन थाग्रा जायो । रांखौनो लाश्रनोसो हाया जालांबाय दुमफावा ।

द' मायथाइनि उननि बाथा । दुमफावनि फिसाइ समेननि फरायसालियाबो सोरखारि जालाडे । अखाफोर दानफायावनो फोरोंगिरिनि गोबां दान बान्था मोनो समेनाबो । दुमफावनि ग'लायाबो देरनायनिफ्राय गेदेरसिन जालाडे । गावनि रां थुबिलजों गंथामसो सि सुग्रा, उषा मेसिन बायना लाबोयो दुमफावा । उनाव गामिनि साथामसो लेखा गोरों सेंग्रा-सिख्लाफोरखौ आखाइयाव लाना सामथाइबारि हाथाइयावनो 'दुमफाव टेइलरि' मुंनि गंसे सि सुग्रा ग'लाबो फसंबावो । बिसि-फिसाइ सानैनि रां जमायना गोबां माइ गायग्रा हाबो लाबाय । न'खौबो गंथामसो ष्टेण्डदार्द थिंनि लुबाय । बुंनो थाडेब्ला राइजो जानायनि गोनां जिरादफोरखौ गासैबो सोरजिना लाखानो हाबाय समेन मोनहा ।

'नुबायथ' ? सानसिया नाजायोब्ला माखौ हाया ? गाव थिग थायोब्ला खोमसिनि

गेजेरजोंबो सोरांखौ नुनो मोनो । समेन दुमफावमोनहा गोदो मामोन दा मा जाखो ?” राइजो-राजाफोरा सावरि बादालियाव बयबो रायलायनो हमो । समाजनि हाबा मावगोरा मेंनो रोडिसमेन माष्टारा दासिमबो जिरायनो मोनाखै समाजनि हाबा मावनायनिफ्राय । दुमफावाबो दानिया जेबो हेंथा होलिया समेनखौ समाजनि हाबा मावनो थांनायाव । गोदोनि सेंग्रा गाहाइ सनाम बाबुआ राइजो-राजाफोरनि खाथियाव मोनसे थांखि फोसावदों - देगलाय सामथाइबारि हाथाइयाव बर'फोरनि रमान हांखोनि सोमावसारनाय समाव जिउ बाउलांनाय जोहोलावफोरनि मुडै मारबलनि जुगामि मुंख्लं खाम्फा लुना दोननायनि । बयबो राइजोफोरा मदद होदों सेंग्राफोरनि बे गोथार थांखिखौ । दुमफावाबो दिनै द' मायथाइनि आगोल बर' हारिनि सोमोन्दै फिसाइया बुजायनायनि जाथाइखौ गोसोखानांनै जोबोद दुखु फैखांदों । सनाम बाबुखौ लेंहरना बुंदों दुमफावा - “सनाम, गावनि हारिनि थाखाय आं जेबो हाबा मावना दिन्थिनो हायाखैसै । बर' हारिनि थांना थानायनि रोनाव जिउ बाउलांनाय जोहोलावफोरनि मुडै मुंख्लं गायसननो नागिरनाय नोंसिनि थांखिखौ आं जोबोर मोजां मोन्दों । हारिनि थाखाय जिउ गारलांनाय बै जोहोलावफोरनि मुडा जुगामि जाथों । बिसोर अरायबो ग'साइनि खाथियाव जायगा मोनथों । नों नैबे बा रोजा रांखौ नोंसोर मुंख्लं खाम्फा गायसननायनि हाबायाव बाहाय हैदो । आंनि गोरबो सिंनिफ्राय नोंसोरनि हाबायाव मदद हरफाबाय आं ।” सनामा रांखौ लानानै थोजासे साबायखर' जासिलाडे दुमफावखौ ।

अखाफोर दानथामनि उनाव मुंख्लं खाम्फानि हाबाखौ मावखांनो हाबाय । दिनैनि बे दिनखालिनो बर' हारिनि सोमावसारनायाव बर'नि जोहोलावफोरा थै होजेनना जिउ बाउजेनो । बर' हारिनि राव थुनलाइनि थाखाय । दिनैनि बे गोथार दिनावनो बेखेवनो थांखि लादों सामथाइबारि हाथाइनि मुंख्लं खाम्फाखौ । सामथाइबारि ओनसोलनि राइजो राजाफोरा बयबो दोबै-दोबै नुजाफैदों बे गोथार मेलाव । मुंख्लं खाम्फाखौ बेखेवनो थाखाय आलासि महरै लेंहरनाय जादोंमोन मेंनो रोडि-बर' जोहोलाव गुदि फरायसालिनि फोरोंगिरि समेन बसुमतारिखौ । दोबै-दोबै राइजो राजानि गेजेराव गोथार मुंख्लं खाम्फानि सेराव फसंहैयो समेन बसुमतारिखौ । दुमफावाबो थांप्लांदों फिसाइंक्लोगोसे बै आफादाव । बिसि-फिसाइ सानैनोबो 'बिबारि' फालि गोदोनायाव स्राय आलायखांनायनि उनाव सनाम बाबुआ माइकजों सिनायथि होयो समेनमोनखौ-

दिनै बे गोथार मेलाव नुजाफैनाय आइफोर-आफाफोर, राइजो-राजाफोर, जौनि दिनैनि गोथार हाबाखौ बेखेवनायनि आगोल आं जौनि गेजेराव नुजाफैनाय गेदेमा आलासिफोरखौ सिनायथि होग्रोनो आखाइयाव लाबाय । मुंख्लं खाम्फानि सेराव गसंनांनै

थानाय गेदेमा आलासियानो जादों – गोदोनिफ्रायनो गावनि संसारखौ नागारना बर' हारिनि हाबा मावबोनाय मेंनो रोडिजोहोलाव मुझी समेन बसुमतारी आरो बिथांजों लोगोसे गसंफाना थानाय गेदेमायानो जादों – बिथां आलासिनि जिउनि लोगो मुझीमा दुमफाव बसुमतारी। मख'जाथावदि, बिथां गेदेमाया बर' हिन्जावफोरनि गेजेराव बयनिखुइबो सिगांसिन सासे मुंदांखा हिन्जाव फालांगियारि। दिनैनि बे मुंख्लं खाम्फा गायसननाय हाबायाव बिथाड बा रोजा रां दान हरदों। राइजो-राजानि जानानै आं बिथांमोनो हाजासे साबायख'र जासिबाय।”

राइजो राजाफोरा बयबो आफा खब-खब खबहरो। समेन बसुमतारीया लासैनो आवगाय लांनानै माइकनि खाथियाव दिनैनि बे हाबाफारिनि सोमोन्दै फंनैसो बिबुंसार होनानै थरथिंसे दुखुनि मोदै हुगारो। बर' हारिनि गोदोनि, दानि आरो इउननि थांन थानायनि आरो बर' हारिनि राव थुनलाइखौ फोथांन लाखिनायाव जिउ गारनांनय जोहोलावफोरनि जिउ जारिमिननि बाथ्राफोरखौ फारि फारि बुंफोरलाडो बयनिबो सिगाडव समेना। हारिनि सोमोन्दै दुखु गोनां बुंलांनय फिसाइनि बाथ्राफोरखौ खोनाना हुख-हुख गाबो दुमफावा। राइजो-राजाफोराबो दुखुजों मोदै हुगारो। दसे उनाव बिबुंथि होखानायनि उनाव हारिनि थाखाय जिउ गारलांनय जोहोलावफोरनि मुंख्लं खाम्फाखौ बेखेवना होयो समेना। राइजो राजाफोरा बयबो खब-खब आफाखबना होबावो। साखिनिफ्राय सुथि लाना फैनय फिसाइफोरजों गावदां आरो सरला मोनहाबो बे मेलव नुजाफैदोंमोन। मानि थाखाय इसिबां गिदिर मेल जथुमुखो बेनि जेबे उदिस मोनाखिसै बिसोर। दुमफावनिथिं मिज्लौ मिज्लौ नायहरनानै सरलानि खोमायाव स्रोद बुंखोमादों गावदाडा- “आय' माथो दुमफावाबो गुफुं जाथारबायलायो। फाग्लियाखौ सिनाय हरनोसो हालायथाराखै हाय।” सरलायाबो लासैनो फिन होदों गावदांनि खोमायाव- मालाय मानसि गिदिर जाबाय नालाय बाल। थु। थांदिनि।” सानैबो ज'नायनिफ्राय दुफुं सिखारो। थांनय मुडैनो गावदाड बुंलांबावो- “मिथिं जानायखौनो आंलाय मानिबा फुजा, मेल, गान-बाजोनासो जागोन सानदोंमोन। बिब्दि होननानै मिथियोब्ला फैग्रांथारामोनहां।” □

#### लिरगिरिनि सिनायथि:

**जनिल कुमार ब्रह्म:** जनिल कुमार ब्रह्मआ 1951 मायथाइनि 30 डिसेम्बर खालाराव टिपकाइनि नायगावाव जोनोम मोनो। बिनि बिफानि मुड रमेन्द्र नाथ ब्रह्म आरो बिमानि मुड बगन्दिश्वरी ब्रह्म। नायगाव गुदि फरायसालियाव फरायजेननानै 1970

मायथाइयाव टिपकाइ हाइस्कुलनिफ्राय मेट्रिक पास खालामो। 1977 मायथाइयाव क'करझार कलेजनिफ्राय बि.ए. पास खालामो।

टिपकाइ ओनसोलनिफ्राय ओंखारबोनाय लिरगिरि जनिल कुमार ब्रह्मआ ओनसोलावनो टिपकाइ कालिचरण ब्रह्म एम भि स्कुलनि गाहाइ फोरोंगिरिनि हाबा मावनानै दड'। जनिल कुमार ब्रह्मआ गुबैयै सासे सुंद सल' लिरगिरि। बिथांनि सल'फोरा गुबुन गुबुन लाइसिफोराव नुजाबोदों। बिजलि बरुवा, अरगें, आस'खान्दा, आलासि, रेग'दाहोना बायदि बायदि। ब्रह्मनि सल'आव गामियारि सुबुंनि जिउ खुंनयाव नुजानाय दुखु-दाहा, गांनय-उखैनय, जेननाय-देरहानायनि रैरुब सावगारि बेरखांदों। बिथांनि सुंद' सल' जथाइ बिजाबनि मुड “जादों दुमफावनि फिथा” (2005)। बिथांनि रेबगननिफ्राय गेजेर गेजेर खन्थाइबो जोनोम मोनदों।

1985 मायथाइयाव जोनोम मोननाय “बर' रेबग्रा जथुम'नि गिबि नेहाथारि ब्रह्म बिथाड 1989-2005 मायथाइनि थाखाय लेडइ आफादगिरिनि बिबान बानदोंमोन। बिथाड 'अरंनि लाइजाम', 'जनजाति' लाइसिफोरबो सुजुदोंमोन।

#### सौंथि :

1. दुमफावा सोरमोन? जिउ दावहायाव बियो माबोरै देरहासार जानो हादोंमोन?
2. दुमफावनि फिसाइनि मुड मामोन? बिनि आखुथाइनि बागै सावरायना लिर।
3. सुंद' सल' महरै “दुमफावनि फिथा”या बेसे जाफुदों सावरायना लिर।
4. “दुमफावनि फिथा”नि गेजेराव बर' हारिनि माबादि सावगारि बेरखांदों फोरमायना लिर।
5. जिउनि गुबै थांखिनि सोमोन्दै लिरगिरिया “दुमफावनि फिथा”नि गेजेरजों मा बुंनो सानदों?
6. दुमफावनि गामिनि मुड मा?
7. दुमफावनि फिसाइनि मुड मा?

# जोंनो सोरां नांगौ

- चरन नार्जारी

## नैथि बोसोर

- रायथाइ
- खन्थाइ
- सुंद' सल'

सान आरो हर, सोरां आरो खोमसि बे मोननैखौ लानानै बैसोमुथिया अरायबो गिदिंगासिनो दं। सानाव जों सोरां मोनो आरो हराव जों खोमसि मोनो। सोराडव जों जेबो जिरादखौ मोजाडै नुयो, नाथाय खोमसिनि गेजेराव गोग्लैयोब्ला जों जेबो नुनो मोना- गोसोआव गिनाय फैयो। बिब्दिनो मानसिनि गोसोआवबो सोरां आरो खोमसि दड'। गियानानो जादों गोसोनि सोरां, बै गैयाब्लानो जों गोसोखौ खोमसि दरसि मोनबाय थायो। मानसिया बे गियानखौ मोननो हागौ, बेयो बिजिर बिजिर रायज्जायनो गोनां बाथ्रा।

बे गुरस्लायसुला मुलुगाव मानसियानो बयनिखुरैबो देरसिन। मानोना बियो गावनि गोसो मेलेमजों गाज्जि मोजां सानखानानै, थांना थानायनि आरो गोजौ फारसे गाखोलांनयनि राहा आरो लामा दिहुनानै लानो हागौ। दाउमा मैमाफोरा बिदि खालामनो हाया। नाथाय मानसिया बिदि होनब्लाबो खोमसि अनागारनिफ्राय जेब्लाबो बारग 'जोबनो हायाखै। मोजां गाज्जि सायख 'नानै लानो रोंगौब्लाबो मानसिया मि आखुखौ नागारनो हायाखै। गोबां समाव बेनो जोंनि मोजां साननायखौ सिं खालामना दोनो। बेनि थाखायनो मानसिया गोरलैयैनो मोजां लामाजों दावगालांनो हाया। गोजौआव उथ्रिलांनो थाखाय बेनिखायनो बे मि आखुखौ नारदबनानै सिं खालामनानै दोनो बयबो नाजानांगौ।

संसाराव जोनोम लानानै अराय जिउनि गियान बुथुमनानै मानसि बादि मानसि जानानै थांना थानो हायाबोला गासिबो फैमाल। थांनानै थानो थाखाय जोंनो मा नांगौ ? ओंखाम जानानैल' मानसिया थांनानै थानो हाया। बिदि मोनब्ला जों दाउ अमाफोरबादि जानानै थागौमोन। न'-बां, हा-हु, मैसो-मोसौ आरो रां थाब्लानो मानसिया मानसि जानो हाया। बेफोर थासेयावबो बेनि लोगो लोगो मानसिनो सोरां नांगौ - गोसोनि सोरां, मेलेमनि सोरां। गुरस्लायनायनि लोगो लोगो सुबुं सोदोमस्रियाबो गोजौनिफ्राय गोजौसिनाव सिगांलांगासिनो दड'। दानि मुगायाव बोलोजों नड, गोसो आरो मेलेमनि सानखानायजोंसो गसंथानो हायो। बेयो मेलेम सुनायलायनायनि जुग। बयबो नुनो मोनो, अन्थाइया बेसेबां हुयो एसेबां स्लिम स्लिम गोजों जासिनो।

बिब्दिनो जेसेबां गोजों, गोजौ सानखाडो एसेबां गोसोआ गोथौ बाश्राखौ सानखांसिननो हानाय जायो। बेनि थाखायनो सानखांनो नाजानायखौ गारनानै सोरजिसुला गोसोखौ माराम जाहोनो नाड।

सोरां एबा गियाना बबेनिफ्राय फैयो बेखौ मोननो जों खुरखाव खुरसि नायगिर नाड। बेखौ जेसेबां सोल्लोंगोन एसेबां रोंगोन, मुलुगनि बाश्राखौ मोनथिसिनगोन। बे मुलुगाव मोनथिनो गोनां खौरांनि अनजिमा गैया। दुलाराय संसारानो जौनि हाबाथिलि। जौनि हाबायानो जौनि लामाखौ दिन्थिगोन। नाथाय जौनि मावनाय आरो सोल्लोंनायनि फिथाइया जौनि मोजांनि थाखाय जानांगोन। गावनि हाबाखौ गात्रिमोन एबा मोजांमोन बेखौ मावफुंनो हानायानो मोनसे गिदिर सोल्लोंनाय।

बयबो मानसियानो जेब्लाबो सुखुखौ नागिरो। जौनि नागिरनाय लुबैनायनि अन्जिमा गैया। नाथाय लुबैनायमानिखौ बे मुलुगाव रावबो सुफुंनो हाजोबा। हानायमोनब्ला गियान मोननो थाखाय मानसिनि नाजानायबो थानाय नडामोन। उदैन उखैनायखौ सुफुंनो हागौ, नाथाय गोसोनि उखैनायखौ जेब्लाबो सुफुंनो हाया, आरो बेनो सोरां मोननायनिबो साबसिन लामाया। जेबो रोडि नेहाड जाम्बा-जाम्बिफोरा गावनि उखैनायखौ मोनथियो, नाथाय बिसोरहा गोथौयै साननो हानाय गोहो गैया। बेनिखायनो बिसोरहा गोसोनि उखैनायबो बारा गैया। नाथाय मानसिया जेसेबां सोरां मोनो एसेबां साननो हानाय जानानै फैयो आरो बिसोरनि राइजो जानायनि लामायाबो जोबोरैनो जेथो गोनां जालांसिनो। बे जेथो गोनां लामाखौ बोदलानानै लांदां खालामनो थाखाय राहा सानखांनायनि गेजेरजों गुवारनिफ्राय गुवारसिन जाबोयो। बेखौनो बुडे सोरां मोननाय।

गाव हारसिडै गियानखौ मोनब्लाल' जाया। बेखौ बयबो मोननायबादि जेरावबो सारदलानानै होनांगौ। बिब्दि खालामब्लासो दुलाराय सुबुं माहारिनि मोजां जागोन। मालायखौ फोसाबनायनि सिगां गावखौ फोसाबग्रोनांगौ। गाव मोजां जाग्रोयाब्ला नों मालायखौ माबोरै मोजां खालामनो हानो। साननानै नायनो गोनां बाश्रा - मानसियानो मानसि खालामो, आनान ग'साइ सोरजिगिरिया बयखौबो मानसि मुझीयै बयखौबो समानैनो दानानै हरदों। जोनोमनिफ्रायनो सोरखौबा मोजां, सोरखौबा गात्रि, सोरखौबा उन्दै, सोरखौबा गिदिर, सोरखौबा आखल मोजां, सोरखौबा आखल गात्रि खालामनानै दयाखै। मोजां-गात्रि जानाया जोनोम जाखांनायनि उननिसो बाश्रा। बेनि थाखाय मानसियानो दायनिगिरि, ईसोर नड।

सोरांखौ मोननो लुबैयोब्ला गोसोआव आसुसु मोननाय, लाजिनाय एबा मान थांजानो गिनाय, बेफोरखौ नागारनांगोन। मोनथिनो गोनां बाश्राब्ला उन्दैनफ्रायब्लाबो नों मोनथिनानै एबा सोल्लोंनानै ला। बेयो लाजिनायनि बाश्रा नड। गिदिर गिदिर लेखा बिजाब फरायब्लानो गियानखौ मोनजोबनो हाया। मेगनजों नुनानै, खोमाजों खोनासंनानै गोसोजों साननानै, आखाइजों मावनानै आरो खुगाजों रायज्जायनानै मानसिया बायदि बायदि गियानखौ मोननो हागौ। नाथाय जौनि थांखिया गोजान आरो गोथों जानांगोन। रेजें आरो थौले गोसोनि साननाया जेब्लाबो मोजाडै जाफुंनानै फैया। बेनिखायनो गोसोआ गोथौ आरो साननाया गिलिर जानांगौ।

सानस'हायि समनिफ्रायनो दिनैसिम मानसिनि मेलेमा लासै लासैयैनो हासार गोनांसिन जाबोगासिनो दड'। मानसिनि गोसो मेलेमजों सान हर सानखांनानै नुफेरै बायदि बायदि गिदिर गिदिर मुवा दिहुननायफोरखौ नुनानै दिनै मुलुगाव मानसिफोरानो गोमोहाबदों। मानसिनि मेलेमाव एसेबां गोहो दं। बेफोर जायखि जाया नों मोननाय सोरांखौ लानानै नों जेब्लाबो दुगा दाजा। गावनि गोहोखौ लानानै देरगानाया गोजौआव गाखोनायनि नेरसोन नड। सांग्रेमा एम्फौआ गावनि मोलेले जौनाय लानानै बिरबायबायो। नाथाय अखाफोरनि मुलुग साथिफ'बनाय सोराडाव बेयो जौथिनो हाया- लाजिनाडो। सोरांखौ मोननानै जेब्लाबो सोरांनि लामा ला। इनाय अनागार खालामब्ला बयजोंबो मुगैजागोन। नों मोजां जायोबोला मुलुगाव सासे गात्रि मानसि जोबगोन। बयबो बिदि जायोबोला मुलुगाव गोजोन फैगोन।

मानसिनि जिउवा गावनि थाखायल' नड। माहारि दानायाव माहारि फोसाबनायाव नोंहाबो मोनसे गिदिर बिबान दड'। मानोना, नों आं बयखौबो लानानैसो जौनि समाजा। नाथाय नों गावखौ एबा गावनि न' - बांखौ सिगांनो गोरा गोगोम खालामनानै लाग्रोनांगोन। नडब्ला नों माबोरै माहारिनि हाबा मावनो हानो ? बिसि फिसाइनि गोथौ अनज्जायनाय, गथ' गथायखौ मोजाडै फोरोंनानै मानसि खालामनाय, गावनि माहारिखौ गोसोजों मोजां मोननाय बेफोरनो थांना थानायनि नंगुबै गोनां जिराद। जायनि न'आव अनज्जायनाय गैया, जेब्लाबो दावराव-दावसि बे न'आव सोरां फैया। सिंखि-बानलुनि नांज्जाय खमज्जाया ओरैनोसै, बयनिबो न'आव दड'। नाथाय बिदि होननानै न'नि गोजोनखौ खोमानानै लानो नाड। बेबादिब्ला माइनाव खारगोन, खोमसिया साग्लोबसिनगोन। अनज्जायनाय आरो मोजां मोनज्जायनायानो मानसिनो जायखि जाया हाबाखौ मावनो बोलो होफैयो।

गावनि गोसोखौ हगारसादलानो नाड। गावखौ गाव हमथानो हानाया मोनसे

गिदिर सोल्लोनाय । खोनासंथावयि गात्रि रावखौ खोनासंनाय, मुगैथाव हाबा एबा मुवा नायनाय, दांनाय, मोनामसुनाय आरो सोलानाय बेफोरनिफ्राय गावखौ हमथानानै लाखिनांगौ । उननि गुबुन मोनसेया जादों, गोसो जानानै गात्रि हाबा मावनो साननायनिफ्राय गोसोखौ हमथानाय । नॉनि गोसोआ जायखौ गात्रि सानो बेखौ दामाव, गोसोखौ हमथानो हायाब्लानो दुखु मोनो - खोमसि फैयो । खोमसि फैब्ला मानसिया नडिखौबो नंगौ सानफ्लाडो । मावनांगौ हाबाखौ मावनो दाबा । मावनो बानायानो जेबो दुखुनि गुदि । संसारखौ गुवारै नायनो नाजा । नॉनि साननायजों, नॉनि राव आरो हाबाजों मालायनि गोसोआव जेब्लाबो दुखु दाहो । गाव मोजाडै मोनथियि, खोनाद्लाबायनाय जाथावयि बाश्रा लानानै दल दादामद्लाबाय । जेब्लाबो नंगौखौ सान, नंगौखौ बुं आरो थारखौ माव । बिगोमा गैयियाव मालायनि बेसादाव आखाइ दाहो । थगाय-थसि खालामनानै, खावनानै आरो बुखेब-सुखेब, सिगि-सग' खालामनानै, मालायनि मुवाफोरखौ लानायनिखुरै गात्रिसिन फाफ मा थाबावनो हागौ । जाम्बा-जाम्बिखौ फोरों आरो बोलो गोहो होनानै हानायमानि हेफाजाब हो । होमब्ला नों सोरां मोनगोन नॉनि जिउवा गोथार जागोन, मुलुगा नोंखौ मोनथिगोन । नॉनि मोदोम, नॉनि गोसो नॉनि सोरगिदिं गासिबो गोथार जानांगोन । बयनिखुइ मैला गैयि गोथारसिन जानांगोन नॉनि राइजो जानायनि राहाया । बिब्दि राइजो जानो हायोब्ला मानसिनि संसारावनो सोरगो मोनो ।

बांसिन मानसिया गावखौ बयनिखुइ दुखु गोनांसिन होनानै साननानै लायो । बेबादि साननाया हामा । दाउसि-दाउला, एमफौ एनला बयहाबो दुखु दड' । दुखु मोनदोंबोला दुखुखौ होखारनो राहा दिहुननो नाजा । गावखौनो गाव हावरिया गैजा रोडि होननानै गावनि गैयिनि बाश्राखौ मालायनि सिगाडाव फोरमायनानै दाला । मालाया जॉनि गैयिखौ होखारफैनाय नड । संसारखौ गुवारै नायनो नाजा । जा एसे दड' गावनि थानायखौ लानानै बेजोंनो मिनिबाला बाला थानो नाजा । फरायनो रोंगौब्ला गियानजों बुंफबनाय गोथार बिजाबफोर बुथुमनानै फराय । नॉनि गोसोआ गोजोनगोन । नाथाय फाफ गोनां गात्रि बाश्रा थानाय बिजाबफोरखौ दा फराय । नॉनि गोसो-आखलाव जिनिद नांनो हागौ । इसोरखौ जेब्लाबो गि आरो गोसो सोलेर होनानै सिबिबाय था - नॉनि गोसोनि खोमसिया नागारलांगोन । नों अरायबो सोरां मोनगोन ।

मालायनि मोजां नुयोबोला नोंबो मोजां मोन । मालायनि मोजांखौ नायनो हायि मानसिया माहारिखौ मोजां मोननो हाया । माहारिखौ मोजां मोननो हायि मानसिनि गोसोआव दुलाराय बैसोमुथिखौ मोजां मोननाया माबोरै फैनो ? बे संसाराव

सानथ्र 'हायि गुबुन गुबुन बायदिसिना हारिनि मानसि दड'ब्लाबो जों बयबो न 'खरसेनि मानसिसो । दुलाराय संसारनो जॉनि न' । संसारनि बयखौबो मोजां मोननायबादि देरसिन मोजां मोननाय जेबो जानो हाया । उन्दै उन्दै नांज्लाय खमज्जलायाव जेसेबां बाहागो लागोन, एसेबां नोंबो गाहायावसो गोग्लैसिनगोन । नंखाय बाश्राजों मालायखौ सोलिग्रा मानसिया रावखौबो फोथायनो रोड जायो । बेनो बिनि मोननांगौ बान्था । उन्दैनिफ्रायनो हानायमानि दिनै एसे, गाबोन एसे सोल्लोनाय लायाब्ला उनाव नों हांमा सुरहाब सुरहाब गाबोब्लाबो मोननाय नड । अरायबो नॉनि गोसोआ उन दाहाजों गेल्लेनांगोन । नॉनि दुखुनि खोमसि हरा सोरांनाय नड । नॉनि खाथियाव फैनानै रावबो आय' होनफैनाय नड ।

थानाय समा जेब्लाबो फैफिना । समनि लोगो लोगो नॉनि बैसोयाबो हालो-दैलो थांफागासिनो दड' । बेनिखायनो फिथाइ थायनो रोडि हाबायाव मोनफिननो गैयि समखौ बाहायद्लाबायनो नाड । नॉनि लुबैनाय, नॉनि उखैनायखौ सुफुनो सानोब्ला नॉनि जिउनि थांखिया जेब्लाबो गिदिरथार जानांगोन । मोजांनि थाखाय नॉनि थांखिखौ रावबो हमथानो हाया । गावखौ बयजोंबो मोजां मोनजानो लुबैयोब्ला नों मालायखौ मोजां मोनगो । मालायनि हेफाजाब मोननो लुबैयोब्ला नों मालायखौ हेफाजाब होगो ।

इसोरखौ नों जेब्लाबो सिखोमानो हाया । बेनि मैयाखौ रावबो मोनथिस' हाया । बियो मुलुग नाडैनो जेरावबो जेबो मुवा-जिरादावनो दड', नों जेरावखि जायखि हाबा मावा, बियो मोनथिगौ, बिनो संसारनि गुदि, बिफा आरो बयनिखुरैबो गोहो गोनांसिन । इसोरा नोंजों जेरावबो लोगो लोगो थाफागासिनो दं । बेनि थाखायनो नों गात्रि हाबा मावखोमानो दासान । इसोरनि अननायावसो नों मानसिनि जिउ मोनदों । बेनि अननाय आरो सारसिनायखौ खरआव लानानै नों आगान सुर । अननायनि गेजेरजोंसो सोरां फैयो । थाना थानो जोंनो सोरां नांगौ । □

### लिरगिरिनि सिनायथि:

**चरण नार्जारी:** चरण नार्जारीया 1933 मायथाइयाव क'कराझारनि हातीमाथा गामियाव जोनोम मोनो । बिफानि मुड खगेन्द्र नार्जारी आरो बिमानि मुड गोदेश्वरीमोन । गामिनि गुदि फरायसालियाव फरायजेननानै क'कराझारनि गवर्णमेण्ट हायार सेकेण्डारि स्कुलनिफ्राय 1955 मायाथाइयाव मेट्रिक पास खालामो । 1959 मायथाइयाव कटन कलेजनिफ्राय बि.ए. आरो 1961 मायथाइयाव राजखान्थि आयादायाव गुवाहाटी मुलुग सोल्लोसालिनिफ्राय एम.ए. पास खालामो । 1962 मायथाइयाव बिथाड एल.एल.बि. खौबो पास खालामो ।

बिथां नार्जरीया फरायसा समनिफ्रायनो थुनलाइ सोरजिनायाव गोसो होदोंमोन । गोबां लाइसिफोराव बिथांनि खन्थाइ, रायथाइफोरा गोसारद्लानानै दं । बड' साहित्य सभानि मोखां लाइसि The Bodo, असमर जनजाती आरो गोबां लाइसिफोर बिथाड सुजुनानै दिहुनदोंमोन । बिथाड चकुल' मुनि असमीया रावजों बिजाब गांसेबो दिहुनदोंमोन ।

थुनलाइ सोरजिनायाव गोसो होहांनायावनो बिथाड राजखान्थियाव ओंखारनांगौ जानानै थुनलाइनि फारसे गोसो खेलेंसा जालाडे । बिथां नार्जरीया फरायनायखौ फोजोबनानैनो क'कराझार कर्टआव एडभकेट जायो । बेनि उनाव क'कराझार कलेजनि फोरोंगिरि जायो । बेखिनि समावनो बिथांनि थुनलाइ सोरजिनाया जादोंमोन । बेनि उनाव बिथाड पार्लियामेण्टनि सोद्रोमा सायख'जायो । बिथाड आसाम एसेमब्लिनिबो सोद्रोमा जायो । नार्जरीनि लिरनायफोरनि गेजेरजों हारि अनसायनाय, हारिमु आरो जारिमिनारि आयदाफोरा जायगा मोनदों । बिथाड दासान्दि बर'फोरनि जांखिखांनयनि जारिमिन लिरनायाव मुखुब जानानै दं ।

### सोंथि :

1. 'जोंनो सोरां नांगौ' -रायथाइयाव सोरांखौ मारजों रुजुदों ?
2. बबे मोननैखौ लानानै बैसोमुथिया अरायबो गिदिंगासिनो दं ?
3. सान आरो हराव जों मा मोनो ?
4. गोसोनि सोरांखौ माबादि मोननो हागौ ? बे सोराड बबेनिफ्राय फैयो ? । सोरांखौ मानसिनो मानो नांगौ सुंद'थै फोरमाय ।
5. सोरांखौ मोननो थाखाय मा माखौ नागारनांगौ रायथाइनि हेफाजाबै फोरमाय ।
6. सोरांखौ गियान आरो खोमसिजों आगियानखौ माबादि रुजुनाय जायो ? गियान जायोब्ला सुखुआ माबादि फैयो आरो अगियानजों दुखुआ मानो थाफायो रायथाइनि हेफाजाबै फोरमाय ।

### बेखेवना लिर:

- (क) अन्थाइया जेसेबां हुयो, एसेबां स्लिम स्लिम गोजों जासिनो ।
- (ख) गाव हारसिडै गियानखौ मोनब्लाल' जाया ।
- (ग) उदैन उखैनायखौ सुफुंनो हागौ, नाथाय गोसोनि उखैनायखौ जेब्लाबो सुफुंनो हाया ।
- (घ) मालायखौ फोसाबनायनि सिगां गावखौ फोसाबप्रोनांगौ ।
- (ङ) नों मोजां जाबोला मुलुगाव सासे गाज्जि मानसि जोबगोन ।
- (च) मानसिनि जिउवा गावनि थाखायल' नड ।
- (छ) गावनि गोसोखौ हगारसारद्लानो नाड ।
- (ज) थानाय समा जेब्लाबो फैफिना ।
- (झ) अननायनि गेजेरजों सोरां फैयो ।

## बर'आव सावरायनाय थुनलाइ

- ब्रजेन्द्र कुमार ब्रह्म

बर' लिरगिरि आरो माखासे फरायग्राफोरनिफ्राय मोनसे अजद जों खोनानो मोनफ्लायबाय थायो - बर' थुनलाइयाव आथिखाल खन्थाइ आरो सल'आ एसे नायथाव थाव जायगा आवग्रिनानै दंब्लाबो, सावरायनाय थुनलाइया जोबोद गेसैं जानानै दं, ओरै बादि गेसैं दि लाथिख' होननानैबो बुंजायो । अजदा नंखायद्रायबो नड । 1884 मायथाइयाव ओंखारनाय सिडनी एण्डेलनि खुगा मेथाइ, सल'बाथा गैया, गैया बेफोरखौनो बर' थुनलाइनि जोनोम होननानै लायोब्ला एबा इं 1921 निफ्राय 1940 (1952) सिम 'बिबार' मुगाखौनो बर' थुनलाइनि रेनेसा मुगा होननानै लायोब्लाबो, बे गोलाउ समनि गेजेराव सावरायनाय थुनलाइनि बाथ्राखौ दोन, थुनलाइनि गुबुन गुबुन आयदाया जेरै - खन्थाइ, रायथाइ, सल' बेफोरखौ सोरजिनायानो सोमोनांथावथाव गेसैंथार । इं 1884-1920 मायथाइ (जाय समखौ मिसनारि मुगा होननानै खायसे बुडे) सिम बे गोलाउ 36 बोसोरनि गेजेराव थुनलाइ सोरजिनायानो गैया जेब्ला सावरायनाय थुनलाइनि बाथ्रायाबो थानो हाया ।

अदेबानि एसे गोजोनथाव बाथ्रादि 'बिबार' मुगानि गेजेराव ओंखारनाय गुबुन गुबुन आयदानिखुइ गुबुन रावारि थुनलाइयाव जानाय बादि बर'वावबो खन्थाइनि अनजिमायानो बांसिन आरो माखासे खन्थाइगिरिनि खन्थाइफोरा गुबुन रावारि गोजौथाखौनि खन्थाइफोरजों समानै रुजुजाथाव । बेफोरनि गेजेराव ईशान मोसाहारीनि गुबै रमान्ठिक खन्थाइ, रूपनाथ ब्रह्म, मदाराम ब्रह्म आरो प्रम'द चन्द्र ब्रह्मनि र'मान्ठिक मिष्टिक खन्थाइ माखासेखौ मख' जायो । बिसोरनि अनगाथैबो बिबार मुगायाव गोबां खन्थाइगिरिया जेसेबां खन्थाइ सोरजिदों, बेफोरनि बांसिनानो हारि जांखिहोनाय आरो बरनाइलु आखुनि । काली कुमार लाहारीनि माखासे र'मान्ठिक आरो फेस्ता खन्थाइफोरखौबो बेयाव मुंख' जाफायो । बेफोरखौ नायनानै गुबुन आयदानिखुइ खन्थाइ आयदानि सावरायनाय थुनलाइ सोरजिनायनि बांसिन खाबु दंमोन, नाथाय बै मुगानि रावबो लिरगिरिया बेनि फारसे गोसो होवाखिसै । बै समाव 'बिबार' 'जेनथखा', 'हाथरिं हाला' लाइसिफोराव आनन्दराम मुसाहारी, रूपनाथ ब्रह्म, प्रमद चन्द्र ब्रह्ममोन बादि माखासे रायथाइगिरि ओंखारदोंमोनब्लाबो बिथांमोननि रायथाइखौ गुबै सावरायनाय

थुनलाइ फारियाव फसंजाथावा । बिसोरनि रायथाइ आयदानि आयदायाबो गुसेब आरो गोरलै, बिसोरखौ थुनलाइ सावरायनायनि जेथो गोनां आयदायाव आखाइ होनाय एबा गोथौ सानस्रिखौ बिजिरनाय हाबायाव गोसो होनाय नुनो मोना ।

बेनि थाखाय बिसोरखौ दाय होनो सानोब्ला गोरोन्थि जागोन । मानोना बे आवथायाव आखाइ होनो बै समनि लिरगिरिफोरा माखासे आख'-फाख' एबा हेंथा दंमोन । बै हेंथाफोरा जाबाय-

(1) गोरलै आरो गेसैं थुनलाइ सोरजिनायनि जाहोनाव बेफोरनि सायाव सावरायनो हानायनि गुवार आवथा आरो खाबुनि आंखाल । फोरमान हिसाबै नुनो मोननाय जायो - जाय रावनि थुनलाइया जेसेबां जौगानाय आरो गोसारनाय बेनि सावरायनाय थुनलाइखौ एसेबां गोथौ, गुवार आरो धोनि, जैरै - इंराजी, बांला, असमीया बायदि । बे मोनसे जाहोननि थाखायनो जौनिनो उसुंसे खासिया थुनलाइ, मणिपुरी थुनलाइ, गार थुनलाइयावबो बे आंखालखौ नुनो मोनो ।

(2) थुनलाइनि गुबुन आयदानिखुइ सावरायनाय थुनलाइ सोरजिनाय हाबाया औरैनो गोब्राबखा । हाबाखौ मावनोब्ला लिरगिरि जाब्लाल' जाया, बेनि थाखाय नांगौ गोबां आरो गोथौ गियाननि लोगो लोगो उदां गोसो, सानस्रि बिजिरनो हानायनि गोहो आरो लोगोसे गावनि मतामत फोरमायनो हानायनि गोहो, आर्ट राव-आदब, प्टाइल, खबाम, गहेना बायदि थुनलाइनि दालाइ आयदाफोरनि गियान । जाय समाव मुलुगनि गुबुन रावारि थुनलाइयाव बायदिसिना गोदान गोदान आनजाद सोलिदों, बे समाव 'बिबार' मुगानि लिरगिरिफोरा थुनलाइनि रोखोमारि आयदा-आयदासा थुब्रायनाय गुवार फोथाराव आगानल' होजेनदोंमोन होनानै बुंनो हायो, बेनि जाहोनाव बिसोर थुनलाइनि गुदु फोथाराव हाबनो खाबु आरो गोहोखौ मोनाखैमोन ।

(3) 'बिबार' एबा 'बिबार' मुगाखौ मुंख'नायनि लोगो लोगो बै समनि हारि फोजाखानो, फोसाबनो हाबिलास गोनां माखासे, फरायसाफोरनि दैदेननायाव जोनोम मोननाय " 'बर' सात्र सन्मिलनी" आरो " 'आसाम बर' सात्र सन्मिलनी" नि बायदि बाश्रायाबो गावनो गाव फैफायो । बै समाव " 'बर' सन्मिलनी" बादि गुबुन गुबुन गौथुम दंमोनब्लाबो गुबैयै दुलाराय बर' माहारिया 'आसाम बर' सात्र सन्मिलनीनि दखलावनो दंमोन होनजायो । समनि फाख'नाव बायदिसिना जाहोननि थाखाय गावसानानै सेरखाय-बेरखाय जानाय बर'फोरखौ खौसेयाव लाबोनानै गेदेमा बर' माहारि दाफिननायनि थांखिजों लोगोसे बे माहारियाव हाबनानै थानाय अगेन

आखुफोरखौ सोलौंथाइनि हेफजाबै बोस्रानो नाजानायाव फरायसाफोरा मुकुब । बेफोरखौ मोगथाडव महर होनो माबा गांसे गांनै लाइसिनि गोनांथिखौ मोनदानानै दिहुनदोंमोन । 'बिबार' नि, समब्रा-समब्रि ओंखारदोंमोन 'जेनथखा', हाथर्खि हाला, आरो गांफा गांनै बिजाब । नोजोर होनो गोनां दि बेफोर लाइसिनि गेजेरजों ओंखारनाय बर' थुनलाइया फरायसाफोरनि गोरलै-गेबें आखाइनि सोरजिनाय, गेदेमा, थुनलाइगिरिनि सोरजिनाय नड । बेनि थाखाय बै मुगानि लिरगिरिफोरनिफ्राय सावरायनाय बादि गोब्राब आयदानि थुनलाइ मिजिं खालामनो हाया ।

(4) हारि फोसाबनो गोसो मोदोम होथाबनानै हांखुर जानाय फरायसा लिरगिरिफोरा गावसोरनि गौथुमारि हाबायाव नांथाबनानै थानो गोनां जानायलाय थुनलाइनि साधनायाव गोसो होनो समखौनो मोनाखैमोन ।

(5) जानो हागौ बै मुगायाव गोबां लिरगिरिया नायजाब थुनलाइ (नुथाइ-खन्थाइ-दृश्य काव्य) सोरजिदोंमोन । दिन्थि हिसाबै सतीश चन्द्र बसुमतारी, द्वारेन्द्र बसुमतारीखौ गाहाइ खालामनानै मदाराम ब्रह्म, नबीन ब्रह्म, मणिराम ईशलारी, प्रमद चन्द्र ब्रह्म, लाल महन ब्रह्म बिसोरनि नायजाबफोरखौ मुंख'नो हागौ । बिसोरनि अनगायैबो मुं मोनथियै गोबां लिरगिरिफोरा नायजाब लिरनानै, फावथिना दिन्थिनानै मोनसे गुथाल लाबोदोंमोन । बे गुथाला नैजि जौथाइनि गेजेर बाहागोखौ एसे बारजासिम दंमोन । नाथाय बेफोर नायजाबा गासैबो साफायसालिनि मोखां नुयिलाय फोसावनायनि खाबु जायाखिसै, जायनि जाहोनाव बेफोरनि सायाव सावरायनाय एबा बिजिरनायनिबो खाबु मोननाय जायाखिसै । थेवबो गोनो-गोथो गैयाजासे जों बुंनो हागौ एण्डेल साहाब फसंलानाय बर' थुनलाइनि बिथाखौ 'बिबार' मुगानि लिरगिरिफोरानो फोगोमदों आरो बिथांनि सायाव आथिखाल जौनि थुनलाइया गसंनानै दं । बेनि अनगायै मोनसे बाश्राखौ सिमान जानांदो दि बिथांमोन सोरजिनाय रायथाइफोरा बै समाव बेसेन दंमोन, आथिखालावबो बेनि जारिमिनारि बेसेन दं । मानोना थुनलाइया माहारिनि आयना जेब्ला, बै समनि माहारि आरो बेनि आबहावानि सावगारिया थुनलाइयाव बेरखांखागोन । बेनिखायनो जों नुनो मोनो 'बिबार'आव जेसेबां रायथाइ ओंखारदों बेफोर गासिबो हारि बोखांनायनि लामायाव नुजानाय जेंनाफोरनि सोमोन्दै लिरनाय आरो जायफोरखौ गुबै रायथाइनि सारियाव खोख्लैजाथाव, बेफोर गासैबो असमीया रावजों लिरनाय । बे रायथाइगिरिफोराबो नाथाय सरा सनस्रायैसो लिरदोंमोन, थुनलाइ सोरजिनायखौ बिसोरो साधना हिसाबै लानो हायाखिसै; 'बिबार' नुजानाया थाबथानायनि लोगो लोगो बिसोरबो खोलोम नागारनायसै ।



बिसोरनि गेजेराव गैया गैया जायफोर थुनलाइ सोरजिनायाव नांथाबनानै दंमोन, बिसोर जाबाय - सतीश चन्द्र बसुमतारी, रूपनाथ ब्रह्म, मदाराम ब्रह्म, प्रमद चन्द्र ब्रह्म आरो आनन्द मुसाहारी। नाथाय इं 1952 मायथाइनि उनाव दासिम बर' थुनलाइया जेसेबां जाँगोदों, गोसारदों, बेजों लोगोसे खाबु ओंखारसेयावबो 'बिबार' मुगानि बै सानैसो लिरगिरिया थुनलाइ बिजिरनायनि हाबायाव आखाइ होनाय जों नुवाखिसै।

प्रम'द चन्द्र ब्रह्मआ बै मुगायावनो 'हाथखि-हाला', 'अलंबार', 'सानसि मुसि' मुंनि लाइसि दिहुननानै माखासे लिरगिरिफोरनो थुनलाइ सोरजिनायनि खाबु होदोंमोन। बिसोरनि गेजेराव जाय लिरगिरिया खालि रायथाइ लिरनायावल' गोसो होदोंमोन बिथांङनो जाबाय आनन्द मुसाहारी। बिथांनि रायथाइयावबो गोजौआव मख'बोनाय मोनबा जाहोननि थाखाय बर' हारिनि बायदिसिना जेंना-जेथोनि आवथानिफ्राय बारग'नो हायाखै एबा खाबु मोनाखै। बिथांनि बिसम्बि सावलेनाय, आगोलनि बाथ्राखौ बाद होनानै, 'बर'नि राव' आरो 'न'नि माइदां' - बे मोननै रायथाइयावो बेनि बिदिन्थि। आखाइ फोलाउब्लानो मोनफ्लायनाय आयदा आरो बेनि फोरमायनाय आयदाफोराबो गेबें, नाथाय बिथांनि प्टाइल आरो सानसिखौ नायनानै बै समावनो बुंझानो हागौमोन बर' रायथाइ थुनलाइनि इयुनाबो गोजों आरो लोगोसे दा बुंजांगोन बै मुगानि सानैसो लिरगिरियानो रायथाइ थुनलाइनि लामा एवझांजेनग्रा।

गुदि 'बिबार' मुगाजों रुजुनायाव आथिखाल मुगाया (इं 1952 निफ्राय दासिम) सोरजिलु मुगा। इं 1952 मायथाइयाव बर' थुनलाइ आफाद जोनोम जानायनि लोगो लोगो बर'खौ फरायसालियाव बिजों महरै थिसननायनि गुथाल, थुनलाइ सोरजिनायनि गुथाला दुलाराय बर' माहारिनि मोदोमाव नाङो आरो बे गुथाला इं 1960 मायथाइनिफ्राय बायदिसिना जेंना - हेंथा लोगो मोनबोदोंब्लाबो मोनसे गद लायो। बेनि जाहोनाव बर' थुनलाइ आफाद, बेनि जिला आरो गुदि आफाद, फरायसा आफाद, माहारि आफादफोरनि नाजानायाव जोबोर आयु होनो हायाखैब्लाबो मैखुन बेरनाय बादि गोबां खुगा बिलाइ आरो लाइसि ओंखारदों। कलेज एबा फरायसालिनि लाइसिबो दंसै। मान दान्दानि फारसे नायनानै बेफोराव ओंखारनाय लिरबिदांफोरा बारा गोजोनथाव नडब्लाबो, अनजिमानि फारसे नेहाद नंला होनजागौ बेफोरनि गेजेराव खन्थाइनि अनगायै सुंद' सल' खिन्थिगासे फावथिना, रायथाइ आरो बेनि जाहोन महरै खाबुआबो ओंखारदों होननानै मोनफा मोननै सावरायनाय रायथाइबो नुनो मोनो।

इं 1963 मायथाइनि उनाव बर'आ फरायसालि बिजों महर मोननाय आरो

कलेजाव राव आयदानि मान मोननायनि लोगो लोगो माखासे राफोद रायथाइगिरि ओंखारनाय जौनि नोजोराव गोग्लैदों। बिसोर जाबाय प्रम'द चन्द्र ब्रह्म, म'हिनी म'हन ब्रह्म (बिबार मुगानि), कमल कुमार ब्रह्म, मन'रन्जन लाहारी, मणिराम मसारी, बिहुराम बर', रामदास बर', मधुराम बर', लक्षेश्वर ब्रह्म, नील कमल ब्रह्म, ब्रजेन्द्र कुमार ब्रह्म, बिनय कुमार ब्रह्म, कमलेश्वर ब्रह्म, चरण नार्जारी, गिरीन्द्र ब्रह्म दैमारी, बकुल बसुमतारी, हरेन बसुमतारी, हेरम्ब नार्जारी, धनन्जय ब्रह्म, धरणीधर औवारी, केशव चन्द्र ब्रह्म, गुनेश्वर मुछाहारी, जिनिल कुमार ब्रह्म, बिजय बागलारी आरो बायदिसिना लाइसियाव सम सम ओंखारनाय गोबां लिरगिरिफोर।

गोजौआव मख'नाय रायथाइगिरिफोरा गुबुन गुबुन आयदाखौ लानानै रायथाइ लिरदों। नाथाय गुबैयै थुनलाइ सावरायनाय एबा बिजिरनाय हाबाखौ आखाइयाव लानाय लिरगिरिनि अनजिमाया आसि हांखोयावनो सानजानाय।

जेनथखा, अलंबार, सानसि-मुसि लाइसिनि सुजुगिरि बिबार मुगानिफ्राय दिनैसिम थुनलाइ सिबिनायाव नांथाबनानै थानाय मिष्टिक खन्थाइगिरि प्रम'द चन्द्र ब्रह्मआ थुनलाइ सावरायनायाव आखाइ होयाखैब्लाबो बिथांनि रायथाइफोरा राफोद मेहेर गोनां। जारिमिनारि बेसेन गोनां रायथाइ 'जोहोलाव दैमालु' आरो दार्शनिक सानथौ संदाननो नाजानाय 'सोरबा' मुंनि रायथाइया गुबुन रावारि गोजौ थाखोनि रायथाइफोरजों सें थाफानो समायगौ। सावरायनाय थुनलाइयाव आखाइ होयोमोनब्लाबो इयुन जोलैनो लिरगिरिफोरा बे आयदायाव गोसो होनो लामा मोनगौमोन।

चीन तिब्बती राव आयदानि पण्डित, बे आयदाखौ लानानै आमेरिका (1981 इं) आरो चीन (1982 इं) हादराव जानाय सेमिनाराव थान्दै महरै बाहागो लाहैनाय महिनी म'हन ब्रह्मआ 'बिबार' मुगानिफ्राय दिनैसिम रायथाइ लिरनायावनो नांथाबनानै दं। बिथांनि बांसिन रायथाइया बर' माहारि खुगा थुनलाइ आरो हारिमुनि सोमोन्दै लिरनाय। बर' असमीया इंराजी आरो बांला - बे मोनब्रै रावयै लिरनाय रायथाइफोरा सम सम नुजानाय लाइसिफोराव थाय थाय जानानै दं। बिथांनि सानसि फोरमायनाया स्राय, रोखा आरो राफोद। बिथांनि रायथाइफोराव जारिमिनारि बेसेन दं। नाथाय बिथांखौबो आबुं थुनलाइ सावरायनायाव आखाइ होनाय जों नुनो मोनाखै। अदेबानि खुगा थुनलाइनि सायाव लिरनाय माखासे रायथाइ आरो महाकवि कालिदासनि मुंदांखा फावथाइ 'अभिज्ञान शकुन्तलम'नि शकुन्तलाजों रुजुनानै हिन्जावफोरनि आखुखौ बिजिरनाय कालिदासनि 'शकुन्तला' आरो 'हिन्जावफोरनि आखु' मुंनि रायथाइखौ नायब्ला महिनी म'हन ब्रह्मखौबो सावरायनाय थुनलाइयाव एसे आखाइ

होजेननाय नुनो मोनो ।

बर' थुनलाइ आफादनि दैदेननायाव बर' खौ फरायसालियाव बिजों महरै थिसननायनि जेब्ला मुखुब, बै समाव बयनिखुइबो सोरजिसुला लिरगिरिया जादों- कमल कुमार ब्रह्म । खन्थाइगिरि आरो फावथाइगिरि महरै मुं मोननाय कमल कुमार ब्रह्मनि रायथाइ सोरजिनाया गुबुन आयदानि रुजुनायाव जोबोद गेसें । बिथांनि 'जारिमिननि बिखायाव बर' थुनलाइ', 'बर' फावथिना : बेनि जोनोम, बर' थुनफावथाइयाव खिन्धिगासे थुनफावथाइ - बेफोर बायदि रायथाइखौ थारै सावरायनाय हमथावा, अदेबानि बर' थुनलाइयाव बेफोर जारिमिनारि बेसेन गोनां रायथाइ । बिथांनि सावरायनाय थुनलाइनि गेजेराव थुनलाइयाव रहस्य सानथौ, बर' थुनफावथाइ : बेनि मोनथिगोनां आखुफोर बर' खन्थाइयाव ईशान मोसाहारीनि भाण्डारी- बेफोरखौ हमजायो । नाथाय बे रायथाइफोरखौ फरायब्ला नोजोराव गोग्लैगोन - बेफोर आयदाखौ लानानै एसे गुवारसिन आरो गोथौसिन सावरायना - बिजिरनायनि खाबु थासेयावबो बिथाड बारा आवगायाखै ।

नैजि जौथाइनि गेजेर बाहागोनिफ्राय दिनैसिम थुनलाइ सिबिबोनाय, गाहाइयै स्मान्ठिक खन्थाइगिरि, रायथाइगिरि, सुंद' सल', सल'मा लिरगिरि मन'रन्जन लाहारीयानो बर' लिरगिरिफोरनि गेजेराव बांसिन सावरायनाय थुनलाइनि भाण्डारी होबाय - बेनि जाहोन महरै 'गोदान बर' मुंनि गांसे रायथाइ बिजाबखौ बिथाड दिहुनबाय । दासिम नुनायाव लाहारीया रायथाइफोरखौ लिरों - बर' आरो इराजी - बे मोननै रावयै । On modern Bodo poetry, Study of Bodo classics, On Bodo Jatra, Creative trend in Bodo literature बायदि सावरायनाय लिरबिदांफोरा गुबुन गुबुन समाव ओंखारनाय लाइसिफोराव थाय थाय गोग्लैसोनानै दं । बेफोरखौ जथायनानै बिजाब महरै दिहुनोब्ला बर' थुनलाइया गुबुन रावारि थुनलाइनि गेजेराव गुवारै गोसारनायनि द्लाम खाबु दं । इराजी खन्थाइ आरो बर' खन्थाइ: मोनसे रुजुनाय, दानि बर' खन्थाइनि आयदा, थुनलाइनि गहेना, थुनलाइयाव मोगथांनि मोनदांथि, बर' बेलाड, आनन्दराम मुछाहारीनि जांखिखांनय, बर' खुगामेथाइयाव हाबा मेथाइ, बर' खुगामेथाइयाव गहेना, बर' रायथाइ बायदि आयदानि सायाव सावरायनानै बर' थुनलाइनि बायदि बिथिंखौ संनो नाजादों । अदेबानि लाहारीया सुंद' सल' आरो सल'मानि सायाव सावरायनाय जों दाबो नुवाखै ।

खन्थाइयाव जेरै, रायथाइयावबो मन'रन्जन लाहारिनि राव बाहायनाया गेबें आरो गोरलै - थुनलाइयाव आखाइ होजेननाय गोदान लिरगिरिफोरनि थाखाय लायेक । नाथाय नुनो मोनो - बिथांनि सावरायनायफोरा गुसुं, जाहोनाव बबेबा आयदाखौ सावरायनो लानायलाय हरखाब बबेयावबा सौथुनानै बुंनो गोनां द्लाम बाश्रा थालाडो ।

लाहारीया इराजी थुनलाइनि फोरोंगिरि । बेनि जाहोनाव बिथांनि खन्थाइफोराव इराजी र'मान्ठिक खन्थाइनि गोहोम गोग्लैनायनि बाश्राखौ आं आंनि बबेबा रायथाइयाव मुंख 'दोंमोन । बिथांनि सावरायनाया खन्थाइनि सायावनो बांसिन, बेफोरावबो इराजी थुनलाइनि गोहोम गोग्लैनाय जोंनि नोजोराव गोग्लैयो । जेब्लानो मानिबा सायाव गावनि बिबुंथि (मतामत) खौ होयो अब्लानो बेखौ फोगोमनो थाखाय लाहारीया इराजी थुनलाइनि मदद (आश्रय) लायो । अदेबानि बियो लाहारीनि बेलायावल' नड, गुबुन जौगानाय रावारि थुनलाइ सावरायगिरिफोरनि गोबाडानो बेखौ खालामो । नाथाय गोसोआव लाखिनो गोनां दि-बाराद्राय गुबुननि सेराव सथबोब्ला (आश्रय लायोब्ला) लिरगिरिहा गावनि होननो जेबो थाहैया ।

खन्थाइजों थुनलाइ सिबिनो लाजेननाय ब्रजेन्द्र कुमार ब्रह्मआ978 मायथाइनिफ्रायसो रायथाइ लिरनो लायो । बै समनिफ्राय लिरबोनाय गोबां रायथाइफोरा सम सम ओंखारनाय बायदिसिना लाइसिफोराव थाय थाय जानानै दं । गुबुन गुबुन आयदानि अनगायै बेनि सावरायनाय लिरबिदांफोरा जाबाय-थुनलाइ मुलुगनि सिखाव, खन्थाइगिरिनि मोनसे बदनाम - बेसे गोथौ, खन्थाइगिरिनि नोजोराव थैनाय, अमर खैयाम आरो रुबाइयात, बर' खन्थाइयाव प्रतीक, खन्थाइ सावरायगिरि आरो गाब, बर' खन्थाइयाव मिथिंगा, मन'रन्जन लाहारीनि खन्थाइ, र'मान्ठिक बिथिं, आथिखाल खन्थाइ : नाजावनाय आरो नेवसिनाय, मोगथांनि दाहा आरो थुनलाइनि दाहा, बर' खन्थाइयाव मिष्टिसिजम, लक्षेश्वर ब्रह्मनि प्टाइल : मोनसे बिथिं, समर ब्रह्म चौधुरीनि रादाब, बर' र'मान्ठिक खन्थाइ बायदि बायदि । नुनो मोनो बे लिरगिरिया खन्थाइनि सायावनो बांसिन सावरायनाय थुनलाइ सोरजिदों । गुबुन आयदा जेरै - सुंद' सल', सल'मानि सायाव सावरायनो लायाखै ।

खन्थाइगिरि, दोंफा दौने सुंद' सल' लिरग्रा, बर' रावाव द्रामाटिक मनलग थिसनजेनग्रा सुरथ नार्जारीया थुनलाइनि सायाव गाहाम दखल दंब्लाबो जों मिजिं खालामनाय ज'खायै थुनलाइ सोरजियाखै । गुसुं रायथाइ रेभारेन्ड सिडुनी एण्डेल : गामिनि ब्राय, ग्रीक पण्डितफोरनि मेगनाव बर' हारिया बर'नि जारिमिनारि बेसेन गोनां रायथाइ । सावरायनाय लिरबिदांफोरा जादों - खन्थाइ आरो खन्थाइगिरि, सिमांनि सैनाय, मुम्री सीतानाथ ब्रह्म चौधुरी (आदा) । सुरथ नार्जारीया इराजी थुनलाइनि फोरोंगिरि । जानो हागौ बेनिखायो बिथांनि लिरबिदां फोरावबो इराजी थुनलाइनि गोहोम गोग्लैदों । थुनलाइनि बायदि बिथिंफोरखौ गुवारै सावरायनायनि खाबु दंमोनब्लाबो नार्जारीया सावरायनो लानाय आयदानि थुनलाइयारि समायनायखौल' बेखेवनानै होनाय नुनो मोनो ।

नीलकमल ब्रह्मआ सुंद' सल' लिरनानै मुंदांखा जानाय बर' लिरगिरि। दासिम बिथानि सुंद' सल' नि बिजाबा गांथाम जाबाय - हाग्रा गुदुनि मै, सिलिंखार आरो सिरिनाय मान्दार बिबार। बेफोरनि अनगायैबो बिथानि गोबां सुंद सल' गुबुन गुबुन लाइसियाव ओंखारबाय। 'बिक्रम', पेन-नेइम, लानानैबो बिथाड माखासे गोदान खन्थाइ लिरबाय। सुंद सल' सोरजिनायावनो बांसिन गोसो होना नै बे आयदायाव आधिखाल गुवारसिन आवथा दखल खालामनानै लानाय नीलकमल ब्रह्मआ गुबुन गुबुन आयदानि रायथाइ सोरजिनायावबो आखाइ दं। बेफोरनि गेजेराव बिथानि खैयामनि रुबाइयात : दाउसिन नोजोरजों, सुंद' सल', गालिब गजल बेफोरखौ सावरायनाय थुनलाइयाव हमनो हायो। अमरनि रुबाइयातनि सोमोन्दै सावरायनाया भुम थुनलाइयाव गोबां दंसै। अब्लाबो बेनि आखुथाइ, बेनि महर आरो सानस्रिनि सोमोन्दै बिथानि सावरायनाया बर' फरायग्राफोरनि थाखाय मोजाडै मोनथिनो मदद होगोन। जायफोरहा सुंद सल' लिरनायाव गोसो दं आरो जायफोरा लिरनो लाजेनदों, बिसोरखौ नीलकमल ब्रह्मनि सुंद सल' मुंनि सावरायनाय रायथाइया लामा दिन्थिगोन। म'गल हादरमा (साम्राज्य) नि जोबथा सम्राट बाहादुर शाह आरो बेनि बिफा आकबर शाहनि राजदरबारजों सोमोन्दो थानाय, उर्दु आरो पार्ची रावनि खन्थाइगिरि मीर्जा गालिब (गुबै मुडै 'मीर्जा आसाद उल्लाह बेग खान 1797-1869) आरो बेनि गजलनि सोमोन्दै लिरगिरिया जोंनो गुदि खौरां होदों 'गालिब : गजल'नि गेजेरजों। नोजोर होनो गोनांदि नीलकमल ब्रह्मआ सावरायनायनि राफोद आखाइ थासेयावबो सोरबा बर' लिरगिरिनि लिरबिदांखौ खेबखांनानै दासिम सावरायफेराखै।

'हा फिसा हौवा' आरो 'फेरेंगा दाउ' मुंनि गांनै खन्थाइ बिजाब लिरनानै बर' थुनलाइयाव खन्थाइगिरि महरै जायगा लानाय गुनेश्वर मुछाहारीया बर' आरो सम सम असमीया रावजों रायथाइ लिरो। बिथानि रायथाइफोरनि गेजेराव बर' खन्थाइयाव र'मान्तिस्जमखौ गाहाइ खालामनानै बैसागु आरो बर' फोलेर, थुनलाइ-बेफोरखौ सावरायनाय थुनलाइयाव हमजायो। थुनलाइनि जायखिजाया आयदानि सायाव सावरायनायनि अनजिमा गैया, अब्लाबो सावरायनो गोनाडबो जोबनो थाड। गुबुन गुबुन आयदायाव जैरै बर' र'मान्तिक् खन्थाइनि सायाव माखासे लिरगिरिफोरा सावरायखांबायब्लाबो, गुनेश्वर मुछाहारीया बेनि सायाव सावरायबावदों गुबुन मोनसे बिथानिफ्राय नोजोर होनानै। बर' थुनलाइयाव र'मान्तिक् सानस्रिनि जोनोम बुब्लिखौ बिथाड संनो नाजादों थुनलाइनि जारिमिनारि रेस हमनानै आरो बेनि जेर लाबोनानै आधिखाल मुगायाव हाबफैदों। बे फारसेथिं नायब्ला बिथानि बे लिरबिदाडव बर'

थुनलाइनि एसे जारिमिनारि बेसेन दं होननानै सिमान जानांगोन। नाथाय बिथाडबो थुनलाइ सावरायनायाव बारा गोसो होनाय नुनो मोनाखै, सरासनम्रायैसो लिरदों।

बायदिसिना आफाद, गाहाइयै फरायसा आफादजों नांजाबनानै थाबाय थानाय मावथि, केशव चन्द्र ब्रह्मआ बावस्रोम बावस्रोम रायथाइ लिरो। बिथानि रायथाइफोरा फरायसा आफादनि लाइसिफोरावनो बांसिन जायगा मोनदों। दासिम जोंनि नोजोराव फैनाय बिथानि गुबै थुनलाइ सावरायनाय लिरबिदाड जादों 'वर्डसवार्थ आरो मिथिंगा'। इंराजी थुनलाइनि गेदेमा र'मान्तिक् खन्थाइगिरि उइलियाम वर्डसवार्थ- आ मिथिंगाखौ सुबुंनि मेगनजों नुनानै दान्दिसे गोजोननायनि बाश्राखौल' बुडखै, मिथिंगाजों सुबुंहा बेसेबां गोथौ आरो एंगारनो हायि सोमोन्दो दं, बे बाश्राखौ गोमोथाव राव आरो आदबजों गावनि खन्थाइफोराव गोगोम फोथायनायजों फोरमायदों। बे सानस्रिखौनो गावनि रायथाइयाव बिजिरदों केशव चन्द्र ब्रह्मआ।

'फैफिन' मुंनि खन्थाइ बिजाब लिरनानै बर' थुनलाइयाव गावखौ सासे राफोद खन्थाइगिरि महरै, फसंनाय रामदास बर'आबो गाहाइयै खन्थाइगिरिसो, बिथाड गोबां रायथाइ लिराखै। जोंनि नोजोराव गोगलैनाय थुनलाइ सावरायनाय लिरबिदाड जादों - बर' सुंद' सल' आरो आधिखाल बर' खन्थाइ। गिबि रायथाइयाव बिथाड नैथि जौथाइनि नैथि खाव-बाहागोआव सोरजिबाय बर' सुंद' सल'नि सोमोन्दै सावरायदों बर' सुंद' सल'नि गासैबो बिथिंखौ सावरायनो हायाखैब्लाबो, बेनि इयुनादि गोजौ बेखौ बिथाड मिजिंथिदों। नैथि रायथाइयावबो रामदास बर'आ गावनि आखाइजों मोनहानाय आधिखाल खन्थाइफोरनि रोखोमारि सानस्रिखौ बेखेवना होनानै फरायग्राफोरनो गोदान खन्थाइनि बिदैखौ साखिनो खाबु होदों। थुनलाइ सावरायनाय आयदानि सारियाव गोगलैयाब्लाबो थुनलाइनि बेसेन गोनां बिथानि मानसि आरो जैरै (परमानन्द) मुंनि रायथाइया फरायग्राफोरनि गोसोखौ बोनो आरो सानहाब होनो हागोन। मुगानि गोहोमाव सुबुंनि गोसोआ सोलायनायनि लोगो लोगो जिउनि गोजाम बेसेन मोनदांथिनि फारसे सौलु नोजोरजों नायनाय बे रायथाइयाव मोजाडै बेरखांदों।

गोदान हान्जानि गेजेरनिफ्राय गोखै आगान सुरनानै गोजाम एबा गागि हान्जाखौ लोगो हमनो फैनाय, खन्थाइगिरि बिजय बाग्लारीया गोबां रायथाइ लिराखै। नाथाय जा मोननैसो लिरदों, बेफोर गासैबो राफोद सानस्रिनि दिन्थि फोरमायो। जोंनि आखाइयाव मोननाय बिथानि थुनलाइ सावरायनाय लिरबिदाड दासिम मोनथाम खन्थाइ आरो बेनि महर, गोदान खन्थाइनि मोनदांथि, आरो गोदान खन्थाइनि अल'खद। खन्थाइनि गोरबोआव

दि बिथाड गोथौयै हाबनो नाजादों बे सावराय रायथाइफोरा बेनिनो नेरसोन ।

जायफोर थुनलाइ सावरायनायाव आखाइ होवाखै नाथाय बायदिसिना आयदानि सोमोन्दै बेसेन गोनां रायथाइ रोरजिनानै बर'थुनलाइयाव भान्दारि होदों बिसोर जाबाय- सोर्गोयारि बिष्णु प्रसाद राभा, गहीन बसुमतारी, मनिराम मुछाहारी, माइकेल बसुमतारी, रामदास बसुमतारी, सोर्गोयारि लक्षेश्वर ब्रह्म, कमलेश्वर ब्रह्म, बिहुराम बर', बिनय कुमार ब्रह्म, चरन नार्जारी, गिरिन्द्र ब्रह्म दैमारी, रुपनाथ बसुमतारी, प्र: रेणु बर', धनन्जय ब्रह्म, दयाराम उवारी, जनिल कुमार ब्रह्म, कामेश्वर ब्रह्म, रामचरन ब्रह्म, बकुल बसुमतारी, सत्यप्रिय ब्रह्म पाटगिरि, हेरेश्वर बसुमतारी आरो सरासनप्रायै लिरग्रा गोबां ।

बर'नि सोमोन्दै जारिमिनारि बेसेन गोबां रायथाइ लिरनानै बिहुराम बर', बिनय कुमार ब्रह्म, रुपनाथ बसुमतारी, बकुल बसुमतारी, सत्यप्रिय ब्रह्म पाटगिरि आरो हेरेश्वर बसुमतारीया जाखां बिदिन्थानि गोरबोआव गोग्लैनानै थानाय गोबां गोदान खौरां जौनो होदों । बर' माहारिन्फ्राय बेसेबा गोजान भारतनि राजथावनि दिल्लीयाव थानानैबो गहीन बसुमतारीया बर' रावखौ सिबिनो बावाखै । बिथानि बर'राव आरो रावखान्थि सायाव असमीया आरो इंराजीजों लिरनाय लिरबिदांफोरखौ जथायनानै बिजाब महरै दिहुनोब्ला बर'नि मोनसे गिदिर सम्फथि जागोन आरो गुबुन रावारिफोरनि गेजेराव गुवारै आरो मोजाडै मोनथि होनायनि खाबु ओंखारगोन ।

सोरगोयारि बिष्णु प्रसाद राभानि माखासे रायथाइया बर' बिसोरनि हारिमु आरो आसार-खान्थि सिडव हाबनानै बिसोरजों लोगोसे सुखु-दुखुनि बाहागौ लाफानो नाजानायनि गोगो नेरसोन । रावफोरा गेबें नाथाय फोरमायलु आरो मोनदांथिया गोख्रों । गाहाइयै हारिमुनि सोमोन्दै गुवार आरो गोथौयै सावरायदों सोरगोयारि लक्षेश्वर ब्रह्म, गिरिन्द्र ब्रह्म दैमारी, धनन्जय ब्रह्मआ । आथिखाल दुलाराय बर'नि गेजेराव नुजानाय बायदिसिना जेंना - जेथोखौ बिजिरनानै बेफोरखौ बोस्रानायनि राहालामा दिनथिनो नाजादों माइकेल बसुमाथा, चरण नार्जारीया गावसोरनि रायथाइफोरनि गेजेरजों । एसेल' समनि गेजेरावनो बर' थुनलाइ आफादजों नांजाबनानै बायदि आयदानि सायाव असमीया आरो बर' रावै लिरनाय रामचरण ब्रह्मआ सासे गोख्रों रायथाइगिरि महरै बर' थुनलाइयाव माब्लाबानो गोजोर जायगा आवग्रिनानै लाबाय । गाव लिरनो लानाय आयदानि सायाव बिथानि सानम्रिया रोखा, फोरमायथि आदबा सोलोआव आरो गाव होनाय मथामथनि सुखुथिया गोख्रों । बिथानि रायथाइफोरा बिथानि गोथौ गियाननि नेरसोन ।

सरखारि बिबानगिरिनि गिलिद बिबान थासेयावबो जाय लिरगिरिया थुनलाइ सिबिनायाव नांथाबनानै दं, बिथाड जाबाय मणिराम मसारी । रावखान्थि लिरगिरि, गोबां रायथाइनि भाण्डारी होग्रा मसारीया बर' आरो इंराजी रावै लिरों । असमीया थुनलाइनि मुंदांखा लिरिगिरि रसरज' लक्ष्मीनाथ बेजबरुवानि आदबजों 'सिमां फाग्ला' आरो 'जान्था फाग्ला' बादि फेस्ला रायथाइ लिरनानै माहारिनि फोथायखेबस' अगेन आखुफोरखौ बिथाड गोसा गोसा थांखिदों । बे बायदि आखुनि मानसिफोरखौ थोंजोडै सोंखारियाबालानो खेंसालियै सोंखारिनानै फोसाबनो नाजानायाव बेजबरुवायावो आखा-फाखामोन, बे आयदायाव रामचरण ब्रह्मआबो गेजेन नड । सोरनिबा (हारिनिबो) अगेन एबा लोरबां आखुखौ बे आदबजों थांखिनानै बेनि (हारिनिबो) मोनदांथिखौ सांग्रां खालामनायाव (रागाजों दोननायावबो ?) मणिराम मसारी आरो रामचरण ब्रह्मआ समानै गोख्रों ।

बर' थुनलाइ आफादनि आगु आफादगिरि रामदास बसुमतारीया बर', इंराजी आरो असमीया रावै सुंद' सुंद' बेसेन गोनां रायथाइ सोरजिबाय, बेफोर बायदिसिना लाइसिफोरनि थाय थाय जानानै दं । जारिमिनारि बेसेन बिजिरनाय आरो बर' राव थुनलाइ फेहेरनाय जौगाहोनायाव बे रायथाइफोरा अनसाय जाथाव ।

फरायसा समनिफ्रायनो बर' फरायसानि सिगाडव नुजानाय बायदिसिना जेंना जेथोफोरजों मोगा-मोगि जाबोनाय आरो दा बर' थुनलाइ आफादजों नांफानानै थानाय मेंनो रोडि-सेंग्रा मावथि जनिल कुमार ब्रह्म, दयाराम औवारी आरो कामेश्वर ब्रह्मनि माखासे रायथाइयावबो जारिमिनारि बेसेन दं । कामेश्वर ब्रह्मआ बर'नि धोराम आरो आसार खान्थिनि सोमोन्दैबो माखासे रायथाइ लिरबाय ।

बर' थुनलाइ सोरजिनायाव हिन्जावफोरा सोमोनांथाव उन जानानै दं । खन्थाइ दोंफा-दोनै एबा सल' आरो रेजें आखुनि रायथाइ मोनफा-मोननै सोरजिनानैनो बिसोर बांसिन दावगानो नागारो । बेनि गेजेराव नाथाय सासे हिन्जाव लिरगिरिया जौनि नोजोरखौ बोगासिनो दं । बिथाड जाबाय - प्र: रेणु बर' बिथानि रायथाइफोरखौ फरायनानै मोनथिनो मोनो - बिथाड बर' माहारिजों खाथि सोमोन्दो आरो गोथौ गोरबोनि सिनायथि दं । बर'नि रांखान्थि आसारखान्थिनि सोमोन्दै लिरनाय रायथाइनि अनगायैबो बर'नि माखासे रायथाइफोरा जादों - बाथौ धोरामा जाथोसे फुजा, हिन्जावफोरनि देलायनाय हुदा, सोलिलानायाव गौरब बर' कसारी माहारिनि सोदोमस्रि बायदि बायदि । बिथानि रायथाइफोराव बाराद्राय बाहायनाय हारसा सोदोबफोरा फरायग्राफोरखौ एसे आख'-फाख'आव खोख्लैयो ।

बेफोर गासैबो रायथाइ आरो सावरायनाय थुनलाइखौ ज' सिगाडव लानानै नोजोर होब्ला नुगोन बर' थुनलाइयाव माखासेखौ बाद होनानै, सावरायनाय थुनलाइया दाबो गुदि (rudimentary) थाखोयावनो दं। थुनलाइया जिउ आरो माहरिजों एंगारनो हायि सोमोन्दो दं जेब्ला, बेनि बिथिडबो गोबां। बर' थुनलाइया दाबो बेनि मोनफा-मोननै बिथिंखौल' लानानै सावरायनाय जादों बेनिफ्राय गोजौआव दावखोनोब्ला बर' लिरगिरिफोरा बांसिन मावनांगोन, बांसिन सर' आरो थौसिन साधना खालामनांगोन। दाबसे जायगायावनो दिदोम थायोब्ला बेयो दावगासुला हारिनि आखु नड। □

### लिरगिरिनि सिनायथि:

**ब्रजेन्द्र कुमार ब्रह्म:** मुंदांखा थुनलाइगिरि ब्रजेन्द्र कुमार ब्रह्मआ 1943 इं मायथाइयाव आथिखाल क'कराझार जिलानि बेन्दोडव थानाय सालानि बाथाबारि गामियाव जोनोम जादोंमोन। बिथांनि बिफानि मुड रंसारि दन्दराम आरो बिमानि मुड रंसारि एन्दाब ब्रह्ममोन। ब्रजेन्द्र कुमार ब्रह्मआ गावनि जोनोम गामिनि सालानि बाथाबारि गुदि फरायसालियाव गुदि सोलौंथाइखौ लाजेनो। 1954 इं मायथाइयाव द'तमा एम.इ. फरायसालियाव फरायनायखौ फोजोबना शक्तिआश्रम भकेस'नेल गोजौ फरायसालियाव फरायो। बे फरायसालिनिफ्राय बिथाड 1959 इं मायथाइयाव मेट्रिक आनजादखौ उथ्रिना क'कराझार कलेजाव आइ.ए. थाखोआव मुं थिसनो। नाथाय आइ.ए. कर्सखौ फरायजोबदोंमोनब्लाबो न'खरनि बायदिसिना जेंनानि थाखाय जोबथा आनजादखौ होनो हायाखिसै। गोबां दुखु-दाहाजों बिथाड 1962 मायथाइयाव मेघालय राइजोनि सिलडव थाडो। सेन्ट एडमाण्ड कलेजनिफ्राय बिथाड 1968 इं मायथाइयाव बि.ए. खौ उथ्रियो। उनाव 1970 इं मायथाइयाव बिथां ब्रह्मआ बनरगाव गोजौ फरायसालिनि गायसनगिरि गाहाइ फोरोंगिरि जायो। 2001 इं मायथाइनि जुलाइ दानाव बिथाड गाहाइ फोरोंगिरि मासिनिफ्राय जिराय मोनो।

बर' राव थुनलाइनि बागै बिथांनि बिहोमाया गोबां। बिथाड बर' थुनलाइ आफादनि आफादगिरि बिबानावबो दंमोन। फरायसा समनिफ्रायनो लिरनायाव आखाइ होजेननाय बिथां ब्रह्मखौ गुबैयै सासे मुंदांखा खन्थाइगिरि, रायथाइगिरि, सावरायगिरि, बिजिरगिरि महरै मुंख'जायो। बिथांनि थुनलाइ सोरजिफोरा जादों-अखां गंसे नांगौ (खन्थाइ बिजाब, 1975 इं), थुनलाइ आरो सानश्री (रायथाइ बिजाब, 1986 इं), सानमोखाडरि बिबार जानानै (खन्थाइ बिजाब, 1995 इं) आं फैफिनगोन (खन्थाइ बिजाब, 1995 इं) रायथाइ माला (रायथाइ बिजाब, 1992), नोजोर आरो सोरजि (रायथाइ बिजाब, 1995 इं)।

बेफोरनि अनगायैबो ब्रजेन्द्र कुमार ब्रह्मआ गोबां सुंद सल' लिरदों। बेफोर जादों - ईश्वरजों दान्दिसे, गोदान जोनोम, मोनसे मेलेमनि अबथिरा थैनाय, जेथो। मुंख'जाथावदि - बिथां ब्रह्मआ "अखां गंसे नांगौ" खन्थाइ बिजाबनि थाखाय 'समेश्वरी ब्रह्म' थुनलाइयारि बान्थाखौ 1994 इं मायथाइयाव आरो "सानमोखाडरि बिबार जानानै" खन्थाइ बिजाबनि थाखाय 1995 इं मायथाइयाव 'मुक्ता राम ब्रह्म' थुनलाइयारि बान्थाखौ मोनदोंमोन। बिथां ब्रह्मआ 2015 मायथाइयाव 'बायदि देंखो बायदि गाब' खन्थाइ बिजाबाव साहित्य अकादेमी बान्था मोनो। बिथाड दासिम थुनलाइ सोरजिनाय खामानियाव मुखुब जानानै दं।

### सोंथि :

1. बर'आव मा रोखोमनि थुनलाइयाव जोबोद गेसें जानानै दं ?
2. बर' थुनलाइयाव एण्डेल एबा मिसनारी मुगाया बबे मायथाइनिफ्राय जागायजेनो ?
3. बर' थुनलाइयाव 'बिबार' मुगाया बबे मायथाइनिफ्राय जागायजेनो ?
4. 'बिबार' मुगानि जायखि-जाया सानै रायथाइगिरिनि मुं लिर।
5. 'बिबार' सान-लाइसिनि सुजुगिरिया सोर ?
6. ईशान मोसाहारीनि खन्थाइफोरा गुबैयै मा रोखोमनि खन्थाइ ?
7. बर' रावा बबे मायथाइनिफ्राय फरायसालियाव बिजों महरै थिसन जायो ?
8. बर'नि जायखि-जाया सानै मिष्टिक खन्थाइगिरिनि मुं लिर।
9. चीन-तिब्बती राव आयदानि पण्डित होनना सोरखौ बुंनाय जादों ?
10. बर'आव सावरायनाय थुनलाइ रायथाइयाव फोरमायनाय बादिब्ला - बर' लिरगिरिफोरनि गेजेराव बांसिन सावरायनाय थुनलाइनि भाण्डारी होनाय लिरगिरिया सोर ?
11. बर' थुनलाइनि रेनेसा मुगा बुडोब्ला नों माखौ बुजियो ?
12. प्रम'द चन्द्र ब्रह्मआ सुजुनाय गांथाम लाइसिन मुं लिर।
13. बर' रायथाइ सोरजिनायनि बागै सुंद'यै फोरमायना लिर।
14. बर'आव सावरायनाय थुनलाइ सोरजिनायाव नुजाथिनाय हेंथाफोरनि बागै सावरायना लिर।

15. बर' खन्थाइ सोरजिनायनि बागै सावरायना लिर।  
 16. बर' सुंद' सल' सोरजिनायनि बागै सावरायना लिर।  
 17. लिरसुंथाइ लिर:  
 (क) एण्डेल एबा मिसनारी मुगा, (ख) बिबार मुगा, (ग) फादार सिदनी एण्डेल,  
 (घ) चीन-तीब्बती राव, (ङ) आथिखाल मुगा।

### बेखेवना लिर:

- (क) गोजोनथाव बाश्चादि 'बिबार' मुगानि.....खन्थाइफोरजों समानै रुजुजाथाव।  
 (ख) गुदि एबा बिबार मुगाजों.....सोरजिलु मुगा।  
 (ग) नैजि जौथाइनि गेजोर बाहोगोनिफ्राय दिनैसिम.....थुनलाइनि भाण्डारी होबाय।  
 (घ) नीलकमल ब्रह्मआ सुंद' सल' लिरनानै मुंदांखा जानाय लिरगिरि।  
 (ङ) बर' थुनलाइ सोरजिनायाव हिन्जावफोरा सोमोनांथाव-थाव उन जानानै दं।  
 (च) थुनलाइया जिउ आरो माहारिजों.....बिथाडबो गोबां।

## बाथौ दोहोरोम आरो सानथौ

- रामदास बसुमतारी

मोनसे दोहोरोम आरो सानस्रिनि बाश्चा बुंबोला आसारनिबो बाश्चा बुंनंगौ जायो। बेखायनो दोहोरोम, सानस्रि आरो आसारनि मादाव थानाय फारागखौ एसे बिजिरगोनाया मोजां जागोन।

आर्ज पण्डितफोरनि बादिब्ला धृ + मतुब (मन) - धर्म। 'धृ' माने हमथानाय, 'मन' माने गोसो। गोसोखौ जाय बिथिडा हमथानानै दलर दोनो बिनो धर्म। इंराजी 'रिलिजियन' (religion) सोदोबा लेटिन 'रिलिजिव' (religio) सोदोबनिफ्राय ओंखारदों। रिलिजिव नि ओंथिया जाबाय to bind एबा खौसे खालामनाय (to unite together) जाय बेसादा मानसिनि गोसोखौ ग'साइजों खौसे खालामो बिनो 'रिलिजियन'। बिदिनो दोहोरोम सोदोबनि ओंथियाबो दिहुन जायो। 'दो' नि ओंथिया दलर एबा सिरि। 'हो' नि ओंथिया होनाय एबा बाउनाय रोम् (गोरोम) माने संनो हास्थायनाय। अदेबानि, गोसोखौ बाउनानै ग'साइजों खौसे जानो हास्थायनाय लामायानो दोहोरोम।

दानिया सानस्रिनि बाश्चा। संस्कृत दृश्+अनट् = दर्शन। दर्शन माने गोथौयै नायनाय एबा बिजिरनाय। इंराजी 'फिल'स'फि' सोदोबनि गेजेरथिं दर्शननि ओंथिखौ बारा थारै मोनदांहायो। ग्रीक् 'फिलस' (philos) आरो 'स'फिया' लोगो नांनानै इंराजी 'फिल'स'फि' (philosophy) सोदोबा जादों। फिलस माने मोजां मोननाय आरो स'फिया माने गियान (wisdom)। थामहिनबा जि बिथिंनि गेजेरै (a branch of knowledge by which) ग'साइनि गियानखौ मोनदांहायो बिनो जादों 'फिल'स'फि' एबा 'सानस्रि'।

दा आसारा मा ? मिथिंगानि जिबि जिराद एबा मेगनजों, नुयि माबा मोनसे गोहोखौ मोदाइ होनना फोथायनाय जाबोला बि मोदाइखौ फुजिनानै दुखु खौफोदनिफ्राय खारग 'नो जुनै नेमखान्थिनि गेजेरजों माबा मोनसे खालामनाय बाश्चा गोरबोआव बेरखाडे। हमनानै ला, मोदाइ महरै फोथाय जानाय हाजो थिखिनिनि अन्थाइ रागामखौ हान्जा दैग्रा हादुंगोरानि बोसोन लेखा आगु सुबुंफोरा गाजा-

गोमजा हाग्रा-बंग्रा एवसांनानै फांसे गामबारि दंफां सिडव लाइजौ बनानै हा लांदाडव फसंफैबाय । अनथाइजौ लोगोसे सिन्दुर फोननानै लाइजौ लाइयाव दाउदैबो दैसे होफानाय जाबाय । बेनि उनाव हौवा हिन्जाव बयबो लोगो नांनानै मैहुराव मोनबोनाय अमा जुनारखौ बोलि होनानै बेनि थैखौ मोदाइनो बाउनाय जाबाय आरो अन्थाइ मोदाइनिफ्राय बोर बिनाय जाबाय, जाहाथे बिथांमोननि आबादा फिथाइ गोनां जायो आरो जिउ सोलेरफोरा अराय आलो गोजोनै थायो । बेनि उनाव दल दामनानै, आफा खबनानै, मेथाइ खननानै मोसायै-मुसुरै होसिखाव होसिखाव मोदाइखौ हानथु खरायना ज' खुलुमै दोमै, हमना ला, अखां गोमनाय जैधोनिजौ बिथांमोना फुजाखौ थुंगिहोबाय । गामबारि दंफां सिडव अन्थाइ मोदाइखौ फसंजेननायनिफ्राय फुजाखौ थुंगि होनायसिम जि आदब आरो नेमखान्थिजौ मोदाइखौ फुजिनाय जाबाय बिनो जादौ दोहोरोमनि आसार (ritual) ।

ग'साइखौ फुजिनायाव बायह्याव नुजाथिनाय आसारानो दोहोरोम आरो दोहोरोम आसारनि गेजेरथिं बिजिरजानाय नुवाथारि गोहोनि (of supernatural power) बिसारानो दर्शन ।

बाथौआ गोदो-गोदायनि दोहोरोम आसार:

लिरथुम थुनलाइ आरो जारिमिन गैयिनि जुनै बाथौ दोहोरोम, सानथौ आरो आसारनि गोहोमा (influence) माब्लानिफ्राय बर' माहारिनि सायाव गोग्लैदौं बिखौ थारै बुंस हाया । नाथाय सम सिमाया जियानो दाजार्थो, बर'फोरा दासिम फालिगासिनो थानाय दोहोरोम आसार आरो सामाजिक नेमखान्थिफोरखौ बिजिरना नायबोला नुनो मोनो बे दोहोरोमा जारिमिननि गोदान एबा गेजेर मुगायाव सोमजिनाय दोहोरोम नड । हाजार हाजार बोसोर बिगोसार (evolution) नि गेजेरथिं गोदान गोदान महर लानानै लासै लासै गेवसारबोनाय बियो मोनसे जारिमिन मोनदांस'हायि जोबोद गोदोनि दोहोरोम ।

बाथौ बिथायाव माखासे मोदाइनि नेरसोन फसंनाय जायो । माखासे मोदाइ फोथायनाया (pluralism) आगु सुबुंफोरनि आगु दोहोरोम हुदा । (In every primitive times and among primitive peoples everywhere, there were only religious having many gods." - Tell me why". Arkady Leokum) आर्काड लिउकुमनि लेखा बुंबोला, 500,000 बोसोर सिगां गुबुन गुबुन हान्जानि आगु सुबुंफोरा सोनाब एसियायाव ज' ज' जाजाय राइजो जायो । बेनि उनाव 300,000 बोसोर सिगां बिथांमोना हान्जा हान्जा सानजा खोलाहा इन्द'नेसिया आरो साहा चीन हादरमासिम

दावसार लाडे । (About 500,000 years ago, in western Asia, man's ancestors lived in small groups..... later the began to look for new places to live, and about 300,000 years ago, groups of men began to move southeast toward Indonesia and north toward China) चीन हादरमासिम दावसारबोनाय बे मानसिफोरखौ नृतात्विक पण्डितफोरा चीन तिब्बती होनना बुंदौं । मंगलीय सुबुंफोरा चीन, तिब्बत आरो नेपालाव गोसारखानाय उनाव दिहं, दिबं, दिखं, दोहोनसि आरो सनासि दैनि सुलुं लानानै फुरगाजौंथिफुरनि दिलावथौ (लुइत) फार फार हान्जा हान्जा गोसार फैयो । बिथांमोनानो मंगलीय बड'साफोरनि आगु बिमा बिफा । चीन, तिब्बत, नेपाल आरो फुरगाजौंथिफुराव गोसारनाय बे आगु सुबुंफोरा गोदान अन्थाइ मुगायाव साबसिन हामसिन अन्थाइ हाथियारनि अनगायै बोर्ला-थिर बानायनाय, हानि आइजें बानायनाय, अर बाहायनाय, गोथैसि बाउनाय, न'-बां लुनाय, गराइ दाब्रायनाय, मोसौ मैसो फिसिनाय, सि दानाय, जादु-मन्त्रजौं सुथुरजौं दावहा नांनाय आरो आबाद मावनायनि गोदान गोदान आदब खायदा सोलोडे । नाथाय गुबुन गुबुन आदब-खायदा आरो गोदान गोदान राहाजौं थाना थानायनि लामाखौ फोसाबनो गोरबोआव सौंथिनि गुथाल सोमजिहोदौंमोन । साइखड (shadow) सोलेरजौं मानो लोगो लोगो थाफायो ? मानो बियो दै सिडव नुजाथियो ? गोथैफोरा सिमाडव माबोरै नुजायो ? साननि सोरां, हरनि खोमसि, अखांनि अखाफोर, हाथरखिफोरा मा ? बेबादि माखासे सौंथिनि गुथाला बिथांमोनखौ जोबोद गोमोहाबनो गोनां खालामो । रंगिना संगिना बेफोर बाथ्राखौ संनो हायिनि जुनै बुहुमनि एबा संसारनि माखासे जिबि जिरादजौं माबा मोनसे नुवाथारि गोहो (super human power) सिथाबना थानायखौ बिथांमोना फोथायनो गोनां जानानै फैयो । नुवाथारि गोहोनि फोथायथि (faith) लेखा गोजाम अन्थाइ मुगानिफ्राय दिनैसिम बायहाजार बायकौटि मोदाइ मोदुम सुबुं समाजाव सोमजिखांदौं । (".....they imagined the objects around them to be persons like themselves, thoughtful beings, some with great power." -Arkaday Leckum) बाथौ फुजा आरो खेराय गारजायाव बर' अजाया मन्त्र'जौं सानथ्र हायि मोदाइ मोदुम रायखाडे । बेयो मोनसे आगु हुदा । बाथौनि आगु महरखौ गाहायनि नेरसोन बिजिरनायफोरखौ रोखायै मोनदांहायो ।

( क ) अन्थाइ रागाम : अन्थाइ मुगायाव मैहुर खालामना जाग्रा आगु सुबुंनि जुनै अन्थाइनि हाथियारानो रैखानि गिरिमोन । बेखायनो नुवाथारि गोहो एबा मोदाइ महरै बिथांमोना अन्थाइखौनो फुजिनो लागोयो । गोदोनि बे फोथायनाय लेखा बाथौ

बिथानि सिजौ गुदियाव थरसे अन्थाइ रागाम (गोजों) दाबो होनांगौ। मानोना, अन्थाइयानो गोहोनिगिरि नेरसोन। अन्थाइखौ गोहोनि नेरसोन महरै बाहायनाया गुबुन गुबुन धोरोमावबो दड' । (“.....and this stone, which I have set up for a pillar, shall be God's house” - Jacob in the Bible).

**(ख) दाउ बिदै :** बाथौनि सिजौ गुदियाव अन्थाइ रागामजों दाउबिदैबो दैसे होफानांगौ। बे हुदायाबो दिनैनि नडा, आगु सुबुंनिसो। जिबि-जिरादफोरा माबोरै उजिखाडे ? बे आगु सुबुंनि मोनसे गोनां सौनाय। दाउदैनफ्राय दाउमा-दाउसा उजियो। बे मोनसे नुगिबि जाथाइ (a visible event)। आगु सुबुंफोरा सानखाडे दि दाउदैयाबो सोरजिनि मोनसे गोहो। नाथाय मेगनजों बिनि सोरजिसुला गोहोखौ नुनो मोना। बेखायनो दाउदैयाबो बिथांमोननि मेगनाव नुवाथारि गोहोनि महर मोनो।

**(ग) जुलि नेरसोन :** हौवा-हिन्जाव सानैजों सुबुंनि जुलिसे। जो-जोला मानैजों दाउमा-दाउसा जुलिसे। बुन्दा-बुन्दि मानैजों जुनारनि जुलिसे। जुलिनि गेजेरथिनो गोदान सोरजि। बे जुनिया दर्शननि फोथायथि लेखा आगु सुबुंफोरा मोदाइखौबो जुलि जुलि फुजिनो लायो। दिनैबो बाथौ खेरायनि मोनथिनाफोराव मोदाइखौ जुलि जुलि रायखानाय जायो। बाथौ बिथायाव थुनाय बिजुलि-औवा आरो ज'रा ज'रा खुन्थियाफोरा सिउफोलेरनि जुलि मोदाइनि नेरसोन होनानै अजाफोरा बुडे।

**(घ) गोथार अर:** अरा आगु सुबुंनि मोनसे गोथार गोमोनां बिबुरखां (discovery)। अरा जौनानै खोमसिखौ जेरै होखारो, बिब्दिनो गासैखौबो खामनानै हागार खालामो। आगु मैहरारि सुबुंनि जुनै अरादि बेसेबां गोगोम मदद। अरनि खामनाया आगु सुबुंनि जुनै सानथ्रहायि मोनसे सोमोनां नुवाथारि गोहो। बेखायनो आगु सुबुंफोरा बे गोथार बेसादखौ गोदोआवनो दोहोरोमजों सनदेर होदों। लासै लासै सोद्रोम मुगायाव बिनो जेवारि, आलारि आरो गासाबाथिनि महर मोनदों।

**(ङ) सि गुफुर-गोजा आरो बिबार गुफुर गोजा:** बाथौ बिखायाव गायसननाय जुलि औवा बिजुलियाव सि गुफुर आरो सि गोजा गांनै खाना होनाय जायो। बिब्दिनो फुजानि जुनै बिबार गुफुर आरो गोजा बाहायनाय जायो। गुफुर आरो गोजा गाब लोगोसे बाहायनाया तान्त्रिक साधनानि नेरसोन। [“The colours white and red are a profoundly important symbolic conjunction throught Tantra worship and for that matter, in almost all the religions of the world. Tantra The Erotic Cult : by Capt.: F.D. Colaabavala.]

**(च) सिजौ बिफां :** सोरजिनि गिबि बिफां। बेनि सिरि मोनबाया ग'साइनि गेदेमा मोनबा सोरजि (जायनि माया महिमाया आगु सुबुंखौ गोमोनो गोनां खालामदोंमोन) हा, दै, बार, सान आरो अखांनि नेरसोन। अन्थाइ आरो दाउदैजों लोगोसे बे मोनबा गोमोनां सोरजिखौ आगु बड 'साफोरा मोदाइ महरै फुजिदोंमोन। आथिखालाव बेखौ बा सोरजिनि गिबि आनान ग'साइनि नेरसोन महरै नाजावनाय जादों।

**(छ) दौरि आरो दौदिनि :** ऋक्बेदाव 'दौ' सोदोबनि औंथिखौ सिबिजाथाव मोदाइ (उपास्य देवता) होनना बुंदों। बेयो बड 'सोदोब जानांगोन। थाइजा महरै बे सोदोबनि औंथिया जाहोग्रा एबा लोंहोग्रा। मुंमा महरै बेनि औंथिया सिबिजाथाव मोदाइ। दौरि आरो दौदिनि सोदोब मोननैखौ बिजिरबोला बे औंथिखौ जों थारै मोनदांहायो। जाय गोथार हौवा सुबुंनि जेरै 'दौ' एबा मोदाइखौ फुजिनाय जायो बेनो दौ+आरि =दौरि। गुबुनफारसे 'दि' एबा 'धि' माने गोसो बाउनाय एबा 'ध्यान'। जाय गोथार हिन्जाव सुबुंन धि एबा ध्याननि गेजेरथिं गावनि मोदोमाव मोदाइनि गोहोखौ मानखोहोनानै दानि गोदोनि आरो इयुननि बाथ्राफोरखौ थारै फोरमायनो हायो बिनो दौदिनि (दौ+धि+नि)। दौरि आरो दौदिनिया सिउब्राइ आरो सिउबुइनि सानै गोथार सुबुं थान्दै महर।

**(ज) गिबि बा-सोरजि आरो बड 'सा :** आथिखाल बिज्ञान मुगानि सिथा नंदेरै गोदान अन्थाइ मुगाखौ थारै मिथिंगा मुगासो (age of naturism) बुंथावो। मानोना बे समाव मिथिंगानि जिबि जिरादफोरखौ बुथुम बुथुम आगु सुबुंफोरा थाना थानायनि राहा खालामनो गोनां जायोमोन। बे समाव आगु सुबुंफोरा मिथिंगानि सोमोनां जायोमोन। बे समाव आगु सुबुंफोरा मिथिंगानि सोमोनां हा, दै, बार आरो अखां सोरजिखौ मोदाइ महरै फुजिदोंमोन। (.....the earliest form of religion must have been the worship of objects of nature, and evidence in support of such a view has come in from archaeological excavations conducted in Egypt and elsewhere.” - Max Miller) गमामायैनो हा, दै, बार, सान आरो अखाड ग'साइनि मोनबा सोमोनां सोरजि। बे मोनबानि सोरजिनि गुदियाव मोनफा मोनफा नुवाथारि गोहो सिथाबना थानायखौ आगु सुबुंफोरा फोथायनो गोनां जानानै फैयो, आरो अन्थाइ-दाउदैजों लोगोसे बिफोरखौ दौ (मोदाइ) महरै फुजिना लायो। आगु सुबुंनि बे साबा दौयानो जादों (1) हा-मोदाइ, (2) दै-मोदाइ, (3) बार-मोदाइ, (4) सान-मोदाइ आरो (5) अखां-मोदाइ। साबा दौ=बादौ। बे बादौखौ फुजिग्राफोरानो बादौनि फिसा=बादौसा एबा बड 'सा। बाथौ बिथायाव औवा खामिजों बानायनाय



दाउथु बिखाया बे बादौनिनो नेरसोन जानांगोन ।

( झ ) शिउब्राइ आरो बा-तत्व : सुख-शान्ति, गिनाय-सोमखिनाय, बेराम-आजार, मारखि-माउर आरो दुखु-खैफोद, - बेफोर गासै मोदाइ-मोदुमनि माया महिमा होननाय आगु सुबुंफोरा फोथायोमोन । आगु सुबुंनि बे फोथायनाय लेखा माखासे मोदाइ फुजिनायनि हुदा समाजाव सोमजिखाडे । अन्थाइ दाउदै, हा, दै, बार, सान आरो अखांनि अनगायै जुनारनि मोदाइ जोनोम-जोला ( पशुपति ), बेराम-आजार आरो दुखु-खैफोदनि मोदाइ गारजा एबा संसारि, गारायनि मोदाइ बैसोमुथि, आबादनि मोदाइ भाण्डारि, दायना मोदाइ खांसुलि आरो खुमारि-जुखिनि-बेफोर मोदाइया गोदान अन्थाइ मुगानि जोबथा समावनो बड' समाजाव सोमजिखांनाय होनना सानथावो । मंगलय बड'सा समाजाव बेबादि गोबां मोदाइ जाउरिखांनाय समाव द्वापर मुगायाव आनान ग'साइया मोदाइनिगिरि महाराजा शिउब्राइनि महरै बहुमाव नुजाथियो । महाराजा शिउब्राया नुगिरि मोनगिरि महर (a visible life form of God) । मिरुगिरि एबा हाजो हिमगिरिनि सिजौ बिफां सिडव नुजाजेनदोमोन होनना नै दाबो बड'साफोरा फोथायो । मोनिसनि जिउ सोलेरनि महरै नुजाथिनाय जुनै बिथांखौ जिउब्राइबो बुंनाय जायो । बिथाडनो 'बादौ' एबा मोनबा गोमोनां सोरजि हा, दै, बार, सान आरो अखांखौ बा सोलेर तत्व क्षिति, अर्प, तेज, मरुत, व्य'मजौं सुजुनानै बा-तत्वनि नेरसोन सिजौनि गेजेरजौं आनान ग'साइ अबंलाउरिखौ फुजिनायनि दोहोरोम हुदा बहुमाव फसडे । बिथाडनो बा तत्व दर्शननि गिबि गुरु ।

“सिजौनि सिरिया सिरिबा  
बाथौनि बान्दोआ बान्दोबा,  
बर' बोराइनि राव आरो  
आसाराबो मोनबा ।”

बे मोनथिनाया बाथौनि बा तत्वनि मोनसे रोखा इंगित । बा-तत्वनि गेजरथिं सोरजिनि रंगिना महरफोरखौ बिजिरनो हास्थायनाया बड'सा महारिनि गुदि आरो गिबि तत्व दर्शन । अबंथान्दै जिउब्राइनि गारांनिफ्राय ओंखारजेननाय गुदि दैखोआ मोनबा, जैरै, सा, रे गा, पा, धा, ( भुपालि ) । बे मोनबा दैखोखौ जि बाद्ययाव खुमनाय ( थुमनाय ) जादों बियो खाम । बा दैखोआ गुसुथिजौं सुबोला जेराव बुडे बियो सिफुं । मोनफा दैखोनि मोनफा गुदुं । बेखायनो सिफुंनि गुदुड गुदुंबा । बड'साफोरनि गिबि साननाय अन्जिमायाबो मोनबा, जैरै - से, नै, थाम, ब्रै, बा । बिदिनो गिबि मन्थ एबा रावा मोनबा, अम, हिं, खिलं, फोट, से । गिबिगुरु साबा

ग'साइ गुरु, मोदाइगुरु बिमागुरु, बिफागुरु आरो दिक्षागुरु । गियाननि अंग मोनबा, सालाइ, बिगुर, आथें, हासुनाय अंग, खिनाय अंग, आरो हांबोनाय अंग (lungs) । मोनबा आसार, गुरु सिबिनाय, ध्यान आरो दान दोहोरोम खालामनाय, गेदेरखौ खुलुमनाय आरो उन्दैखौ अननाय, खौसेयै मावनाय जानाय आरो माहारि हादरनि जुनै जिउ बाउनाय । मोनबा गोथार लाइफां लाइ, - थुलुन्सि, जाथ्रासि, खासिहाग्रा, दुब्रिहाग्रा आरो बेल बिलाइ । गिबि आरो गुदि मोनबा सोरजि, - हा, दै, बार, सान आरो अखां । बे बा सोरजियानो बिश्वसंसारनि गासै मोदाइ मोदुम, जिबिजिराद, थावरिनानै दड' । बा तत्वनि गेजेरै आनान ग'साइजौं बिश्वसंसारनि बे गोरोबथियानो (this integrity) जादों बाथौ ( मोनबा गोथौ ) दोहोरोम आरो सानथौ ।

: बाथौजौं खेरायनि सोमोन्दो :

बरपेटा जिलानि रुपही आन्सलिक बाथौ आफादिनि मावथि बाथौ सिबिसुला मुस्री उपेन बसुमतारीनि बादिब्ला हानथुखौ खेना ( खरायना ) मोदाइखौ रायनायानो खेराय । त्रिपुरी बरक फोराबो खेर फुजा दड' । बे खेर सोदोबनिफ्रायबो खेराय जानो हागौ । जायखि जादोला, सोदोबा जैरैनो फैयाथौं, खेरायादि मोदाइनाव बोर बान्सा बिग्रा दोहोरोम सिबिसुलाफोरनि गोथार आर 'ज जथुम्मा (a sacred mass prayer) बेखौ नड बुंनो हाया । गोदोनि आगु सुबुंफोरा हौवा हिन्जाव लोगोसे गृद गृद मोसाबोला गावसोरनि आगान्द्रिजौं हानि हासारा बारायो होनना फोथायोमोन आरो बे फोथायनाय लेखा बोथोर-सफैबोला रंजा-बाजा दल दामै दामै मोसायै मुसुरै दुब्लिखौ आबाद गोबां (rich with crops) खालामनो थाखै आबाद मोदाइनि खाथियाव आर 'ज गाबोमोन । आबाद मोदाइनि खाथियाव आगु सुबुंफोरनि बेबादि आर 'ज गाबनाय दोहोरोम आफादानो आथिखालनि आसु खेराय आरो माइसालि खेरायनि गिबि महर । आगु दिननि खेराय आरो दा दिननि खेरायनि मादाव मोनसे फारागा बेनोदि, दानि खेराइया दोहोरोमनि नेमखान्थि सोमजिदों मोनब्लाबो सानथौ सोमजियाखैमोन, आरो बेनि जुनै आगु सुबुंनि खेराया सानथौजौं मोनबो लोबबा गैयामोन । गुबुनफारसे आथिखालाव जौं नुनो मोनोदि खेराय नडब्ला बाथौफुजा जानो हाया आरो बाथौ सिजौ नडब्ला खेरायबो जानो हाया । दुखु-खैफोद, बेराम-आजार आरो मारखि-माउरनि मोदाइ संसारि गारजानो खेराय होब्ला बाथौनि बिथा खोनानै गसाइनि नेरसोन सिजौ बिफांखौ गायसनथारनांगौ ।

आर्ज शास्त्रनि पन्चक सानथौआ ( पन्चदेबता, पन्चनद पन्चपल्लव, पन्चप्राण, पन्चप्रदीप, पन्चवान, पन्चमकार, पन्चबेद, पन्चमहाजज्ञ, पन्चानन, पन्चरत्न, पन्चामृत,

पन्चमुख, पन्चभुत, पन्चज्ञानेन्द्रिय, पन्चकर्मेन्द्रिय, बायसेश्रा) बड 'साफोरनि बा-तत्व सानथौनिफ्राय गावस्रालानाय फोथायथावो होनना ।

बिब्दिनो, सिजौ नडब्ला आसु माइनाव आरो सालि माइनावनि खेरायाबो आबुं जाया । बिश्व संसारनि गासै मोदाइ मोदुम आरो जिबि जिरादिनि सायाव गोसारना थानाय ग 'साइनि नुवाथारि गोहोजौ खौसे जानो हास्थायनायानो बाथौनि सानथौ । बेखायनो जेराव बाथौ बेयाव खेराय आरो जेराव खेराय बेयावनो बाथौ । बाथौ आरो खेराया मुद्रा मोनसेनि बिखुं आरो बिखा ।

### : बाथौआव सिउब्राइ आरो सिउबुइनि गोहोम :

गोदोनि बर' अजा आरो गोरान्दाफोरा बुंनायबादिब्ला बुहुम संसारनि असित अनागारि मोदाइ मोदुम आरो बाइगर मोनिसफोरखौ दबथायनानै सित आरो थार आसारफोरखौ रैखा खालामनो थाखै आनान ग 'साइ बाथौब्राया मेरुगिरिनि सिजौ बिफांनि सिडव अबंधान्दै महरै नुजाथियो । बेयावनो बिथाड तप साधनानि गेजेरजौ गावनि आगसि आखान्थिनि मोदाइनिफ्राय सासे समायना बुरै सोरजियो. बे बुरैयानो बिथानि जिउ लोगो सिउबुरै । सिउब्राइया सुबुं माहारिनि बिफा महर आरो सिउबुइया बिमा महर । सिउबुइनि महरा मोननै । मोनसेया दिबि बिमा महर, आरो मोनसेया बिमा कालि सोमस्रि ( चामुण्डा) महर । बिमा गिबि महरै बियो फालिग्रा बिफा सिउब्राइनि मददगिरि, आरो बिमाकालि एबा सोमस्रि चामुण्डा महरै बियो तान्त्रिक गोहोनि गिबि । बाथौनि मोनथोरगिरि अजाया सिउब्रायनि आरो मोदाइनि गोहो मानखो जाग्रा दौदिनिया जानो हागौ सिउबुइनि महर ।

### : बाथोआव माखासे मोदाइनि गोहोम :

खायसे दोहोरोमसुला सानसुमैफोरा बुंनाय बादिब्ला बाथौआव थुनाय ज 'रा जिद' औवानि खुनथियाफोरा सिउफोलेरनि जिद' मोदाइनि नेरसोन । जानोबो हागौ, मानसिनि फोथायनायनि गेजेरजौ बुहुम संसाराव हान्जा हान्जा मोदाइफोलेरबो सोमजिखांदो । (Myths and Mythology copped up into branches and found the gods with families, sons and daughter." - Editorial, places of worship and pilgrimage in Assam. Vivekananda kendra publication, 1984) बड 'साफोरा गोदोनिफ्राय फोथायबोनाय मोदाइफोरा साफ्रोमबो आखाफाखा दावहारु जोहोलाव । सोरबा मोदाइया आखाबेतजौ दाहाल सिबनो रोंगौ, सोरबा रोंगौ थुंघ्रि सिबनो । सोरबा हागौ मालदावहानानानै सुथुरखौ संप्ले संप्ला खालामनो, सोरबा रोंगौ नाव जावनो । सोरबा रोंगौ खैजोमा फनानै सुथुरखौ हुग्लुं हुसि होसोखारनो,

सोरबा रोंगौ खामाव बारखोना सुथुरखौ समखिहोनो । सोरबा रोंगौ बादालि बिरनो, सोरबा रोंगौ सुथुरनि नाव दोबैहोनो । सोरबा रोंगौ गान्दौला बोननानै सुथुरखौ खाखबनो, सोरबा रोंगौ मोसाथै मुसुरै सुथुरखौ फान्दायनो । सोरबा रोगो मैसौ-मुफुर-माउजि गेलेनानै सुथुरखौ गाग्लोबनो, सोरबा रोंगौ गराइ दाब्रायनो आरो सोरबाबा हागौ लैथौ सायाव भुम सोरजिनो । बेनिफ्राय मोनदां हायोदि, बड 'साफोरा मोनसे समाव सुथुरखौ फेजेननो थाखै बाथौ खेरायनि गेजेरजौ गोहोनि साधना खालामदोंमोन, आरो जानो हागौ बे साधनाया द्वापर मुगायाव थामथिम महर (a systematic form) मोनदोंमोन मोदाइनि गिबि महाराजा सिउब्राइनि दैदेननायनि गेजेरजौ ।

'Early History of Kamrup नि लिरगिरि रायबाहादुर कनक लाल बरुवा बुंनाय लेखा खू:सि: (खृष्टिनि सिगां) 2500 अब्दयाव पान्जाबनि पन्चनद ओन्सोलाव आर्जफोरा राइजो जानो जग्रोयो आरो बेनि हाजारसे बोसोर उनाव खू:सि: 1500 अब्दिनि उनावसो आर्ज सोदोमस्रिया दुलाराय भारतनाडै गोसारो । खू:सि: 1500 अब्दयाव कुरुक्षेत्र दावहा जायो आरो बेनि लोगो लोगो द्वापर मुगाया थुंगियो । थामहिनबा, त्रेताजुगनि हखाइ 500 बोसोर दानख 'बोला खू:सि: 2000 अब्दिनिफ्राय खू:सि: 1500 अब्दिसिम द्वापर मुगानि बोथोर हमजायो ।

द्वापर मुगाया जादों आर्ज अनार्जनि बेरेखा बेरेखि (द्वन्दबाद) नि मुगा । बेदव्यासनि बेद आरो पुराण सास्त्र रनसायनायनि मुगा । ब्रह्मा बिष्णु, कौरब-पाण्डबनि मुगा आरो लोगोसे, गुबुन फारसे, महिरंग दानब मयदानब, घटक किरात, बानासुर, नरकासुर, भगदत्त, हिरिम्बा आरो मोदाइनि गिबि महाराजा सिउब्राइनि मुगा । बे मुगायावनो अनार्ज किरात, दानब आरो असुरफोरखौ फोजोबनो थाखै माखासे मोनथोर लिरथुमनानै आर्ज अथर्बा मुनिया अथर्ब बेदखौ गावनि मुडै फोसावो । बेनिफ्राय रोखा मोनदांहायो, गात्रि मोनथोरफोरखौ आर्जफोरा बै समाव अनार्जफोरनि बेरेखाथै बाहायदोंमोन । बिदियाव अनार्ज मंगलीय बड 'साफोरा दानब, दैत्य, म्लेस असुर आरो बायसेश्रा मुगैलु रावै आर्जफोरजौ मुगै-सुगै खालामजानानै आखाइ आथिं हेबनानै थि दलर जना थानो हायो ? बै बानयुद्ध आरो मोनथोरनि जुगाव जैरैब्लाबो अनार्जफोराबो सोरनिबा मोन्थोर साधनानि गेजेरजौ गोहोगोरा आरो बोलोगोरा जानानै थाना थानायनि लामा लानो हास्थायनांगौ जादोंमोन । अनार्ज माहारिनि बे लामा दैग्राया सोर जानो हागौ ? खन्थाइमा बिजाब महाभारताव नायहरबोला सिउब्राइ (सिब)नि अनगाथै रावबो राजा महाराजानाव जौं बे गोहोमखौ नुनो मोना । बान राजाया सिउवारिमोन । बे बिदिन्थिनिफ्राय बेखौ मोनदां हायोदि बै

समाव दुलाराय अनार्ज माहारिनि राजाफोरजा बयनिबो थाखाय सिबिथाव दिथागुरु सासेयानोल 'मोन आरो बिथाडनो जादों मोदाइनिगिरि महाराजा सिउब्राइ ।

गोरबोजों सिबिबोला एसेयावनो गोजोनग्रा आरो असित खालामोबोला एसेयावनो रागा जोंग्रा महाराजा सिउब्राइनि आखुआ थारैनो मंगलीय । बिथानि तपस्याखौ आवलायनो नाजानायाव खाफालनि मेगननि अरजों सावनानै कामदेबखौ बिथाड हंगार खालामाखैमोन होनब्ला ? गावखौ मुगै सुगै खालामनायाव आसल खर 'खौ हास'ना बोरमानि खर' लागायनानै दक्षराजाखौ मादि मिनिथाव साजा होवामोन बिथाड । बाथ्रा दानथेलायनायाव जेननानै आर्जफोरा मोसा बानजों बुथारनो नाजानायाव आसिफिसाजों मोसाखौ सेलायनानै बेनि बिगुरखौ जान्जियाव गानना आर्जफोरखौ लाजिफोनाडखैमोन होनब्ला ? बेनि उनावथ' जिबौ बानजों बुथारनो नागिरनायाव जिबौफोरखौ गोदनायाव माला गाननानै बोराइया जांखाव ( ताण्डब ) मोसानायाव त्रिभुवनानो खमफिखांदोंमोन । सागर मन्थननि समाव बिष दौजानाबो थैयियाव ' नीलकन्थ' होननानै आर्जफोरा बोराइखौ बाख्यायनो गोनां जायाखै होनब्ला ।

दामग्रा, देग्रा, मुसुरग्रा, मोसाग्रानिगिरि, खाम, सिफुं, जथा, सेरेन्जा, गंगनानि सोरजिगिरि, दौदिनि मोदोमाव मोदाइनि गोहो मानखेहोग्रा अजा, जादु बिद्यानिगिरि महाराजा सिउब्राइ बिथाडनो मोदाइनिगिरि, मोनिसनि गिरि, जायनि खाथियाव आर्जफोरा, खर' गंगलायनो गोनां जादों । परशुराम, बिश्वामित्र आरो अर्जुनमोनबादि आर्ज क्षत्रिय जोहोलाव दावहारुफोराबो बिथानि खाथियाव बोरला-थिर आरो मोनथोर बिद्या सोल्लोंदोंमोन । सोमोनां गोहोनि गिरि बै बोराइ सिउवानो बड'सा हारिमु रैखागिरि बाथनि बा-तत्वगिरि ।

### बुंस्लिमनाय

जेब्लानो जों बाथौनि बाथ्रा सावरायो अब्ला मोनसे बाथ्रा गोसोआव लानांगोन दि बाथौआ जादों मोनसे दोहोरोम आरो सानथौ । बे दोहोरोम सानथौनि गुबैथार बाथ्राया जादों - हा, दै, बार, सान, अखां, - जाय मोनबा गिबि सोरजिजों दुलाराय बुहुम संसारा गोरोबनानै दं बे बिश्वसंसारनि सोरजिगिरिया जादों नुवाथारि आनान ग'साइ अबंलाउरि । गुबुन फारसे थुनलाइनि रावै बै मोनबा गोथौ सोरजि एबा तत्वनि गिरियानो बिथोननिगिरि 'बाथौगिरि' एबा 'बाथौब्राइ' । थामहिनबा, आनान ग'साइनि बा-तत्व आरो बा सोरजिनि नेरसोना जादों सिजौ, जायनि औंथिया बयनिबो देरसिन जौसिन जिउमा, अदेबानि, आनान ग'साइ । बेखायनो बाथौ दोहोरोम आसारनि गेजेरजों सिजौ गुदियाव खुलुमोबोला दुलाराय सोरजिनि गेजेरजों नुवाथारि

आनान ग'साइखौनो खुलुमहरनाय जायो । सोरजिनि गेजेरजों फुजिनायानो आनान ग'साइ बोराइ बाथौनि थार फुजिनाय [ "To worship His creation is to worship God." - The Bible] ।

नाथाय दुखुनि बाथ्रा " आया थैदों आइखौ गारदों, आफाया थैदों आफाखौ गारदों, - थेवबो बोराइ बाथौ महाराजा नोंखौ फुजिनो गाराखै जों " होननानै बाथौसालियाव बड'साफोरा मोनथिना आवरायगासिनो दड'ब्लाबो बाथौनि महरा दिनै जेन रानम्राव-म्राव, लोरबां-बां आरो थैत्रोम ज्रोम । मानोथो बिब्दि जाखो ? जाहोना मोनसेल' नड, माखासे । बिफोरनि मादाव मख'नोगोनांफोरा जाबाय, (1) बाथौआव हाबसननाय बोरलि हुदा आरो बे हुदानि बेरेखायै फोसाबसुला गोदान हान्जानि बिग्रायखांनय आरो बेनि जाहोनाव गुबुन दोहोरोमाव गुस्लाइलांनय । (2) गुबुन दोहोरोमनि गोहोम । (3) गोनोखो फोसावनाय (Scientific propagation), दोहोरोम थुनलाइ आरो राजखान्थियारि मददनि आंखाल । आरो (4) माहारिनि लोरबां रांखान्थि । बेफोर जाहोनखौ होखारनानै बाथौनि महरखौ दिनैनि सुबुनि गोसोजों गोरोबथाव खालामनो हानांगोन । 'जौनि फुखि' 'दाउसा हालि हालि' बोरलि दा नडब्लाबो जायो । आगुदिननिफ्राय सिथाबबोनाय मोजां आसारफोर बाथौआव थाथों, दौदिनि मोसानायाबो हारिमुनि रेस महरै खेरायाव थाथों, - नाथाय बायहाजार मोदाइसानि मुं मुंखना दौदिनिनि मोदोमाव मोदाइ मानखांहोनानै तान्त्रिक फुजा खालामनो दा दरखार गैला होनना जों सानो । बेखायनो दा बाथौ खेरायखौ नांजासे फोसाबनानै थानसालिनिफ्राय बोखांनानै, मोनफ्रोमबो नखर आरो राइजोनि मन्दिराव थारै फसंसांसिगौ । बाथौ खेराया दुलाराय बड' समाज आरो हारिमुनि गुबै बिथा, जारिमिन आरो थुनलाइ ।

"मैदेरा गाबो अदाल गुदियाव,

मोनिसा गाबो सिजौ गुदियाव ।"

बाथौ खेराया सि गोजौ (of the supreme soul) दोहोरोम आसार आरो सानथौ, आरो बर' हारिमुनि हारामा । □

### लिरगिरिनि सिनायथि:

**रामदास बसुमतारी :** मुंदांखा थुनलाइगिरि रामदास बसुमतारीया बै समनि बरपेटा आथिखाल बागसा जिलानि जालाह चार्कुल अफिसनि बेखनथियाव थानाय सोनाब खग्राबारि गामियाव 1931 ई मायथाइनि 18 अक्ट'बराव जोनोम जादोंमोन । बिथानि बिफानि मुड बिष्टिराम बसुमतारी आरो बिमानि मुड हंली बसुमतारीमोन ।

बिथां बसुमतारीया 1943 इं. मायथाइयाव सोनाब रिहाबारी गुदि फरायसालिनिफ्राय 5 रां बृत्ति मोननानै गुदि फरायसालिनि आनजाद आरो 1947 इं मायथाइयाव जालाह एम.इ. फरायसालिनिफ्राय 7 रां बृत्ति मोननानै गेजेर फरायसालिनि आनजादखौ उश्रिदोमोन। 1951 इं मायथाइयाव बिथाड जालाह गोजौ फरायसालिनिफ्राय मेट्रिक आनजादखौ नैथि थाखोआव उश्रियो। न'खरनि रांखान्थियारि जेना-जेसिखौ सौसिनानैब्लाबो बिथाड गुवाहाटी कटन कलेजनिफ्राय I.A. थाखोनि आनजादखौ 1953 इं मायथाइयाव नैथि थाखोआव उश्रियो। 1955 इं मायथाइयाव बि.ए. थाखोनि आनजादखौ रांखान्थि आयदायाव अनार्च लानानै कटन कलेजनिफ्राय नैथि थाखोआव उश्रियो। बिब्दिनो 1967 इं मायथाइयाव बि.टि. आनजादखौ नैथि थाखोआव उश्रियो।

1956 इं मायथाइनि नबेम्बर दाननि 1 अक्ट'निफ्राय बिथाड मछलपुर गोजौ फरायसालियाव लोगो गाहाइ फोरोंगिरि महरै साखि मावो। बेनि उनाव बिथाड बै फरायसालिनि गाहाइ फोरोंगिरि मासियाव थानानै 1991 इं मायथाइनि गिबि नबेम्बरखालि साखिनिफ्राय आजिरा लायो। बर'राव-थुनलाइनि बागै बिथांनि बिहोमाया गोबां। बिथाड बर' साहित्य सभानि फारियै 1974 इं निफ्राय 1977 इं आरो 1980 इं निफ्राय 1983 इं सिम आफादगिरि महरै सायख' जायो। बिथांनि लिरनायफोरा बायदि लाइसि, बिसम्बिफोराव सेबखां जाबोदों। बिथांनि लिरनायफोरखौ थुबुर खालामना मुछलपुर गुदि बर' थुनलाइ आफादा "सोरजि आरो सानथौ' मुडै दिहुनदों। गुबैयै बिथांनि लिरनायफोराव - बाथौ दोहोरोमारि सानथौ, समाजारि, रांखान्थियारि, सोलेंथाइयारि बायदि आयदाफोरा गोबां सायख' जानाय नुनो मोनो। 2003 इं मायथाइयाव बिथाड रुसारि जायो।

### सोंथि :

1. मोनसे दोहोरोम आरो सानस्रिनि बाथ्रा बुंबोला मा बाथ्राखौबो बुंनंगौ जायो ?
2. आर्ज पण्डितफोरनि बादिब्ला 'धर्म' सोदोबा माबोरै सोमजिनाय ?
3. 'धृ' आरो 'मन' - नि ओंथिया मा ?
4. इंराजी रिलिज्यन (Religion) सोदोबा बबेनिफ्राय सोमजिनाय ?
5. 'रिलिजन' - नि ओंथिया मा ?
6. 'दोहोरोम' सोदोबनि ओंथिया मा ?

7. फिलस'फि (Philosophy) सोदोबा माबोरै सोमजिनाय ?
8. 'फिलस' आरो 'स'फिया' सोदोबा मा रावनि सोदोब आरो बेफोरनि ओंथिया मा ?
9. दोहोरोमनि आसारा मा सुंद'थै फोरमाय।
10. 'दर्शन' माखौ बुडे ?
11. रायथाइगिरिया फोरमायनाय बादिब्ला बाथौ दोहोरोमा लोरबां जानायनि जाहोनफोरा मा मा रायथाइनि हेफाजाबै फोरमाय।
12. आगु सुबुंनि साबा मोदाइया मा मा ?
13. बाथौजौ खेरायनि सोमोन्दोआ मा बादि रायथाइनि हेफाजाबै फोरमाय।
14. बाथौआव सिउब्राइ आरो सिउब्रुइनि गोहोमा मा बादि रायथाइनि हेफाजाबै फोरमाय।
15. बाथौआव माखासे मोदाइनि गोहोमा मा बादि रायथाइनि हेफाजाबै फोरमाय।
16. सिउब्राइ आरो बा-तत्तनि बागै सुंद'थै फोरमाय।
17. लिरसुंथाइ लिर:

(क) अन्थाइ रागाम, (ख) दाउ बिदे, (ग) जुलिनि नेरसोन, (घ) सिजौ बिफां, (ङ) दौरि आरो दौदिनि, (च) सि गुफुर-गोजा आरो बिबार गुफुर-गोजा (छ) गोथार अर।

### बेखेवना लिर :

- (क) बाथौ बिथायाव माखासे मोदाइनि नेरसोन फसंनाय जायो।
- (ख) आथिखाल बिगियान मुगानि सिथा नांदैरै.....मिथिंगा मुगासो (age of naturism) बुंथावो।
- (ग) सिजौनि सिरिया सिरिबा बाथौनि बान्दोआ बान्दोबा, बर' बोराइनि राव आरो आसारबो मोनबा।
- (घ) द्वारप मुगाया जादों आर्ज अनार्जनि बेरेखा-बेरेखि (द्वन्दबाद), नि मुगा।
- (ङ) गोरबोजौ सिबिबोला एसेयावनो गोजोनग्रा.....सिउब्राइनि आखुआ थारैनो मंग'लिय।
- (च) बाथौआ जादों मोनसे दोहोरोम आरो सानथौ।
- (छ) मैदेरा गाबो अदाल गुरियाव, मोनिसा (मानसिया) गाबो सिजौ गुदियाव।

# आंनि दाबुं आफा

## - रुपनाथ ब्रह्म

आंनि दाबुं आफा

आंनि दाबुं आफा

बे संसाराव रावनि रावब नड।

बिसि-फिसाखौलाय मा सानदं ?

साननानै नायद सरबिना सर जादं ।

दहनखौ लानानै दादु आफा -

नंलाय दादु आफा

बे संसाराव दहनखौ मनबाय थाया ।

थाखा फैसाखौलाय मा सानदं ?

दिनैस गनां गाबनन गैया ।

मानसिनि जिउया खालि माया -

आय'! खालि माया ।

हाबाब! थास थिलाइनि दै बादिस

दान दड दान गैया ।

मुनुस मैया मनथिनानैब

मान मनथिसवा ।

मान सानसहाया । ?

आय'! माखौ लानानै मानसिया

सान गावखौ गेदेर ? □

## खन्थाइगिरिनि सिनायथि:

**रुपनाथ ब्रह्म :** रुपनाथ ब्रह्मआ 1902 मायथाइयाव क'कराझार नोगोर सेरनि औवाबारि गामियाव जोनोम मोनो । बिथानि बिफानि मुड ध्वजेन्द्र ब्रह्म आरो बिमानि मुड खोदोमस्रि ब्रह्ममोन । रुपनाथ ब्रह्मआ क'कराझार गोजौ प्राइमारि स्कुलाव फरायजेननानै उनाव धुबुरीनि गोजौ फरायसालियाव फरायहैयो । बेनिफ्रायनो 1920-21 मायथाइयाव मेट्रिक आनजादखौ उश्रियो । बेनि उनाव बिथाड 1925 मायथाइयाव गुवाहाटीनि कटन कलेजनिफ्राय बि.ए. खौ पास खालामनानै उनाव 1928 मायथाइयाव कलिकता मुलुग सोल्लोसालियाव फरायनाय समावनो 1920 मायथाइयाव दमयन्ती ब्रह्मजो हाबा जायो ।

रुपनाथ ब्रह्मआ फरायनाय समनिफ्राय हारि आरो समाज फोसावनाय खामानियाव नांथाबनानै दंमोन । धुबुरिनि कटाव उकिल जाजेननानै धुबुरी ल'केल बर्डनि मेम्बार, उनाव आसाम बिधान सभानि मेम्बार जानानै मन्थि जायो । बिथाड गोलाउ सम मन्थि जानो हादोमोन ।

बिथाड गोबां खामानियाव नांथाबनानै थानायावबो थुनलाइ सोरजिनो नागाराखैमोन । बिथाड मदाराम ब्रह्मजो लोगो नांनानै 'खन्थाइ-मेथाइ' मुनि खन्थाइ बिजाबखौ सुजुनानै दिहुनदो । बेनि अनगायैबो बर', असमीया आरो बांला रावजो गोबां खन्थाइ आरो रायथाइ लिरदो । 'आहबान' आरो 'मिलन संगीत' फोरा बेनिनो नेरसोनथि । 'बर' जातिर संक्षिप्त परिचय' मुनि बिजाबा गांसे मख 'जाथाव बिजाब । बिदिनो हारि आरो समाजनि हाबा मावनानै उनाव 1968 मायथाइयाव रुंसारि जायो ।

## ओंथि फोरमायनाय :

**संसार:** बहुमनि बिखायाव सुबुं माहारिया बिसि फिसा, बिदा-फंबाय, गथ'-गथाइ लानानै जिउ खुंनायखौनो संसार बुडो ।

**मैया :** मैयानि ओंथिया माया । संसाराव मायानि दौलेंजो सुबं माहारिया खाख्रबजानाय खायनो आंनि नॉनि साननाय एबा सोरखौबा अननाय, मोजां मोननाय, रागा जौनायफोरा बेरखांदो ।

**थास बिलाइन दै :** बे खन्थाइयाव सुबुं जिउखौ थास' बिलाइन दैजो रुजुनाय जादो । थास' बिलाइन दैया जेरै मावब्लानो गोलैयो जेबो थिग गैया बिदिनो सुबुं जिउबाबो माब्ला गोमोरलांगोन बेनि जेबो गर गैया ।

सौथि :

1. खन्थाइगिरिया आफा होननानै सोरखौ बुंदों ?
2. दोहोनखौ लानानै मा खालामनो नाड होनना बुंदों ?
3. बे संसाराव रावनिबो रावबो नड होनना मा फोरमायदों लिर ।
4. मानसिनि जिउखौ मानो थास' बिलाइनि दैजों रुजुदों लिर ।
5. खन्थाइगिरिया सुबुं जिउनि सोमोन्दै मा बुंदों फोरमायना लिर ।

बेखेवना लिर:

- (क) बिहि फिसाखौलाय.....सरनि सर जादं ।  
 (ख) दहनखौ लानानै.....मनबाय थाया ।  
 (ग) मानसिनि जिउवा.....दान' गैया ।  
 (घ) मुनुस मैया.....गावखौ गेदेर ।

## दै बाज्रुम

- प्रम'द चन्द्र ब्रह्म

रा रा रा रा

रौ रौ रौ रौ,

ज्राम ज्राम ज्राम ज्राम

ग्रौ ग्रौ ग्रौ ग्रौ.....

बान्दो-बानला सिफायनानै

जुगाम-खुलि नागिरदों आं;

थेगदाउ-बेगदाउ जेथिंबो ब्ला ब्ला थार,

दैमा दिहुं आं दि बुरलुंबुथुर -

हगार, आंनो लामा हगार ।

सौफाइ सौसि जेखौबो फोजावलांगोन,

दिनै हाया गाबोनथ' हागोन ?

हगार, आंनो लामा हगार ।

सोरबा आंखौ थुज्रेतहरदों,

सोरबा आंखौ बोज्रेतहरदों,

मोनथिया आं थांनांगौ थांगासिनो दं,

लामाया जिखि जाया गावनो थुंगिजासे

हगार, आंनो लामा हगार ।

दुलाराय सोर्जियानो दावगाबोला,

हे संसार । आंबोल' मानो थानो उन्दुना ?

नोंनि खुसियै ? सि: सि: सि:-

नै नोंनि खर' साजोंनो बाज्रुमनोसै, -

हगार, आंनो लामा हगार ।

सोरबा दामदों नुयि थानाव,

बोरहोनाय सुखांनाय जथा-खाम सुफिन,

ग्रोब ग्रोब बिजोंनो दावगागोन आं,

दैमा दिहुं आंलाय बुरलुंबुथुर -

हगार, आंनो लामा हगार ।

रा रा रा रा

रौ रौ रौ रौ..... । □

**खन्थाइगिरिनि सिनायथि:**

**प्रम'द चन्द्र ब्रह्म :** प्रम'द चन्द्र ब्रह्मआ 1916 मायथाइयाव क'कराझार जिलानि ग'दामारि गामियाव जोनोम मोनो। फरायसालियाव फरायजेननानै उनाव 1933 मायथाइयाव मेट्रिक आनजादखौ उथ्रिनानै ढाकानि रंपुर कलेजाव फरायहैदोमोन। 1937 मायथाइयाव गुवाहाटीनि कटन कलेजनिफ्राय बि.ए. खौ पास खालामनानै कलिकता मुलुग सोलौंसालिनिफ्राय असमीया आयदायाव 1941 मायथाइयाव एम.ए. खौ पास खालामो। बे बोसोरानो ए.सि.एस. आनजादखौबो नैथि थाखोआव उथ्रिनानै एस.दि.सि साख्रि मोनो। गोलाउ सम एस.दि.सि. साख्रि मावनानै 1971 मायथाइयाव साख्रिनिफ्राय जिरोन लायो आरो 1992 मायथाइयाव रुंसारि जायो।

फरायसा समनिफ्रायनो थुनलाइ सोरजिनायाव बिथाड नांथाबबोदोमोन। बिबार लाइसिनि उनाव बिथाड सुजुनानै दिहुननाय बिथ'राइ, अलंबार, हाथरखि हाला, रुप ओ चिन्ताधारा (मुझी आरो सानस्रि) बायदि लाइसिनि गेजेरजो बर' थुनलाइखौ जौगाहोनायनि बिबानखौ लादोमोन। बिथाड गुबैयै खन्थाइगिरिमोनब्लाबो रायथाइ, सावरायथाइ, सेन्सस रिपर्टफोरखौ लिरनानै फोसावदोमोन। बिथाड 'स'नाकी बिजाब' मुंनि खन्थाइ बिजाब सुजुनानै 1968 मायथाइयाव दिहुनो। प्रम'द चन्द्र ब्रह्मनि मख'जाथावसिन खामानिया जाबाय बर' इंराजी हिन्दी मोनथाम रावनि सोदोब बिहुं सुजुनाय। बेखौ 1996 मायथाइयाव सेबखानानै दिहुननाय जायो। बिदिनो जिउ थाजासेयाव हानायमानि बर' थुनलाइयाव बिहोमा होलानानै 1992 मायथाइयाव रुंसारि जायो। 'दै बाज्रुम' खन्थाइखौ बिथाड 'प्रमथेश' मुं लानानैसो लिरदो।

**सोदोबथि:**

जुगाम - जुगामि

थेगदाउ-बेगदाउ - हेंथा हेंसि

थैहाबगोन - सुथि गोमानाय, थैनायबादि जाथ'नाय

थुंगि जासे -जोबजासे

थानाव - थावनियाव, जायगायाव

बोरहोनाय - गोसो बोदोर खालामनाय

**सौथि :**

1. 'दै बाज्रुम' खन्थाइनि खन्थाइगिरिया मा नागिरदो ?
2. दुलाराय सोरजियानो दावगानाय समाव खन्थाइगिरिया गावल' मा जानो लुबैयाखै ?
3. खन्थाइगिरिया जुगामि खुलिखौ माबोरै नागिरदो।
4. खन्थाइगिरिया खाम सिफुं जथानि देखोजो ग्रोब ग्रोब बहा दावगालांफानो नागिरदो लिर।
5. खन्थाइगिरिया मा नागिरनानै, सोरखौ 'हगार आंनो लामा हगार' होन्दो लिर।

**बेखेवना लिर:**

(क) बान्दो बानला.....लामा हगार।

(ख) दिनै हाया गाबोनथ' हागोन.....लामा हगार।

(ग) दुलाराय सोरजियानो.....मानो थानो उन्दुना ?

(घ) सोरबा दामदो.....लामा हगार।

## दाउस्रिगोबा नागिरदों आं

- समर ब्रह्म चौधुरी

दिनैनि हराव बेसे गोलाउ ?  
 दाउब' बास्रिनाय स्रियाव  
 गावखौ खोमानानै  
 दाउस्रिगोबा नागिरदों आं अखां नायग्दावनानै ।  
 दिनै फुरनिमा, गावदां अखाफोरनि हर,  
 नाथाय अखाफोर गैया ।  
 दाखा दाखा गोसोम जोमैया  
 अखां साग्लोबबाय,  
 आय' ! गुफुर गावदां अखाफोरखौ गोलेर मन'बाय ।  
 दिनैनि हरा खोमसि-दोरसि  
 मुलुग संसारा  
 राव गैया ब'बि हाथासि ।  
 दिनै मि मासे गाबा, दाउ मासे गाबा  
 हाग्रामानि बिखायाव बारा सिन्थाइ देंखो दिखाडा ।  
 मुलुग संसारानो अन्थाइ जाबाय  
 बिदिन्था-आइराखिया  
 सोरजिजेन बेरेफुंनिफ्राय  
 जुग-जुग खाल खाल बिरै बिरै  
 मेंहाबनानै ओलैस्रि गुगुबना थाबाय  
 दिनैनि खोमसिहा अन्जिमा गैया  
 गिलु-बालु खाल हरा सोराडा सोराडा ।  
 स'नास्रि, अनजालि माइनाव

लाफा साइख' दाउखौ बुडा आडे  
 जमनि थान्दै खाल फेसायाबो  
 मिउ मिउ खर 'सुबाव गाबनोखौ गिबाय ।  
 दिनै बान गैया गोजोन गैया  
 मेगनाबो उन्दुनो ओंखारा ।  
 गिलु बालु खोमसि हराव  
 अन्थाइ जानाय थैहाबनाय गोथैबारियाव  
 आंल' सिरि मोननानै दड',  
 हरनि आगान संनो थाखाय  
 अखां नायग्दाव नायग्दाव  
 दाउस्रिगोबा नागिरनानै सिरिमोननानै दड' ।  
 आंनि बिखायाव  
 नरकाव गोग्लैनाय दुखारुनि दाहा  
 मेगनाव -  
 रामगिरि हाजोआव दैखारनानै दोनहैजानाय  
 हाथासि जक्षनि मोसेबरोडि-बेरलावनि बाहा ।  
 आं हारसिडै, आं हाथासि ।  
 आंनि सिगाडाव  
 थारा जादों मोनसेबोल' दरसि खोमसि ।  
 दिनै आं सानदों -  
 मुलुगाव सान गैया, सोरां गैया  
 बिदिन्था-आइराखिया  
 गुगुबना थानायनिफ्राय जेब्लाबो सिखारनाय नडा ।  
 स'नास्रि, बुंनो हागौ दा नों ?  
 बिदिन्था आइराखिया सानसे सिखारगोन  
 सानसे गोलेर दान'वा  
 मन'नाय अखाफोरखौ हगारहरफिनगोन ? □



**खन्थाइगिरिनि सिनायथि:**

**समर ब्रह्म चौधुरी :** 1932 मायथाइयाव कचुगाव खाथिनि पाटाकाटा गामियाव जोनोम मोनो । बिनि बिफानि मुड्ड मालसिं ब्रह्म चौधुरी आरो बिमानि मुड्ड सोरगोश्री ब्रह्म चौधुरीमोन । फरायसा समनिफ्रायनो ब्रह्म चौधुरीया हारि सिबिनाय आरो थुनलाइयारि हाबा मावबोदोंमोन । कटन कलेजनिफ्राय बि.ए. आनजाद उथ्रिनाय ब्रह्म चौधुरीया कटननिफ्राय फरायसाफोरा दिहुननाय अखाफोर(1954-55) लाइसियाव 'सिजौ गेरमसा' मुंनि खन्थाइखौ फोसावदोंमोन । समर ब्रह्म चौधुरीया गोबां लाइसि फोसावना दिहुनदों । बेफोर जादों फारियै बैराथी (1970) बारदै सिख्ला (1971) आरो रादाब (1968) । समर ब्रह्म चौधुरीया गोजौ सिरिनि सासे र 'मान्टिक खन्थाइगिरि । बिथाडा 'रादाब (1958) मुंनि गांसे खन्थाइ बिजाबबो दिहुनदोंमोन ।

बिथाडा सासे राजखान्थिगिरिमोन । आसाम मन्थि आफादनि सासे मन्थि जानायनि अनगायैबो बिथाडा एम पिबो जादोंमोन । 1991 मायथाइयाव अबथिरा जिउ खोमानाडो ।

**सोदोबथि :**

दाउस्रिगोबा – साथ बाहाइ, स्नि हाथरखिनि हान्जा  
हाथासि – हास्थायनाया फेलें जानाय, दुखु दाहा गोनां  
बिदिन्था – सम, बोथोर  
दुखारुनि दाहा – दुखुथियानि दाहा, गोबां दाहा

**सोंथि :**

1. खन्थाइगिरिया दाउस्रिगोबाखौ मानो नागिरदों ?
2. दाउस्रिगोबाया मानि नेरसोन ?
3. बिदिन्था आइराखिया मानो गुगुरुब गोग्लैना दड' ?
4. "रामगिरि हाजोआव दैखारनानै दोनहैजानाय हाथासि जक्षनि मेसेबरोडै बेलीवनि बाहा" – खन्थाइगिरिया मानो बिब्दि बुंदों ?

5. अखाफोरखौ गोलेर दानवा मन 'नायनि सोमोन्दै बर 'फोरनि गेजेराव मा सुबुं फोथायनाय दड' ?
6. खन्थाइगिरिनि अन्जालिनि मुड्ड मामोन ?
7. 'दाउस्रिगोबा नागिरदों आं' खन्थाइनि गेजेरजों खन्थाइगिरिया मा बाथ्रा फोरमायनो सानदों ?
8. माखौ जमनि थान्दै बुंनाय जायो ?

**बेखेवना लिर:**

- (क) दिनै पुर्णिमा, गावदां अखाफोरनि हर नाथाय अखाफोर गैया ।
- (ख) दिनै बान गैया गोजोन गैया मेगनाबो उन्दुनो ओंखारा ।
- (ग) हरनि आगान संनो थाखाय अखां नायगदाव नायगदाव दाउस्रिगोबा नागिरनानै सिरि मोननानै दड' ।
- (घ) बिदिन्था आइराखिया सानसे सिखारगोन । सानसे गोलेर दान 'वा मन 'नाय अखाफोरखौ हगार हरफिनगोन ।

## सिमांनि सैनाय

- सीतानाथ ब्रह्म चौधुरी

आय' ! सिमांनि सैनाय, -  
 सिमाडवनो था रजे मोगथाडव दाफै ।  
 नौनि लाजिस्तु मिनिखैरेनाय  
 मेगन ख 'नाजों हायना सारफावनाय  
 रोमोदो दख्नाजों जोब्लावखांनाय  
 महरा बाथं सिमाडवनो ।  
 सिमाडवनो रजे गोजोनग्लाय होफै -  
 रजे मोगथाडव दाफै ।  
 जालाखार बुंनाय मुलुगनि बिखायाव  
 लाइमोन नोडो माबोरै थावरिनो ?  
 दायना मोखांनि खामद्लाबनाय नोजोराव-  
 रैरुबु बिबारा रहायो हायावनो ।  
 दाफै नों दाफै सिमांनि सैनाय ।  
 जालाखार बुंनाय मुलुगाव दा-नुजाफै,  
 सिमां हादरनि हायना लाबोनानै  
 सिमाडवनो रजे गोजोनग्लाय होफै ।  
 नौनि दख्ना-थावसिनि मोदोमनाय  
 जारौ गुसथिनि मिनिखैरेनाय,  
 'आदा' होननानै मेगन मोहेरनाय  
 दौबा बेखेवनानै गय जाहोनाय -  
 बेफोर सैनाय सिमांनि बेसाद-  
 सिमाडवनो नों लानानै फै,  
 नौनि गुफुं बिखानि दुंबुद फिथिखा  
 सिमाडवनो रजे लुफावना होफै ।  
 नों दाफै ।  
 दायना मोखाडव दानुजाफै । □

**खन्थाइगिरिनि सिनायथि:**

**सीतानाथ ब्रह्म चौधुरी :** ग 'वालपारा जिलानि भालुकमारि ( द'तमा ) गामियाव सीतानाथ ब्रह्म चौधुरीया 1908 मायथाइयाव जोनोम मोनो । बिफानि मुडा मनबारु ब्रह्मचौधुरी आरो बिमानि मुडा लाउसी ब्रह्म चौधुरीमोन ।

गिलागुरि एल.पि. स्कुलाव फरायनाय जिउखौ जागाय जेननानै पुथिमारि एम भि स्कुल, धुबुरी, तेजपुर आरो उनाव शिवसागर हाइस्कुलनिफ्राय 1930 मायथाइयाव मेट्रिक आनजादखौ उथ्रियो । 1936 मायथाइयाव बीरझरा हाइस्कुलखौ गायसडो । बंगाइगाव कलेज गायसंनायावबो बिनि गोबां बिहोमा दड' । 1952-57 मायथाइसिम बियो एम. पि. जादोंमोन । 1975 मायथाइयाव बियो साहित्यिक पेन्सन मोनो । बिथानि बिजाबफोरा जादों 'कदम कलि' (1925), 'चकुल' (1929), 'आबेग' (1929), 'गाव-संगठन' (1945), आरो 'फुलेश्वरी दैमारि' (1975) । बेफोरनि अनगायैबो बियो मिलन, आबाहन, आरो बिबाराव बर' रावै खन्थाइ लिरदोंमोन । 1977 मायथाइयाव बंगाइगामियाव थानाय गावनि देरायाव रुंसारि जायो ।

**सोदोबथि :**

सैनाय - नायनो मोजां, रजे  
 रोमोदो - गोमोहां, रोमोदो- दो गाव  
 जालाखार - जारला, दुखु  
 दायना मोखां - गात्रि नोजोर  
 रैरुब - समायना, नायनो मोजां

**सोंथि :**

1. सिमांनि सैनाया सोर ?
2. खन्थाइगिरिया सिमांनि सैनायखौ मोगथाडव मानो फैजानो लुबैयाखै ?
3. सिमांनि सैनायनि महरा खन्थाइगिरिनि नोजोराव माबादियै बेरखांदों ?
4. खन्थाइगिरिनि नोजोराव सिमांनि सैनाया सिमांनि राइजोयाव माबादियै गेलेयो ?

**बेखेवना लिर:**

- (क) सिमाडवनो रजे गोजोनग्लाय होफै  
रजे मोगथाडव दाफै ।
- (ख) दाफै नों दाफै सिमांनि सैनाय  
जालाखार बुंनाय मुलुगाव दानुजाफै
- (ग) बेफोर सैनाय सिमांनि बेसाद ।  
सिमाडवनो नों लानानै फै

## आर'ज

### - सुरथ नार्जारी

आंनि बे थेर-बेथेर जालांनाय जिउखौ  
 आंनि बे लाथिख' जालांनाय जिउखौ  
 गोदानै सुजुनो होननाय  
 आबुं खालामनो होननाय  
 नोंखौनो हास्थायदों आफा  
 नोंखौनो अनसायदों आफा ।  
 गोरलैयै हमदांहागोन होननाया  
 गोरलैयै मोन्दांमोनगोन होननाया,  
 दिनै मानो गोजानसिन जाखो  
 दिनै मानो आनत्रायलांसिनखो ।  
 आंबो सिमान जायो आफा  
 नोंखौ मोजां मोननो समाय लानाया  
 दाबोनो जाफुंजोबाखै  
 आंनिनो गोसोनि बेरेखा फावा  
 गोसोनिफ्राय बारनलाडाखै ।  
 थेवबो, दुखुथिया जिउवा आंनि  
 जेनिबो गेजेन गोसोनि गेजेरजों  
 अरायबो नोंनिनो अननाय लुबैयो  
 अरायबो नोंनिनो अननाय मागियो । □

### खन्थाइगिरिनि सिनायथि:

**सुरथ नार्जारी :** सुरथ नार्जारीनि जोनोमा खुमगुरि गामियाव जादोंमोन । बियो इंराजि बिफानाव एम.ए. पास खालामो आरो एम. फिलबो लायो । सुरथ नार्जारीया गाहाइयै खन्थाइगिरि । ईसोरनि आर'ज आरो बिनिफारसे अनसायनाय गोनां खन्थाइ मेथाइ बियो गोबां रनसायदों । बियो गावनि माखासे खन्थाइयाव रबार्ट ब्राउनिनि Dramatic Monologue खान्थि बाहायदों । “जिउनि अलंबार” (1988) खन्थाइ बिजाबा बिनि गाव सोरजिनि खन्थाइ जथाय । सुरथ नार्जारीनि गुबुन बिजाबफोरा

जादों - “सान्दो बावदिया” आरो “आंनि थेनाय सैनाय” बिथाडा क'कराझार कलेजनि गोरायुं जानानै जिरोन लाबाय ।

### सोदोबथि:

थेर बेथेर - बायला जिला जालांनाय, गुलाय गुजाय  
 सुजुनो - जथायनो, दाफिननो  
 हास्थायदों - गोसोजों लुबैदों मोननो नाजादों  
 हमदां हागोन - मोनदां मोनगोन, गोसोजों बुजिनो हागोन  
 अनसायदों - नाजावदों  
 आनत्राय - गोजान जालां, जोबलां  
 सिमान जा - गनायना ला  
 समाय - सथबांसा, खिरा  
 बेरेखा फाव - उल्था आखु दिन्थिनाय  
 गेजेन - जेननाय, फेलें जानाय

### सोंथि :

1. खन्थाइगिरिया गावनि जिउखौ थेरबेथेर जालांनाय होनना मानो सानदों ?
2. आनान ग'साइया खन्थाइगिरिनिफ्राय मानो आनत्रायलांदों होनना गाव सानदों ?
3. खन्थाइगिरिया गावनि थेर बेथेर जालांनाय जिउखौ जथायफिननो आनान ग'साइनि खाथियाव माबादियै आर'ज खालामदों ?
4. खन्थाइगिरिया ईसोरनि खाथियाव मानो गेजेन जानांदों ?

### लिरसुंथाइ लिर:

थेर बेथेर जालांनाय जिउ, जिउखौ गोदानै सुजुनाय, लाथिख' जालांनाय जिउ

### बेखेवना लिर:

- (क) बे आंनि थेर बेथेर ..... अनसायदों आफा ।
- (ख) गोरलैयै हमदां.....आनत्राय लांसिनखो ।
- (ग) समाय लानाया.....दाबोनो बारलाडाखै ।
- (घ) थेवबो बे दुखुथिया.....मोननो लुबैयो ।

# खारसुमै समबादि

- अरबिन्द उजीर

सानफागाहाम सान होसोनायनि उनाव  
आं जेला जिरायथ 'यो लैथोनि उखुमनि सिडाव  
हारसिडै

सामखा सामखा बिलाइफोरनि गेजेर गेजेर  
फंलें फंलें थब्ल 'नि  
जोथि जोथि मेगनफोरा बारनानै थायो  
अब्ला

आंनि बिखानि दुब्लियाव आर्थिखालामफैनाय  
सिमांफोर बादिनो  
सान बारलांनाय रुगुंनि फारसे  
थाबायगलाडे मोनसे गुफुर गोजोननि सिमां।

बि समाव गोजाम बहुमा मोनसे गोजाम हर  
नाजावनायनि थाखाय थियारि जायो गोदानै।  
आं दानख 'यो मोनसे गोजाम दिन आयुनिफ्राय।

माइ माइरंनि बस्था, मैगं थाइगंनि बारि, मथरगारि  
प्ट 'क मार्केट, बायखुन, सिरिनाय बिलाइ।

आं बिसोरनि थाखाय नडमोन जानांगौ  
जायफोरा आंखौ दान्थि खालामा।

आंहा दंमोन गंसे बागान  
निरिबिलिनि  
जेराव गोजाम बिलाइफोरा सिरिलाडे गावबा गावनो  
गोजाम सानस्रिफोरबादि  
गोदान बिथ 'राइफोरा खिलियो

जेबो सोदोब खालामा जासेनो मिजिंफोर बादि  
आरो बिबारफोरा गावखौ साजायो  
बारनायनि थाखाय खन्थाइफोर बादि।  
गोमोसारबाय थायो बागाननि अखोरां  
थासारै हानि निरिबिलि मेथाइजों  
जिउरिसे बार जिउ बादि सेरफाखाय फाखाय  
दान्दिसे जिरायलाडे आंनि बागानाव।

आं गोजोननाय मोनो। आंनि सोरगिदिं  
गंसे बागान। आं जिरायथ 'यो खारसुमै सम बादि।□

## खन्थाइगिरिनि सिनायथि:

**अरबिन्द उजिर :** अरबिन्द उजिरा दानि बागसा जिलानि भेबेला गामियाव 1959  
मायथाइयाव जोनोम मोनो। गामिनि गुदि फरायसालियाव फरायजेनानै उनाव  
जालाहनि गोजौ फरायसालिनिफ्राय मेट्रिक आनजादखौ उश्रिनानै पाठशालानि बजालि  
कलेजनिफ्राय बि.ए. खौ उश्रियो। बेनि उनाव 1983 मायथाइयाव गुवाहाटी मुलुग  
सोलोंसालिनिफ्राय इंराजी आयादायाव एम.ए. खौ उश्रिनानै कारबि आंलांनि दकमका  
हायार सेकेन्दारि स्कुलनि फोरोंगिरि जानानै दं। बिथाड फरायनाय समनिफ्राय  
खन्थाइ सोरजिदोंमोन। बिथांनि खन्थाइ बिजाबनि मुडा जाबाय : 'मोन्दांथिनि  
रोजोबथाइ'। बे बिजाबनि थाखाय बिथांनो बर' साहित्य सभाया 1996 मायथाइयाव  
रांसार बान्था होयो। 2010 मायथाइयाव 'सोदोबनि सोलेर' खन्थाइ बिजाबनि थाखाय  
साहित्य अकादेमी बान्था मोनो। दासान्दि बिथाड खन्थाइनि अनगायैबो सम सम  
रायथाइबो लिरना लाइसिफोरनि गेजेरजों फोसावदों।

## सोदोबथि :

खारसुमै - खारनाय गोनां आखु, खारबाय थाग्रा  
लैथो - बिलात लाथा, मुलुग संसार  
सामखा सामखा - सोमखोर सोमखोर  
फंलें फंलें - गोलाउ नायनो मोजां  
आर्थि - हायाव लगायना दोननाय तार  
रुगुं - फैसालि, जिं

जोंथि मेगन – गोजों गुफुर थब्ल' बिबार

आयुनिफ्राय – समनिफ्राय

बायखुन- बायनो गोरलै

दान्थि – दिगदारि, आख' फाख'

निरिबिलि – निजोम

थासारै – थाजिम नडि

जिउरिसे- जाख्रिसे, खेबसे ज'

सेरफाखाय- थाखुमा थाखुमा थानाय

सोंथि :

1. बारखौ मानो खारसुमै होनना बुंदों ?
2. गोजाम आरो गोदान समनि ज'रायाव खन्थाइगिरिनि गोसोआव मा बादि सानमिनि गुथाल जाखोंदों ?
3. बुहुमनि गोजाम आरो गोदान थासारिनि सावगारिया खन्थाइयाव माबादि बेरखांदों ?
4. मिथिंगानि मा मा सावगारि बे खन्थाइयाव बेरखांदों ?
5. खन्थाइगिरिया बुहुमनि गोदान थासारियाव गावनि गोसोखौ मा बादियै गोरोबना गोजोन होनो हादों ?
6. खन्थाइनि गुबै सानथौखौ नोंनि रावजों लिर ।

**बेखेवना लिर:**

(क) आंनि बिखानि दुब्लियाव.....गोजोननि सिमां ।

(ख) बि समाव.....आयुनिफ्राय ।

(ग) आं बिसोरनि थाखाय.....खालामा ।

(घ) गोमसारनाय थायो.....आंनि बागानाव ।

(ङ) आं गोजोननाय मोनो.....खारसुमै समबादि ।

## मोदै आरो गोलोमदै

- नीलकमल ब्रह्म

अल इण्डिया टेक्सटाइल एकजिबिसन । फोथायनो गोब्राब मोनब्लाबो बाथ्राया नाथाय नंगौ – सासे बर 'सा इण्डाष्ट्रियेलिष्टा बे एकजिबिसनाव बयनिखुइ बांसिन सि साप्लाइ खालामनायनि इनदेन्ट मोनदों । 'इक'नमिक बुलेटिन 'नि प्टाफ रिपटार मि: भार्गजों एकजिबिसनाव थांफानानै आं नुदोंमोन बर 'नि इन्दि खुन्दोंजों पलियेष्टार टेरिन आरो रेयननि फाइबारजों सिनथेसिस खालामनानै दिहुननाय खुन्दोंजों दानाय सिफोरनि प्टाइलाव नायगिरि आरो बायगिरिफोरनि होंगो-दोंगोआ बांसिन ।

प्रेस कनफारेन्साव 'बर'सा इन्दि टेक्सटाइल' मुंनि फार्मनि बिगोमा गोमबोर मोसाहारीनि इन्टारप्रिटार जानांगौ आं । बिथाड आंनो स्रोद बुंखोमादों – आं क्लास सिक्ससिमल' फरायदोंलै नोंथां – आं बर 'नि बुंगोन, नोंथाड इंसिवाव दानस्लायलां ।'

गोमबोर मोसाहारीखौ बामखबनानै सम खुदमनो गोसो जादोंमोन आंहा । प्रेस कनफारेन्साव बिथांबादि हारि सिबियारि सासे बर 'सानि इन्टारप्रिटार जानो मोननानै आं गावखौनो गाव जोबोद बराद गोनां जानाय बादि मोनदोंमोन । सानदोंबो आं गोमबोर मोसाहारी लानाय आरो दिन्थिनाय लामाखौ जाखांबोनो हमनाय गोदान बर 'साफोरा लायोब्ला थांनायनि राहा जानायनि लोगो लोगो बर 'हारिनि मोनसे आदबनि नेरसोनाबो अराय समनि थाखाय जोरसार जानानै थागोन ।

गोमबोर मोसाहारीया बोरै बेबादि मुंदांखा इण्डाष्ट्रियेलिष्ट जानो हाखो बेखौ बुंनंगौब्ला बिथानि जिउ-खौरांखौ लानानै सल' दोंसे लिरनांगौ जायो । बेखौल' बुंनानै दोनदिनि – बिथानि मुड जेरै गोमबोर जिउनि अल 'खदफोरजों गोमबोर फाथिनानै बिथाड देरहोबोदों । बरादिनि एसे मदद मोनदोंब्लाबो बिथानि जिउवा जुजिनाय आरो देरहानायनि अराय जोंथि नेरसोन ।

नेहाद गोरिबद्राय नडब्लाबो गैजारोडिनिनो नायल' – जाल' सासेल' फिसामोन गोमबोर मोसाहारीया । हा-हु खालामनानै होनो होननानै गोरिब गुन्दाखौ थगाय-थसि जालाखार-बिलाखारनि बेहेराव गब्रायहोग्रा गुनजेत देवानिनि खैसाराव गायसननानै गोमबोर बिफा जालाख'वा गावनि बिसि अबाय आरो फिसाज्जा गोमबोरनि जिउवाव सिलिंखार लाबोदोंमोन ।

हाल-खदालजों राइजो जाबोनाय, नांगोल-जुंगालखौल' जिउनि आंगो राहा

होनानै सानबोनाय-मोनथिनाय जालाख 'वा थोसारजासे हा-हु, सोरजिनाय आरो गावनि हाल-सालखौ फोसाबनायनि सिमां नुदोमोन। गुनजेत देवानिनि थुनज्जालायनायाव जालाख 'वा गामिनिनो मोनबारु माहाजोननि खाथियाव गावनि फेरलेबसे हाखौनो बन्दकाव दोनलानानै खारलांदोमोन दाबसे गोदान बियाबाव। सौहैग्रोनमोना जालाख 'नि खर'आव सारन्थाइ गोरलैदोमोन। गुनजेत देवानिया जालाख 'नो खालामनानै होनो गोनां हाया गुबुन सासेनिखासोमोन। गावनि इज्जोतखौ लाखिनो थाखाय गुनजेत देवानिया उनाव गावनि हायाव जालाख 'खौ मावनानै जाथ' होनांदो। नाथाय जाय गोसोआ हांगार बे गोसोआ हाजार सुसाब्लाबो स'ना फिथरबादि जोथि जाया। बोसोरसे उनावनो गुनजेत देवानिया जालाख 'मावनानै जाथ'नाय हाखौ जालदाब फानहरदो।

आफाय-उफाय जेबो खालामनो हायियाव जालाख 'वा गाव नागारनानै थानाय गामियाव फैफिनदो। गावनि फेरलेबसे हाखौ बन्दकाव लाखिनाय मोनबारु माहाजोननाव गाबथाब खुलुमथाब बिनानै नबथियाव थानो मोनदोब्लाबो जालाख 'वा बोसोर जिब्रै बैसोनि फिसाज्जा गोमबोरखौ बैहोनदो।

गाव थैजासिम जालाख 'वा गावनि बरादखौ फिरायनो हायाखै। बेरामाव गोरलैनानै जालाख 'वा मोनबारु माहाजोननाव माइ आरो रां लायदैरै लायदैरै बन्दकनि म्यादखौ फोलाउलांदो। बेजो लो गोसे गोमबोरनि बैनांगौ समा बोसोरफा एफा एरदेरलांबाय थारो।

जिब्रै बोसोर बैसोआव दाहोना थानानै बैनांनाय गोमबोरा मोनबारु माहाजोननावनो सेंग्रा गेदेर देरदो। गावनि मावथि जांगिला आखुजो बियो मोनबारु माहाजोननि अनजालु दाहोना गाहाइ जाहैनो हारो।

बिफा जालाख 'नि मोन्दा बरादनि रेसा गोमबोरनि खाफालावबो साबफादो। नाथाय एसे जुदा लामायै।

मोनबारु माहाजोननि फिसाजो गिबि हाइनास्रिया उन्दैनिफ्रायनो मानोबा गोमबोरखौ मुसुंजोबो नायनो हायामोन। एसे दाय मोनब्लानो बियो बिफा मोनबारु माहाजोननो एरसन एरसन होनायमोन। नाथाय बाग्रांसि फिसाजो गिबिनि बाश्रायाव मोनबारु माहाजोना खैरेखेराय बाडमोन।

फिसाजो गदाय हांमास्रिहा नाथाय गोसोनि दाबसे ख'नायाव दैमुसे अननाय दंमोन - गोमबोरनि फारसे। बैसो राबोनाय लो गो लो गो हांमास्रिनि बे अननाया गोथौनिफ्राय गोथौसिन जालांदो। सानसे समाव गोमबोरनि दुखु-दाहाखौ रुजुनफानायनि हाबिलासबो गोसोआव फिसिदो हांमास्रिया।

बुनो थांब्ला, हांमास्रिनि बोदोर हाबिलासानो गोमबोरनि जिउ दिडखौ गुबुन

दैथुनफारसे देंग्रायहोदो। गोमबोर बिफा जालाख 'थैखालि बोसोरनि उननि बैसागो रंजानायाव सिख्ला लो गोफोर जंखायलायनायखौनो हांमास्रि बिब हाइनास्रिया बिफा मोनबारु माहाजोनजो गावनि बाग्रांसि आखलनि थाखाय सोंखारिजानायाव बिजि खान्दाखौनो साल रजं खालामनानै बांसावदो।

मोनबारु माहाजोननि गोसोआ संखिखांदो। अनजालि फिसाजो गदाय हांमास्रिनि इयुनखौ साननानै मोनबारु माहाजोना बैसागुनि उनावनो गोमबोरखौ होखारदो।

बिमा रान्दिखौ गामियावनो गारबोनानै गोमबोरा थानानै थानायनि दावहायाव ओंखारदो। दाहोनानि जिउनि फारसे मुगैनाय लानानै बियो गुबुन राहायै थानानै थानो थाखाय नोगोराव फैदो। नोगोराव बियो बन सिननायनिफ्राय लानानै थैला नारनाय, रिक्सा सालायनायसिम बायदि खिसिमनि हाबा मावदो। उनथाराव बियो ह'टेल गंसेयाव 'बय'नि हाबा मावदो।

ह'टेलनि बय जायामोनब्ला गोमबोरनि जिउ दिडया बबेथिं मोखां लागोमोन बेखौ दा गोमबोरा गावबो बुनो हाया।

ह'टैलाव बयनि हाबा मावनाय समावनो सानसेखालि सासे बर' बिज्नेस मेगनेटा गोमबोरखौ नायजोर नायजोर नायदोमोन। गोमबोरनि जिउनि खौरांफोरखौ गोसो होनानै खोनासंदोमोन बिजनेस मेगनेट बिथां दिगम्बर बसुमतारीया। ह'टेलनिफ्राय ओंखारलानाय समाव दिगम्बर बिथाडा गोमबोरखौ माब्लाबाफोर ह'टेल बयनि हाबाखौ नागारनांगौ जायोब्ला गावनाव नुजाहैनो थिनलांदो।

ओरैनोब्लाबो ह'टेल बयनि हाबाखौ गोमबोरा आंगायनाय मोनखाबायमोन। गामियाव बिमा रान्दि दं, बिफा जालाख 'बन्दक दोनलानाय हाखौ खालास खालामनांगौ। ह'टेल बय जानानै थानांगौब्ला गोमबोरा गावनि जिउखौ फसंनो हानाय नडा।

मोनसे समाव गोमबोरा बिजनेस मेगनेट दिगम्बरनि न'आव नुजाहैदो। बनि थगायनो रोडि, मावनो बानाय गैयि आरो गंग्लायलु आखलाव गथ'-गथाय गैजारोडि बिथां दिगम्बरनि बिसि बोरगोस्रिनि गोसोआव बनि फारसे बिमानि अननाय साफिदो। गोमबोरनि गावनि जिउखौ फसंनायनि बोदोर हाबिलासखौ नुनानै बोरगोस्रिया फिसाझा गावनि मुडै नामजारि खालामनानै होखानाय हा दरसेखौ गोमबोरनो हगारनानै होदो।

बोरगोस्रिनि गोथार अननाय, मदद आरो थुलुंगाजो गोमबोरा इन्दि बागान दरसे खालामदो। बे इन्दि बागाननि खुन्दुंजो दानाय इन्दि सिफोरखौ फाननो थाखाय

नोगोराव सेल्स काउन्टर मोनसे बेखेवदों ।

गोमबोरनि जग्रबसेल' फार्मा दिनै बेसेबा गेदेर टेक्सटाइल कमप्लेक्स जानानै फैबाय । आथिखालाव इन्दि खुन्दुंजों पलियेष्टार, रेयन आरो टेरिननि फाइबारजों सिनथेसिस खालामनाय खुन्दुं आरो बे खुन्दुंजों दानाय सि गोमबोर मोसाहारीनि टेक्सटाइल कमप्लेक्सा दुलाराय भारतनि जेरावबो फानसै । निखावरि जाला 'खनि फिसाज्ला, सानसे समनि मोनबारु माहाजोननि बान्दा गोमबोरा दिनै सासे बेसेबा गेदेर इण्डिष्ट्रियेलिष्ट ।

बेराफारसेथिं, मोनबारु माहाजोननि उन बैसोनि जिउवा दुखु गोनां जाहैदों । न'खरनि हाल-साला लांग्रां-सिख्रां जालांदों । फिसाजो गिबि हाइनाप्रिया दाहोनाजों दोनखारलायदों, फिसाज्ला रैदोना जौ-जुवायाव गफबदों । बिसि मैराइया दाहा-दिखाराव बेरामाव गोग्लैना नै लेलाय लेलाय थैदों । दाहोना-रुवाथिजों गोम गोम मोनबारु माहाजोननि न'खरा उनावहालागै दाउब' बासिनाय बादि सिं स्र जालांदों । हालिबा हाखौ मोनबारु माहाजोना आदि-सुखानि होना नै जानांदों । बोराइ बैसोआव मोनबारु माहाजोनखौ आबार खालामनो फिसाजो गदाय हांमास्रिल' थाहैदों ।

प्रेस कनफारेन्सनि उनाव आं बिथां गोमबोर मोसाहारीनि इन्दि सिनि प्ललाव थांनानै जिरायहैबावदों । बिथांनि जिउखौरांखौ खोनासंखानानै आं हरखाब सोंदोंमोन-नोंथाड बन्दकाव थानाय हाखौ सुख 'बाय, बर' हारिनि गोमालांनो हमनाय इन्दि खुन्दुंनि इण्डिष्ट्रिखौ बोखांसे बोखांनानै मोनसे गोदान महर होबाय । नाथाय हांमस्रिहा मा जाखो ?

लाजिहां बरबहां जानानै गोमबोर मोसाहारीया आंनाव उल्था सोंफिननाय बादि बुंदों - 'मा जायोब्ला नोंथाड गाहाम जागोन बादि सानो ?'

हाबा । नोंथांजों । - बुंदों आं ।

लंपेन्ट गांसेनि ज'खानि इन्दि टेरिन गांसेनि पेकेट आंनो होना नै बिथाड हादे मिनिनानै बुंदों - 'जासिगोन । देग्लायनो ।' □

**लिरगिरिनि सिनायथि:**

**नीलकमल ब्रह्म :** नीलकमल ब्रह्मआ क'कराझार नोगोरनि सेरावनि आदाबारि गामियाव 1944 मायथाइयाव जोनोम जायो । बिफानि मुड महेन्द्र ब्रह्म आरो बिमानि मुड मनेश्वरी ब्रह्ममोन । गामिनि गुदि फरायसालियाव फरायजेनानै

क'कराझार गभर्णमेन्ट हायार सेकेण्डारि स्कुलनिफ्राय 1965 मायथाइयाव पि.इउ पास खालामनानै 1968 मायथाइयाव क'कराझार कलेजनिफ्राय बि.ए. पास खालामो । बेनि उनाव 1973 मायथाइयाव क'कराझार हायार सेकेन्दारि स्कुलनि फोरोंगिरि जायो । 1993 मायथाइयाव बे स्कुलनिनो प्रिन्सिपाल जानानै 1998 मायथाइयाव अबथिरा जिउ गोमानाडे ।

बर'थुनलाइ मुलुगाव बिथां ब्रह्मनि मुड बयजोंबो मिथिजानाय । मुंथियै सुंद' सल' लिरगिरि महरै । बिथांखौ बर' सुंद' सल'नि स्रमाट बुंनाय जायो । बिथांनि सुंद' सल'नि बिजाबफोरा जाबाय - सोनाबनि सल', सिलिंखार, सिरिनाय मान्दार, हाग्रा-गुदुनि मै, साखन्द्रा, मेम दाउदै, गुबुन बिजाबफोरा जाबाय - आदै टमनि देरा, मावरिया, आं दाबो आदम इभनि रजे । 1998 मायथाइयाव 'सिलिंखार' बिजाबनि थाखाय बड' साहित्य सभानि रांसार बान्थाखौ मोनो ।

**सोदोबथि :**

अल'खद - जिउनि दुखु-दाहा, गांजि सम

बराद - खाफाल

बेहेर - भेर, हाबु

सिलिंखार - जोबस्रानाय

नबथि - न' लुनाय बिथा

म्याद - सम

बैनाय - रां-रुफा मोना लासै मावनानै होनांनय ।

दाउब' बासिनाय - स्रि-स्राय

**सोंथि :**

1. गोमबोर मोसाहारीनि-फार्मनि मुड मामोन ?
2. सोर गोमबोरनि जिउवाव सिलिंखार लाबोदोंमोन ?
3. जालाख'वा गुबुन जायगायाव थाहैना नै सोरनियाव थाहैथ'दोंमोन ?
4. जायनि गोसोआ हांगार बे गोसोआ हाजार सुस्राब्लाबो स'ना फिथर बादि जाया । - बेखोथाजों सोरनि खोथा बुंनाय जादों लिर ।
5. गोमबोरा माबोरै दाहोना गाहाइ जादोंमोन लिर ।
6. हाइनास्रिनि आखला माबादिमोन ?
7. माहाजोनजों होखारजानानै गोमबोरा बहा थांदोंमोन आरो मा मा हाबा मावदोंमोन ?
8. सोरनि हेफाजाबाव आरो माबोरै गोमबोरा फालांगियारि जानो हादोंमोन लिर ।

## रोनाव फागला

- हरिभूषण ब्रह्म

‘रोनाव फागला’या बिनि गुबै मुं नड। गेजेर ज’रायाव सोरनिबा खुगायाव बेरखांजेननायसो। मिथिनो लुबैग्राफोरा सडोब्ला बिनि मुड निलध्वज ओंखारहैगोन। लेखाखौबो रोंद्राया नड। क्लास X थाखोआव फरायनाय समावनो बिफा थैजानानै आस ‘खान्दा जानानै थादों। दा समनि क्लास X थाखोनिब्लालाय गाननाय-जोमनायावनो सिनायजागौमोन। गोदोनिस्सो, गोदोनि मानि साहेबफोरनिफ्राय उदां मोननाय उनावनि बै समनि क्लास X थाखोसिम फरायग्राफोरनि गानग्रा फेना बांसिनानो हान्थु बरामोन। दानिबादि एसेबां गोलाउ, एखनब्ला एम्बु फेन्दाबादि खाखेब, एखनब्ला थालिर लाइफांबादि संसड आरो एखनब्ला बर’ हिन्जावफोर माइ सौग्रा उवालबादि औरै दुमफा औरैबो दुमफा गेजेरावल’ जेरज’ नडमोन।

सिगाडव रोनाव फागला होननानै गाबज्रिजेनब्ला एसे खैसिं खालामोमोन निलध्वजा। उनावहालागै जेबो सानाखिसै। रोनाव फागला होननानै गाबज्रिनायावबो जेबो गोनां जाहोन गैयामोन। निलध्वजनि साननाय बुंनायफोरजों दानि सेंग्रा सिख्ला आरो गुबुन मानसिफोरनि साननाय, मावनाय रायनायफोराव बारा गोरोबथिनाय नुनो मोना। बेखायनो निलध्वजनि बुंनाय बाथ्राफोरखौ फाग्लानि रोनावनायबादि सानो मानसिफोरा। सानसेखालि सासे दुथां सेंग्राखौ बिफाजों नांलायबाय थानाय समाव फंनैसो बुंनानै बेंहोनो नाजानायावनो सेंग्राजों दाद्रि होननानै बुंजेन जायो फागला जादों नामाब्रा मा रोनावद्ला बायखो, लोगोआ मोनलांगोनलै मालायबा मालाइ। खाथियाव थानाय मानसिफोरा मिनिग्लाबनानैल’ थानायसै। निलध्वजा ‘बिदिनोसै आरोमा’ होननानै दसे सिरि गंप्पिनानै आगान सुरलाडो गावनि लामार्थि गबज्रब गबज्रबनो। बे दिननिफ्रायनो निलध्वज मुड निलध्वजनिफ्राय बिदाय लानानै गावनि गांखौ बुब्राबनानै उदां अखांथिं बिरलांनायसै, बोरला बाथुलजों गावफ्रामजानाय दाउथुफाथि बादि। बिरलांनाय उनावबो बोसोरनैसो नायहरनो नाजायोमोन निलध्वजा दाउथु महरै बिरलांनाय बै निलध्वज मुंखौ। उनावहालागै रोमै रोमै, मोले मोले जालांनायसै।

‘निलध्वज’ मुंखौ लानानै गावबो एखनब्ला सिरि सिरि सानखांनायमोन सिगाडव सोर दोनजेना होननानै। ‘निलध्वज’नि गोथौ सोदोबखौ मिथिनायमोनब्ला हयथ’ दोनग्रायाबो दोननाय नडमोन।

लामा-सामा फरायसाफोरखौ ज’ लोगो मोनब्ला रोनाव फागलाया बुंनो नागारा - मोजाडैलै बाबुफोर, फंबायफोर, नोंसोरनोसै हारिखौ फोसाबगोना, बिमा बिफानि मानखौ लाखिगोना। बायदि बायदि होननानै हान्थुबारै गामसा फिसा गाननाय रोनाव फागलाखौ बांसिनानो मिथियादि बेबो सानसे समाव मेट्रिकनि जोबथानाय थाखोआव फरायदोंमोन, माइनराव सात्रवृत्ति लानानै पास खालामबोदोंमोन।

गामिनि फरायसाफोराबो मिथिया, बेखायनो खोमाबो सुजाया। ‘जाम्बा जाम्बा मा बुंलायखेब्रा नोंलाय रोनाव फागला’ - औरै होननानै खायफाबा जंखायलांनायमोन। रोनावा जेबो बुड, बुंनंगौबो जेबो थाया। बैसोनि खर’ बारनानै बाथ्रा रायलायनाय, बुंथावै राव दिहुननाय बेफोर हुदाया बर’फोरनाव माब्लानिफ्राय बौरै हाबफैखो बेखौल’, सिरि सिरि सानखांनो नाजायो रोनावा।

गामिनि सेंग्रा, दाहोना दिंग्राफोराबो रोनावखौ रोनावद्लाबायग्राल’ होननानै मिथिगौ, बिनि बारा मिथिया। सोरबा सेंग्राखौ बारा जौ फेनानै हब्रा हब्रा गोदाव सोराव गान खनलाबायनाय नुयोब्ला बुंनायमोन - ‘हामालै फंबाय, गावनिखुइ गिदिर गोलाउसिनफोरनि सिगाडव बिदि खालामोन।’ नाथाय खेर खेरायजाया। ‘दोर बावदा रोनाव फागला नों मा मिथिगौब्रा मालाइ रंजानायखौलाय’ होननानै ब्लद थांजायो हब्रा हब्रा।

सोरबा सिख्लाया सिनेमा नायनो थांफानो मोनैनि हसि हसि बिमाजों नांलायनायखौ नुयोब्ला बुडे - ‘हामा बिनानाव बिमाखौ बिदि बुंनो, मोजां गाज्रि बिमाया साबसिन मिथिगौ नड।’

बे बावदा रोनावफागलायाबा मा नांजादों। खाब बुंफिनजायो। रोनावा हमनो हाया बर’नि गेजेराव दुफांनि गोजोनग्लाय बार बारदोंना बैसागनि बंफां-लाइफां आरो न’- बां सिफायगुंनग्रा बारहुंखा।

गावजों बैसोआव समानफ्राम लोगोफोरा बांसिनानै रोनावल’ बुडे। फागलाखौ बुंदेरा। गोदो निलध्वज बुडेमोन। नाथाय बर’नि खुगायाव निलध्वज, चक्रध्वज, जयध्वज बेफोर गुदु गुदु समाया आरो खुगायावबो थाब फैया। बेखायनो लोगोफोराबो ‘रोनाव फागला’ मुड बेरखांनाय लोगो लोगो बारस्लाय लांनायसै ‘रोनाव’। दा सोरबा रोनाव दा, सोरबा आदै रोनाव आरो सोरबाबा रोनावसो होननानै गाबज्रियो। दुथां सेंग्राणि खुगायाव बेरखां जेननानै उन्दैनिफ्राय गेदेरनिस्सिम जायगा मोनहैनाय ‘रोनाव’ आरो ‘फागला’ मुंखौ राइजोफोरनि अननानै होनाय बान्था बादि खर’ गंग्लायनानै नाजावो निलध्वजाबो।



गामिनि गावजों समब्रा समब्रि लोगोफोरा रोनावनि बुंनाय बाश्राफोरखौ ऐसे खोमा सुनायबादि खालामो । गावजों गाव गामिखौ फोसाबलांनांगौ जाबाय । नडब्ला गामिनि मुझीया गोमालांसिगोन । मानसि बांनाय लोगो लोगो हा-हुआबो सेबबोबाय । जाग्रा लोंग्रा बेसादफोराबो जामबोबाय । हारियाव नुनो मोनफेरै मागिनानै जाग्रा हुदायाबो सोमजिबाय । थानो थाखै मोजां गंसे न' लुनो रौलिया । थाबायनो दोंसे मोजां लामा थालिया । थास गेलेनाय, जौ लोंनाय गाज्रि फावफोरा रोजानिफ्राय रोजा जाबोवाय । नाजायोब्ला जों ज' जानानै बेफोरखौ सानलाय हलाय फोसाबनानै लानो हायो । मोजां बाश्राफोर सावरायनायनि थावनिफोर गायसननानै बायदिसिना हाबा मावनायनि फारि लानो हागौ ।

रोनाव बुंनाय बेफोर बाश्राफोरखौ लोगोफोरा खर' थिखांनानै नंगौ बुंलाडे । नाथाय मावफुंनो थाखाय रावबो दावगाबोवा । बिसोर सानो रोनाव बुंनाय मावनांगौ हाबामानि गासिबो गभमेन्टनिसो मावनांगौ फारि । न'-बां फोसाबनाय, लामा बानायनाय, जाग्रा लोंग्रा जगायनाय, लेखो सोलोंनायनि राहा खालामनाय बेफोरखौ गभमेन्टसो मावगोन । भ'ट बिनो फैनायावनो बुंखाजोबनाय । बेखायनो खायफाबा खाब्रां बुंगारो गासिबो जोंनो मावजोबनांगौबालाय गभमेन्टखौ मानोथो नांगौलै । रोनावनि साननायाव जेथो नाडे । सानख'नो हाया, गाव गावनि मोजाडै, थानाय, जानायनि थाखाय गभमेन्ट बोरै मावनानै होफैजोबनांगौ जाखो ।

रोनावनि बुंनाय बाश्राफोरखौ सावरायनानै खायफाबा रायखोमायो 'जाम्बाबादि रोनावनायखौनो नागारलालै बियो, नामजों मानसिजों गोरौबथारबाय ।'

रोनावाबो मिथिगौ, गासिबो मिथिजोबगौ बेफोर रायखोमानायखौ । थेवबो बुंनांगौ जेबो थाया रोनावहा । रावखौबो रायफेरा, गोरा राव बुंफेरा, आरो रावजोंबो नांलायफेरा । गाव गोसोखांनाय, सानखांनाय बाश्राफोखौल' बुंथिनो नाजायो रोनावा ।

रोनावनि गामि खाथिजों दाउमासार दैसाया बोहैलांदों । मेसें समाव बारा दै थाया । दैज्नाडव अखानि दैजों गावनो आन्था बोलो गोरा जायो ।

दैसानि फारसेथिं गुवार फोथार । गामिनि सेंग्राफोरा ज जालायनानै मोनाबिलियाव बायदिसिना खेला गेलेयो । सालबारियाव गुमनायनिफ्राय हुरनबोनाय मोसौ फालोआबो ज' जाफैयो मोनाबिलियाव, गामिनि मोनसेल' बे फोथारावनो ।

दैसा बारै गुवार माइ गायग्रा दुब्लि । दुब्लि जोबथानायनिफ्राय सालबारि । दैसा, दुब्लि आरो सालबारि ईसोर होनाय बे मोनथामानो रोनावनि गामिखौ गोदोनिफ्राय निदान सुंबोदों । दैसाया लाखिबोदों दुब्लिखौ थाजिम खालामनानै । आरो बे

दुब्लियावनो दैज्नांनि अखाया सालबारिनि गेसाव गोफोन बोगारबोनानै हासार खालामफैयो । बेखायनो दुब्लियाबो फोलाया । माइ-फाथो मावब्लानो ग्रोम ग्रोम जायो । बन-लाइफोरखौबो सालबारिनिफ्राय मोनो । गामिनि मानसिफोरा गोसो होलायोब्ला राइजो जानो बारा बोलो नाड जागौ ।

बेफोरखौ सानखांनानै रोनावा एखनब्ला गारां हगारसारनानै मेथाइ खनो हारसिडै सालबारियाव बन लायनो थानाय समफोराव । गारां हगारनानै खननो मोजां मोनग्रा रोनावनि मेथाइनि मादाव दोंसेया जादों -

आय' बर' बिमा -

नों मानो फिसाखौ जौजों खाड,

आब्रा फिसायाबो गारनो रौलिया -

जेरैबो जालांबाय लान्दा खान्दा

बर'नि गेजेराव मानोबा आवा-फावा

आय' बर' बिमा..... ।

हगारसारनाय गारांजों सालबारिया गोमसारलाडे । खिलिगोदान सालबिलाइ सेराव थाखोमा थाखोमा खननाय मेथाइखौ दोनथ'लायनानै लाफासाइख', हा-फिसाहौवा आरो दाउ खौऔफोराबो खोनासडे रोनावनि रिन्दाव रिन्सि खननाय मेथाइखौ ।

सानसेखालि बे दाउमासार दैसा सेरावनो गबथब सिरि जगासिनो दं रोनावा । उदां बोथोर, मोनाबिलि सम । सालबारि सिं सिं सालबिलाइ गोरान खामनाया गोजाननिफ्राय रिथिउ राथाव नुहरो । बारबो बारदों सिउ सिउ, गोजाड गोलोमा । सानसेमानि उसाव बादाव मोननाय गोसोखौ गोजोनग्लाय होनो नाजादों ।

रोनावा सिमां नुदोंमोन हराव, हरसेमानि । गोसोआव नांनाय सिमां । बावनो सानब्लावो हायाखै । रावनिबो सिगाडव बुंथिनोबो हाया । बुंथिब्लाबो मिनिनानै उरायजोबगोन रोनावा मिथिगौ । बेखायनो दै सेराव जायगा लाफैदों रोनावा ।

रोनावनि मेगन थाइनैया सल सल बोहैनाय दै थिंजाय । गोसोआ बोहैनाय दै सा-सा थाबायलांदों, दाउखोलाय दाउलाय ।

खेबसेनिबा दावगालाडे बोहैनाय दैसानि गुदिखौ संनो । थाडै थाडै मोनहैयो सालजग्रब सेराव सिथलासे गुवार बिलो । हा सिंनिफ्राय गबोनाय फुवा फुवा दैमुजों जानाय बे बिलोआनो जादों दाउमासार दैसानि उजिजेननाय जायगा ।

दाउमासार दैसानि दैया लामा लादों ज' ज' गावसिनि दैमाखौ नागिरहैनो ।

एसे गुसेब जायगायाव दैसा जानानै थानो रावहाबो गोसो गैयामोन । बेखायनो हांफ्ला सिफ्ला दावगादों । रावबो रावखौबो नेलायाखै । थाराइबारि, खाग्राबारि आरो बेसेबां नोलोबारि, सौसि-सौसा, उरखाव-उरसि थाबाययों । जेरावबो थाद'वाखै ।

आरो खेबसेनिबा दावख्लायबोयो रोनावनि गोसोआ । दसेनि लागै सहैयो दैमाखौ लोगो मोनजेनहैनाय दैसानि बै रोमैलो समायना जायगायाव ।

बिमानि मोखांखौ नुहरनायलाय दाउमासार दैसानि दैयाबो लाजि गुसु जानानै सुंद' सुंद' सुरबायगोन आगानखौ । दैमु बिलोनिफ्राय ओंखारजेनबोनायाव हांखुर जालायनाय सस्लाबै आगान सुरनायखौ नुनो मोनलिया । मिनिस्तु मोखाडै गोजाननिफ्राय आखाइ फुवारनानै लासै लासै दावगालाडे ।

गोजाननिफ्राय दासो सफैनाय फिसाखौ बिखायाव बजबनो बिमायाबो आखाइ फुवारनानै नेगासिनोजेन दं ।

सोरगिदिं उला माखा, बिमा फिसा अननायनि गोबालायनायाव रंजानायनि जावरि जाखांदों । दैसा सेर सेर गसंनानै नायनाय आवजार बंफांफोरा ख्रब ख्रब आखाइ ख्रबदों । बालाबारिनि रथं रथां लाइफांफोरा गोदोना गंदब गंदब फेमफा सुदों । फिथिख्रि आरो फोल्लागद नाफ्रा आथिं जोगदाव जोगदाव मोसादों । मोसानाय लोगो ना बार्लिफोरा ओजों दुलदुम, ओजों दुम धुला दामदों । अनसुलि बिमानि फिसा बजबनाय उलमथा रंजानायनि बे मेलाखौ नायनो खाथियाव फिसा-फिसौ ज' लानानै नाथुर बोराइयाबो दारि साफ्रे साफ्रे मिनिस्त्राफैदों ।

ना थेंगोनाफोराबो जनानै थायाखै । ज' ज', गिदिं गिदिं फाबुवा लाथा आरो थथाजाम्बि मोनखौ रेगे रेगे मेथाइ खननानै खोनासंहोनो नाजादों ।

उलामाथा रंजानायाव नांलाय खमलाय जाजानो गिनानै खांखाइ नागाया आसि थाइनैखौ खेबजां खालामनानै ओजों थांलाइ ओजों फैलाय दिथा होगसिनो दं । खबरदारि हुकुमा ना गाड थेफानि । गावनि अन्दर महलाव हाबनाय सिगांनो उदैखौ जेसे हागौ फेदेरनानै बुंखालांदों - 'नांलाय-खमलाय, बुलाय - सोलाय जानो मोननाय नड होननानै ।

रोनावा हारसिडै मिनिखाडे गावनि साननायजोंनो गाडथेफाखौ नानि राजा बानायफ्लांनानै आरो खेबसे सानबावनो नाजायो गाडथेफाखौ राजा बानायनायाव मा गोरोन्थि थालांखो । हादरखौ बोलोजों खुडोना गोहोजों खुडे । बोलोजों खुंनायमोनब्ला खांखाइ बार्लि एबा गुबुन बोलो गोरा नाफोरा मोननांगौमोन

राजउलाफादखौ । गोहोजों खुंनायब्ला नाथाय गाड थेफायानो मोननांगौ फारि जानानै थाहैयो । मानोना मिथिनो मोननायनि मादाव गाडथेफाबादि गावनि देहाखौ गोसोबादि फेदेरनाय, गोसोबादि फुदैनो हानाय, गुबुन ना ओंखारनाय दिनैसिम खोनानो मोनफेराखौ । सोरबाफोर ओंखारो खोमा होननानै आनजादबो नायखांबाय होननानै खोनायो ।

आनजादाव खांखाइयानो सिगां नाजादोंमोननो । बोलो होखथाबनानै देहाखौ फेदेरनो नाजानायाव खेबसे गावनि खल्थायानो गुबुसारजायो । ना सिंगिनि इनजेकसन नडामोनब्ला खांखायनि जिउवा गोथै हाखरावसैमोन होनजायो । गुबुनाय खल्थाखौ हमथानानै सार्जारिनिबो एक्सपार्ट ना-सिंगिया सुथेनानै होनायसै । एखनब्ला गाड थेफानि सायाव रागा जोंफ्लांबाबो गावनि बिखुंनि खाब्रे सुथेनायखौ दांफ्लांहरब्लानो थोर गिफिनो खांखाइया दाबो ।

ना बार्लियाबो नाजादोंमोन राजा जानोखौ । देहाखौ फेदेरनो लागै खेबसे बोलो होनायाव मोदोमनि बिगुरा गोलाउयै थुब्ला फ्राथ जिखावजायो । एसिसटेन्ट सार्जनानो सुथेनानै होनायसै थाबनो । बे दिननिफ्रायनो ना-बार्लिया ब्राब गारो राजा जानो हास्थायनायखौ ।

उनाव ना थथाया खुगाखौ जेसेहागौ फुवारनानै बुंसारथिनायसै 'दिनैनिफ्राय मानिनां गंगारामानो जोंनि राजा, मानोना जोंहा साधारनाव जा गैया बे गोहोखौनो राजा गंगारामनियाव नुनो मोनो ।' बयबो आखाइ ख्रब ख्रब ख्रबनानै गंगारामखौनो राजा फाथिनायसै ।

रोनावनि गोसोनि सिमाड थुंगेफैयो । 'राजा गाडथेफा', - बर' समाजाव बेसे गोबां जोनोम लाखो बेनि अनजिमा गैया - रोनावा सानखाडे ।

ना बोन्दों नामा रोनावदा ?

उदां गोसोयै रोनावनि साननाया -

थाबथानाडे उनथिंनिफ्राय निर्मलनि बुंफैनायाव ।

'अ: निर्मल नामा ? फै फंबाय फै ।'

गावनि खाथियावनो जनो थिनो ।

निर्मला गामिनिनो बि.ए. फाइनेल इयेराव फरायनाय फरायसा । रोनावा निर्मलखौ मोजां फरायसा होननानै मिथिगौ । उन्दैनिफ्राय नुबोनाय । पि. इउनि आनजादाव फाष्ट दिभिजन मोनदों । दा धुबुरिनि बि, एन, कलेजाव 'रांखान्थियाव' साबायख 'र (Honours) लानानै फरायगासिनो दं । फाष्टक्लास मोननो नाजादों ।

निर्मलाबो रोनावखौ गोसोजो मानिखाडो । बबेबा दाबसे जायगायाव रोनावनि साननाय आरो गावनि साननायाव गोरोबथिनाय बादि मोनो । बेखायनो गुबुनफोरबादि खेरखेरायि जानो हाया ।

निर्मलाबो सानसेमानि फरायबाय थानानै खर गुदु मोननायखौ सुगलायहनो दैसा सेराव गिदिंफैदो । रोनावखौ नुनानै गोसोआ खुसि जायो, फंनैसो सावरायनो मोनगोन साननानै ।

‘नाखौ बोननो नाजादो फंबाय नाथाय आं बोनखानो नाजानाय नाया दैनि बेसेबा गोथौ थालायावसो । बे नाखौ बोनखं नांगौब्ला बोरसि दुरुड जानांगोन बेसेबा गोलाउ आरो आदाराबो जानांगोन नाखौ बरायनो हागोनबादि ।’

थाथ’ थाथ’, हां लाफा लाफा रोनावनि बुंनायखौ सानस’नो हायाखिसै निर्मला । सोमोनानायबादि गल’ जानानै बुंहां बुडहां बुंबाय – ‘आंनि खर’आव एसेबो हाबाखिसै रोनावदा नो मा बुंनो सानदो ।’

निर्मलनि बुंनायखौ एरखेनानै रोनावा खाराव माराव सौनायबादि सोंफिनो – निर्मल फंबाय, नो मिथिगौ नामा बर’हाबो हादर दंमोन होननानै, दंमोनब्ला मानो जोबलांखो ?’

रोनावनि सौनाया निर्मलनि थाखाय गोराद्रायबाय । मोजां फरायसाबाबो जारिमिननि खौरांखौ लाखिनो बारा सम दिहननो रोंबोवाखै निर्मला । बेखायनो सुंद’थैल’ फिननायसै – ‘दंमोन होननानै खोनायो रोनावदा, दिमापुरखौनो हादरनि नेरसनो होननानै बुडे । जोबलांनाय जाहोनफोरखौबो बारा मिथिस’वा । गावजो गाव फोथायखेबस’नि हाबाखौनो गुदि आरो गोनां जाहोन होननानै बुडे मानसिफोरा ।’

मेगन बेरला बेरथायै गावनो मिथिस्लाबाजासे निर्मलनि बिखुडव लासै दुब बुनानै गारां हगारसारनानै बुडे रोनावा – ‘नंथारगौ, ‘नंथारगौ फंबाय नंथारगौ, फोथायखेबस’ फोथायखेबस’आनो जाथारगोन ।’

निर्मला गावबो मिथिस्लाबाखिसै मा जाखो । गावसो जेन सानसेमानि नागिरबाय थानाय गोमानाय मुवाखौ ‘नै आदा रोनाव बेवहायसो’ होननानै खिन्थाबाय ।

‘सिमांखौ फोथायोना नो निर्मल फंबाय?’ रोनावा सोडो ।

फोथायनाया फोथायो । नाथाय खायफा सिमांफोरा फेलें थाडेनो । निर्मला फिनो ।

नंगौ फंबाय । सिमाड सिमां । सिमांनि बाश्राखौ लानानै साननांगौ माबाफोर

दड’ आंबो साना । नाथाय बबेबा सिमाडदि गोसोआव औरैबादि हांखौ दोनलाडो, ना बावनो हायो ना लानो हायो । दा जेरै थानाय हराव आं नुनाय सिमां । सानसेमानि बावनो नाजाबाय आं । बहा बोरो बावनो हाखो । गिदिं गिदा गोसोआव फैखाडो । जेन सिमाडसो आंखौ मोगथाडव माबा बुंनो सानदो । रोनावा बुंथियो ।

बेफोरबादि सिमांखौ मालायनि सिगाडव बुंथि नांगौनो आदा । गोसोआ रेजें जागारो ।

नंगौबो जानो हागौलै फंबाय । नो खोनासंगोन होनदा । सोलाबगोन फा ?

बुंदे आदा । आंबोना आनजाद रिजाल्ट ओंखारनाय सिमां सिमां नुनो लुबैयो । रेलगारि, गाखोनाय, दालां मोननाय बेफोर सिमांफोरा पास जानायखौनो खिन्थाथिनाय जायोनी । थेवबोथ’ रिजाल्ट ओंखारसान्दि मोननाय उसु-खुसु गोसोखौ गोगोम खालामो । दे खिन्था दे आदा खोनासंगोन आं । निर्मला थिनो ।

नै खोनासं फंबाय । समा मोनाबिलि, सानरोमो रोमो । रोनावा जुरियो । आंलायनो गामिनि साहा थिंजायै सालजग्रब सेरनि दुबिलिनि ख’नायाव न’आवनि मोसौ हालुवाखौ नागिरनो थांदो । साल आरो बायदि बायदि बंफां लाइफांजो साना होथेजानायलाय जायगाया दरसि, निजोमसिन जाबाय । साखाथि फाखाथियाव रावबो गैया । मोनाद्रायजानो गिनानै आं खर खर नायथिं नायथा खालामदौलायनो । सालबारि गेजेराव दाउमासार गेसेरनायखौबो खोनाजेन हांबाय । लोगोफोरखौसो जेन लेंहरदो – ‘फैद’ माबार बयबो फैद’, गावबा गाव जायगाया लाफैखादो ।’

आंबो आगोनखौ खर खर गोलाउ गोलाउ सुरदो । बे समावनो, हो थिग बे समावनो, मानसिनि मुर्ति, नड हिन्जाव मुर्ति माने सासे बुरै गंखु जानानै हाग्रायाव हाबहैनाय लिं लिं लामाजो दावगाबोयो । बुंनो थाडोब्ला गुबै लामा नड, सालबारियाव मैसो-मोसौ हाबलांग्रा आरो ओंखारबोग्रा दोसे सर ।

बुरैनि खर’आ गुफुर । खासिबिबारखौ ज’ खाथुमनानै रुजुननाय बादि नुयो । खानाइ फिथरा खाखोनाय – फिथौथौ ।

खोमसिहां निजोम जायगायाव मानसि नुनायलाय आं खाथियाव दावगालाडो सिनायनाय सोरखौबा नंनानै । नाथाय आं सिनायनाय रावबो नड । गाननायाव दखना सुरि । हान्थुल’ एसे बारग’नाय, फाथं, गेजेर गेजेर गब्लं । साखानायबो आगरनि दानाय । बिजिजो सुथेनानै गेजेर गेजेर खावनै थुब्ला जानायखौ लाखिसाबदो । थेवबो रुगुंनि गिजि उवां थानायखौ नुसारो । नायब्लानो रागा जोरोडै मानसियाबो सानफ्लांगोन, ‘सोर अगेन, बिमाखौ नायसनरोडि फिसानि बिमा जाखो बिलाइ?’

होननानै । बुरैया आंनिथिंजाय जों नायहाबनानै बुंलाडे ।

‘फिसा रोनाव, नोंखौ लोगो मोनबाय हामबाय । थानाय समाव फंनैसो बुंलानोसै आं । दिनै नोंखौ रोनाव फाग्ला होननानै बयबो सै सै खालामदों । सानसे समाव नोंखौ बयबो अनसायगोन । बर’ हारिया दा लामा आन्दायनानै दड’ । गात्रि हुदायाव गफबनानै थानाय बर’ हारिया मोजां गात्रि बिजिरनानै नायनो गोहो जाथ ’वाखै । थेबगां थिफुद्ला गोसोनि फाखनावनो गिदिंगासिनो दं । बे फाखननिफ्राय बारग ’नो हाब्लासो फिद फिद गोसोखांगोन सिगांनि गोरोन्थिफोरखौ ।’

‘आं बर’ बिमा ।’ बुरैया दानदिसे थाद ’नानै बुंबावदोंमोन ’ नोंसोर जायखौ माइनाव होननानै बुडे । आंखौ नायब्लानो मिथिगोन बर’ फिसाफोर आंखौ बोरै सिबिदों । बिमा बिफा सिनायनो रोडि सिविनो रोडि-फिसाफोरनि गेजेराव थानो नालिया होननानै बाथौ बोरायाबो आंखौ लेंहरबाय हाजो खर’आव ।’

हांमा गोलाउ सुरनानै बुरैया बुंबावो फिसा गारनानै थानाय आंनि बे खौरांखौ नों बयनिबो सिगाडव बुंब्लाबो रावबो फोथायनाय नडा । रोनाव फाग्लानि आवनायनासयो होनगोन । थेवब्लाबो नों खिन्थानांगोन । आं नोंनो बोर सारस्रिलाडें । गात्रि लामायाव आगान सुरनो सम नाड मोजांथिंजाय सम लायो । सानसे समाव नोंनि खाथियाव मानसिफोरा फेंगोन स-स । बिसोरनि थाखाय नोंनि खुगानिफ्राय ऑंखारनाय रावफोरा बेरे मोदैनखुइ गोदेंसिन जागोन । अब्लासो थैहाबनायनिफ्राय लासैनो जिउ दान मोनखांनयावदि सुथि मोनजोबगोन गासिबो । आं बुंनाय बाथ्राखौ फोसावनो नाजादो नों ।’

बुरैया गंमिनानै थाद ’हाबो आरो लासैनो बाथ्राखौ जुरिफिनो - बर’ फिसाफोरा हारिखौ फोसावनोब्ला, जेरेबो गोखों गोरा देरहासाद खालामनोब्ला, गाव गावखौनो रेंसिन साननाय ’अहं’खौ गारनांगोन । दावगालांनंगौनि लामायाव अहं साननाय आखला जोबोद गिदिर हेंथा, गावखौनो गाव सिनायनो रोड जायो । जाय गावखौ सिनायरोड मालायखौबो सिनायनो हाया । बर’ हारिनाव दा बेखायनो गुलाय गुजाय, जालाखाद बिलाखाद । गावनिखुइ रेंसिन रासिन गुरु थाखोनि मानसिखौ सिनायनो रोड जानानै दं । रावनिबो बाथ्राया रावनिबो खोमायाव हाबा । रावजों फावजों गोरोबा । फिसाया बिमा बिफानि बोसोन लाया । बिमा बिफाया सोरबा रेंसिन रासिनखौ मानिया । गावजों गाव थाव थेलेफा थगायथसि । बेफोर गासिबो गाव गावखौ सिनायनो रोडिनि थाखाय बेरखांनयाव आखलबोल’ । बे आन्दायनायनिफ्राय बारग ’नानै बर’आ गुबै लामाखौ हामफिननोब्ला लामा दथायाव जनानै गोसोखांहाबनांगोन मेगन मेसेबनानै । अब्लासो नंखाय स्रा स्रा गुगालांगोन, गुबै

लामाया बेरखांफेंगोन गोसोनि मेगनाव । आं थानोसै फिसा रोनाव, निदानाव आंनि महरखौल’ गोसोखां, लोगोआव बाथौ बोराइनि ।’

आं गोमोहाबदोंमोन । मातृ नानानै फाफोर जानायबादियानो जादोंमोनगोन । बुरैया थानो आगान सुरब्ला आं सिरिमोनखांनयावदि जादोंमोन । गंग्लायदोंमोन आं बुरैनि आथिंखौ हमनो, गोसो गोरबोनिफ्राय खुलुमस्रा हरनो आरो बिमानि आफाखिजों आंनि खर’आव बिलिरनानै लानो । नाथाय मोना । बिमानि आथिंनि जायगायाव हांगारनिखुइ सोमसिन माबा मोननै मुवा । लिं लिं लामाजों दाउथ्रोदलांनयाव मेगनाव गोग्लैयो । बे मोननै गोसोम मुवानि सायाव जान्जि ज ’रानिफ्राय बिमानि महर, साखाथियाव मोसेबुं, मेगनै बिफा बाथौ, खर’आव खानाइ जेथो । बिमा बिफानि महर मोननै सोरगिदिं उखुन्दै, बबेनिफ्रायबा जोमै गुफुर फैनानै बिसोरखौ होथेनो नाजादों । बिमाया आखाइजों माबा माबि फाव खालामलांदों । दावथ्रोदलांनयाव लोगो लोगो मोले जाबोयो नुहां नुवाहां । लासैनो महर मोननैया गोमोरलाडे आरो गुबुन जोंथि महर मोनसे जाखौफैयो । सांग्रेमानि देरसिन, हाथरखिनि दुइसिन । बिरलाडे गोजौनिफ्राय गोजौ बंफां बारिनि खर’साजों । आं गोमोहाबो, मेगन थाइनैया मोसेबनो बावो । गोसोआ खाराव-माराव, उसाव-बादाव । गमामायैनो बिमा असेया न’ गारनानै ऑंखारलाडेब्ला जैरे जाथावगौ ।

एसे समाव गां बुबाबनानै न’आवनि दाउ जोलाया गेसेरो । सिरि जाहाद मोनखाडे आं । उन्दुफिननाय जायाखिसै । खर’आबो सिन्दां मोनबाय । खामफ्लाइ गंसे लानानै खामसालियाव जफैयो आं ।

दाउज्ला गेसेरनायजों गामिया गोमसारो । ‘जोंखौ फोजानो गामियाव जे एसेबां दाउजोला दं’ - आं सानखाडे ।

रोनाव बुंनाय लेखा निर्मला बुंदेरो - ‘नंगौथ’ आदा, नाथाय उन्दु गादुरा हारिखौ फोजानो हागोन दाबि ?’ □

### लिरगिरिनि सिनायथि :

**हरिभूषण ब्रह्म** : 1936 मायथाइनि 1 मार्च खालाराव टिपकाइनि डुलिगावाव हरिभूषण ब्रह्मनि जोनोम जायो । बिनि बिफानि मुड अचिना ब्रह्म आरो बिमानि मुड दैयाश्वरी ब्रह्म । डुलिगाव गुदि फरायसालियाव फरायजेननानै सापटग्राम एमालगामाटेड एकाडेमीनिफ्राय 1956 मायथाइयाव मेट्रिक आनजादखौ उथ्रियो । 1964 मायथाइयाव गुवाहाटी भुम फरायसालिनिफ्राय रांखान्थि आयदायाव एम एखौ

उश्रियो । सापटग्राम एमालगामाटेड एकाडेमीयाव फोरोंगिरिनि हाबा मावजेननाय ब्रह्मआ 1971 मायथाइयाव ग 'साइगाव कलेजनि बिबुंगिरि, दान्दिसे समनि थाखाय गोरायुं (लाथ 'नाय) जानानै 1996 मायथाइयाव साख्रिनिफ्राय जिरायो ।

गुबुन गुबुन लाइसियाव सुंद 'सल' फोसावबोनाय हरिभुषण ब्रह्मआ सुंद 'सल 'नि गानै बिजाब दिहुनदों । श्रीमती दुर्लाइ(1981) आरो रोनावफागला(1985) । 1997 मायथाइयाव थुनलाइयारि पेन्सन मोननाय ब्रह्मआ श्रीमती दुर्लाइ बिजाबनि थाखाय2001 मायथाइयाव रांसार बान्था मोनो । लंथाइखुलिनि सासे रिगुदामसा महरै मुंदांखा ब्रह्मआ गावनि हाबानि थाखाय 1997 मायथाइनि सेरफांगुरियाव जानाय बड 'फेस्तिभेलाव 'हिरिम्बापुर क्राउन' मान होजायो ।

### सोंथि :

1. रोनाव फागलाया सोर ? बियो माबौरै रोनावफागला जाखो ? बिनि आखुथाइखौ बिजिरना लिर ।
2. रोनाव फागलाया मा सिमां नुदोंमोन ? बे सिमाड मोगथांजों माबादि सोमोन्दो दड' ?
3. 'जोंखौ फोजानो गामियाव जे एसेबां दाउजोला दड' - सोर मानो बिब्दि सानखांदोंमोन ?
4. रोनाव फागलाया सुबुंनि सिगाडव माबादि बाश्रा बुदोंमोन ? सुबुंफोरा रोनाव फागलानि बाश्राखौ मा नोजोरै नाजावदोंमोन ?

